

**NATIONAL ASSEMBLY OF  
SEYCHELLES**

*Thursday 18<sup>th</sup> March, 2021*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Mersi. Bonzour tou Manm Onorab. Bonzour tou nou telespektater, oditer an deor. Nou a konmans avek en *pti matter of privilege* lo lapar *Leader* Lopozisyon. Onorab Pillay.

**HON SEBASTIEN PILLAY**

Mersi Mr Speaker. Bonzour tou koleg Onorab e bonzour tou dimoun ki a lekout.

Mr Speaker mon *matter of privilege* i an relasyon avek en raportaz *SBC*. Parey tou dimoun nou konpran parfwa i annan bann *oversight* ki kapab arive.

Par egzanp kan Onorab Georges ti pe koze anba son apelasyon ti Manm pou Anse Royale. Sa i bann *mistake*.

Me i osi bann keksoz ki *SBC* i bezwen konpran, ki bann Konvansyon. E en bann Konvansyon ki egziste ki Konstitisyon i prevwar e ki si oule ki lafason ki nou

Lasanble i *operate* toultan, e si ki ler en Manm in ganny elekte dan en distrik, sa Manm i sa Manm Elekte pour sa distrik.

Par egzanp si Onorab Sandy Arissol in ganny elekte pour distrik Bel Ombre, Onorab Sandy Arissol i Manm Lasanble pour distrik Bel Ombre. Parkont si mwan mon reste Bel Ombre mon pa kapab ganny apele konman Manm Proporsyonnel pou distrik Bel Ombre.

Sa i al kont etik lafason ki en Manm Lasanble i devret ganny apele. E mon pa krwar ki i annan okenn Manm dan Lasanble ki si ti annan en Manm Proporsyonnel dan son distrik ti pou aksepte sa.

Mon oule dayer Mr Speaker met lo rikord ki sa size in deza monte dan bann lezot Lasanble presedan kot *SBC* in fer menm apelasyon. Dan sa konteks spesifik Mr Speaker ti annan en raportaz an relasyon avek Onorab Doyace Porice.

E i pa lafot Onorab Porice me plito lafot *SBC* kot Onorab Porice in ganny refer koman Manm Proporsyonnel pour distrik Baie Ste Anne.

Nou ti a kontan met lo rikord e ki Lasanble i pran serten mezir e mwan sertenman mon pou osi ekri *SBC* ki dorenavan *SBC* i konn refer avek bann Manm. Par egzanp Manm elekte pour en

distrik *as oppose to* Manm Lasanble oubyen si *SBC* i oule servi sa tit proporsyonnel, Manm Proporsyonnel pour *LDS* oubyen Manm Proporsyonnel pour Parti *US*.

Mon oule met sa lo rikord Mr Speaker ki *SBC* i koriz sa e ki dorenavan sa menm zafer, sa menm kalite pratik, pa repete. Mersi Mr Speaker.

### **MR SPEAKER**

Mersi Onorab. Mon krwar nou a note e nou a pran kominikasyon avek *SBC* pou met sa direktman devan zot.

### **DEPARTMENT OF AGRICULTURE**

### **MR SPEAKER**

Avek sa nou a pas dan Staz Komite e nou ava apel delegasyon ki pe atann silvouple.

Nou annan avek nou delegasyon pour Minister Lasante, e *Climate Change* e Lanvironnman. Nou annan Minis Flavien Joubert. Minis pour sa Minister e osi ankor en fwa *welcome* Mr Damien Thesee, *Principal Secretary for* Finans e osi Madanm Astride Tamatave *Deputy Comptroller General*.

Pour Departman Lagrikiltir nou annan Mr Antoine-Marie Moustache son Sekreter Prensipal. E Minis

mon konpran ou annan enn ou zofisye ki an retar. Me selman nou a komanse e si i annan kestyon spesifik ki ou oule ki sa zofisye i adrese nou a zis note e ler i arive nou a kapab pran li. Wi Onorab Georges, wi?

### **HON BERNARD GEORGES**

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou bann Manm Onorab e tou dimoun ki pe ekout nou. Mr Speaker mon ti krwar mon ti anvi zis koriz non sa Minister ki kekfwa ou'n ganny en...ou papye pa reflekte son non. Son non se Minister Lagrikiltir ek Lanvironnman mon krwar *Climate Change* pa antre ladan. Sa ti ansyen Minister. Mersi.

### **MR SPEAKER**

E byen, Minis i korek sa. Mon note, wi, i en pti fot lo mon papye Onorab Georges. Mersi, avek sa nou a komanse.

E mon a evit, e *sorry*, mon a anons Bidze sa Departman Lagrikiltir. *Department of Agriculture* lo paz 506 ziska 509 pou en total R6milyon 33mil. Avek sa mon avar evit Minis pour prezant Bidze pour sa Departman.

### **MINISTER FLAVIEN JOUBERT**

**MINISTER** **FLAVIEN**  
**JOUBERT**

Speaker Lasanble Nasyonal, *Leader* Biznes Gouvernman dan Lasanble Nasyonal, *Leader* Lopozisyon dan Lasanble Nasyonal, bann Manm Lasanble e tou dimoun ki pe ekoute, bonzour.

Mwan ek mon lekip mon apresye sa loportinite pour nou vin diskite Bidze Minister pour Lagrikiltir, Sanzman Klima ek Lenerzi dan Lasanble Nasyonal pou lannen 2021.

Mr Speaker malgre son non, manda sa Minister i kouver 4 sekter prensipal dan pei. Sa i Lagrikiltir, Lanvironnman, Sanzman klimatik e osi Lenerzi. An gro Bidze sa Minister i R600.9milyon e nou ava al dan bann detay diferan parti sa Minister ek bann depans pli tar.

Me la avek ou permisyon Mr Speaker mon oule ti a profit sa lokazyon ozordi bomaten pour pas brefman lo bann direksyon e lanbisyon ki mon ti a oule anmennen dan sa Minister.

Mon premye mesaz pour bann anplwaye sa Minister letan mon ti konmanse se ki nou bezwen konnen ki rol nou sipoze pe zwe dan Gouvernman e zwe sa rol dan en fason efikas e dapre prensip ki korek.

Tou travay i bezwen konpran bann morso program Gouvernman ki konsern li e travay pou fer avanse sa bann lobzektif. Resours Gouvernman e osi resours ki i resevwar depi a aletranze i la pou permet nou delivre dapre lo bann target pou pei e merit ganny servi pour en lenpak maksimonm.

Mon'n osi fer rapel bann anplwaye ki finalman se piblik ki mezir nou performans, e ki sa pa depan lo zimaz ki nou kiltive dan medya me i aktyelman depan lo rezilta.

Mon lobzervasyon se ki dan Minister i annan bokou dimoun ki annan abilite e potansyel i la. Me nou bezwen demann nou lekor si nou pe arive servi tou sa bann kapasite e tou sa bann resours pour delivre dan en fason ki serye lo bann responsabilite ki nou manda i demande.

Lo la fason ki nou organiz travay e servi bann resours imen, mon krwar nou kapab fer bokou pli byen. Mon osi krwar ki nou kapab met plis direksyon dan travay, e donn plis latansyon bann aktivite priyoriter pour ki rezilta i kapab arive pli vit.

Legzersis reorganizasyon bann Departman e Lazans anonse par Prezidan Larepublik i en lokazyon pour nou get en pe dan sa bann size.

Alor lo mon kote koman Minis mon pou sezi sa loportinite pour anmenn bann amelyorasyon ki nesaser dan striktir, e osi dan fonksyonnen Minister, pou asire ki nou anmenn nou dimoun pli byen pour sa lot letap nou travay.

Mr Speaker kot i konsern Lagrikiltir, enn bann konplent mazer ki mon'n tande avek fermye se ki servis ki zot gannyen avek bann azan pa dapre ekspektasyon.

Mon pozisyon alors se ki Lazans aprezan Departman i bezwen travay lo kapasite bann travayer, pour ofer servis e osi gidans ki zot bezwen pour zot louvraz. I dan nou plan pour fer formasyon entern pour nou bann zofisye, e nou osi dan diskisyon avek Minister Ledikasyon pour sanz nou lapros pour servi plis fasilite ki egziste lo bann stasyon lagrikiltir.

E osi lekol lagrikiltir pour fer ki nou atir plis zenn ki onivo pou zwenn lagrikiltir, ki ava ogmant kapasite dan Gouvernman me osi dan prodiksyon.

Fasilitasyon bann aktivite bann prodikter espesyalman akse avek later, materyo lo stor ek lenfrastriktir i osi enportan, e tousala mon krwar i kapab ganny fer lo en pli bon nivo.

Nou pe met bann mezir an plas pour adres zot e sa i

enkli konplet bann proze ki'n komanse me ralanti parey *lasemans*, met an plas open *permit* pour lenportasyon pour koup lo retar, met mendev ekstra lo bann *case* later ki pe tarde.

E enn bann lefe ki nou anvi vwar sa lannen par egzanp se en *waiting list* pour later Praslin, La Digue ki desann ziska zero. E sa i en keksoz ki si tou keksoz i al dapre plan, mon krwar sa i posib.

Nou rekonnèt ki konsiltasyon i enportan dan Lagrikiltir e nou pe re demar enteraksyon regilye depi lafen Mars apre bann restriksyon in leve. Minister in kapab trouv en pe resours e pour byento lans konsiltasyon pou reviz sa plan 5an lenvestisman lagrikiltir ki terminen an 2021.

Nou oule ki sa nouvo plan i anglob tou sa bann nouvo target sa Gouvernman e osi enkli devlopman zil elwanye, ki i ava ede pou nou anmenn progre signifikan dan sa sekter.

Kot i konsern Lanvironnman, nou plan se kontinyen avek bann aktivite ki'n deza demare. Me osi met zefor lo bann morso priyorite espesyalman bann program ki konsern salte anliny avek sa lapel Gouvernman pour annan en Sesel ki pli prop.

Sa i konmanse avek lapropte dan vwazinaz, kot nou bezwen devlopman bann servis koleksyon apropiye, entegre bokou plis rekiperyasyon serten kalite salte, me osi anmenn nou zabitan atraver ledikasyon pour relev zot nivo lapropte dan tou lespas piblik.

Mon'n deza diskit avek Departman Lanvironnman bezwen pour reviz e ranforsi program ledikasyon e osi angaz distrik e lezot partner pour fer sa lenpak.

E i annan nouvo program ki an preparasyon e ki pou ganny lanse sa lannen. Laplikasyon Lalwa i en lot febles ki nou pe adrese.

Dan Bidze i annan en pozisyon pour en Direkter pour *Environmental Enforcement* ki nou swete i ava fer bouze laplikasyon lalwa lo teren e sirtou ede pour ki *case* i avar aktyelman ariv devan lakour.

Lanvironnman i en sekter ki ganny bokou akse avek resours an deor pei. Pozisyon ki mon'n met devan bann *staff* se ki nou bezwen stratezik dan nou bann langazman avek bann lorganizasyon etranze, e asire ki sa bann relasyon i anmenn en kontribisyon, sa letan i permet byensir. E ki resours i ganny servi pour adres bann priyorite pei pour ki lefe....

*(interruption)*

### **MR SPEAKER**

Eskiz mwan ...Minis les mwan *pause* en pti kou la....ki problemn?...ou pa pe tann byen?

### **HON SEBASTIEN PILLAY**

Mersi Mr Speaker, Mr Chairman i paret ki bezwen get kalifikasyon, nou pe pran tou le de ansanm oubyen nou pou pran Lagrikiltir avan apre Lanvironnman? Akoz mon pa konnen si Minis ou prezantasyon ki ou pe donn nou la i plito lo Lanvironnman.

Konmsi, mon pa konnen, plito nou pran Lagrikiltir avan *and then* nou pran Lanvironnman. Mon pa konnen, mon krwar sa ki Onorab ti pe dir.

### **MR SPEAKER**

Wi, mon krwar sa i en pwen. Minis nou pe pran Bidze Lagrikiltir, me selman si ou pe kontinyen avek ou prezantasyon lo Lanvironnman mon napa obzeksyon mwan.

Me selman zis note ki nou pe pran Lagrikiltir e apre e aparaman Onorab Georges *correct name is Ministry of Agriculture, Climate Change & Environment*. Dapre PS Thesee.

**HON BERNARD GEORGES**

Wi Mr Speaker, mon toutafe dakor e mon regret lentervansyon ki mon'n fer. Mon ti krwar mon ti'n tann ou dir Lenerzi osi e se sa rezon ki mon'n ... Eskiz mwan pour sa.

**MR SPEAKER**

Wi Minis ki ou propoze? Ou kapab aret lo *Agriculture* e nou a pran Bidze *Agriculture* e ou a fer remark lo *Climate Change & Environment* apre.

**MINISTER FLAVIEN JOUBERT**

Mersi Mr Speaker. Mon lentansyon se pou fer en *statement* en pe zeneral zis pour pas en pti pe lo mon bann lentansyon ki mon oule vin fer dan sa Minister, e apre nou avar al dan bann detay sak Departman ek sak Lazans anmezir nou ale avek Bidze.

**MR SPEAKER**

Mersi. *Ok* e nou a kapab fer sa. E les mwan *welcome* Mrs Elsa Quatre *Senior Accountant* dan Minister Lagrikiltir ki'n fek antre avek nou.

Wi Minis, kontinyen.

**MINISTER FLAVIEN JOUBERT**

Mersi Mr Speaker pour sa sans pour mwan kontinyen. Kot i konsern Lanvironnman nou plan se kontinyen avek

bann aktivite ki'n deza demare me osi met zefor lo bann proze priyorite espesyalman dan program ki konsern salte anliny avek sa lapel Gouvernman pou anmenn en Sesel ki pli prop.

Sa i konmans avek lapropte dan vwazinaz, kot nou bezwen devlop bann servis koleksyon apropiye, entegre pli byen rekiperasyon serten kalite salte, me osi anmenn nou zabitan atraver ledikasyon pour relev zot nivo lapropte dan tou lespas piblik.

Mon'n deza diskit avek Departman Lanvironnman bezwen pour reviz e ranforsi program ledikasyon e osi angaz distrik e lezot partner pour fer en lenpak pour fer sa lenpak e i annan nou program ki an preparasyon e ki pou lanse sa lannen.

E laplikasyon lalwa i en lot febles ki nou pe adrese. Dan Bidze i annan en pozisyon pour en Direkter pour *Environmental Enforcement* ki nou swete, ki i ava fer bouze laplikasyon lalwa lo teren e sirtou ede pour ki *case* i ariv devan lakour.

Lanvironnman i en sekter ki ganny bokou akse avek resours an deor pei. Pozisyon ki mon'n met devan bann *staff* se ki nou bezwen stratezik dan nou bann langazman avek bann lorganizasyon etranze, e asire

ki sa bann relasyon i anmenn en kontribisyon letan i permet.

E ki resours i ganny servi pour adres bann priorite pei pour ki nou pep i war sa diferans. I mon lentansyon pour osi aplik sa model mobilizasyon e zesyon resours ki Lanvironnman pe servi aktyelman dan Lagrikiltir pour anmenn plis kontribisyon dan Lagrikiltir atraver bann resours sorti an deor pei.

Mr Speaker, Lenerzi e Sanzman Klima i 2 size ki tre enportan, akoz zot lenplikasyon pour nou fitir. En prosis pour reviz nou bann langazman lokal in deza konmanse e ki nou pou prezant avek lemonn dan konferans Klima an Ekos tar 2021.

Sa legzersis i en loportinite pou Sesel vin avek bann target tre anbisye lo adaptasyon avek sanzman klima e lenerzi pour ki nou parol i marye avek non aksyon.

I kler ki nou bezwen fer plis lo bann size parey proteksyon lakot, me i osi ler pou nou met plis lanfaz lo bann landrwa ki pa'nn ase ganny latansyon parey transportasyon, batiman e konstruksyon, lenpak klima lo lagrikiltir e osi tre enportan performans enerjetik Gouvernman.

Finalman Gouvernman

in donn direksyon pour diversifye sours lenerzi e entrodwir plis renouvlab. Savedir nou bezwen sorti kot nou ete ozordi pour nou al ver 15poursan e plis.

*PUC* i en partner enportan dan lenerzi Sesel e i kle dan sa demars e mon latas se pour asire ki bann lanbisyon pour lenerzi i mars akote sa bezwen, pour asir bann kondisyon finansyel e kapasite teknik sa konpanyen.

Mr Speaker mon pou aret la e nou a var kontinyen avek deba lo Bidze pour Departman Lagrikiltir. Mersi bokou pour sa loportinite koz devan Lasanble ozordi. Mersi.

### **MR SPEAKER**

Mersi Minis. Bann Manm a note ki nou lo Bidze pour Departman Lagrikiltir. E Minis ek son bann zofisye osi i a note osi si i annan kekyon ki zot oule *postpone* ziskan ki 2enm peryod. Nou a kapab fer li.

Alor mon repas lo....wi Onorab William. Mon zis pas lo mon lalis dimoun ki'n lev lanmen pou verifye. Mon annan Onorab Pillay, Lemiel, Gill, Gabriel, Uranie, Ghislain, Loizeau, Labonte, Mondon, Woodcock, Hoareau, Roucou, William e Henrie. Korek?

Wi, *ok*, tenir en pti moman. Byen, 3 nouvo Manm,

4 nouvo Manm. Mersi. Bon nou a konmanse avek kestasyon e komantr sorti kot Manm, i touzour difisil, mon a komans avek Onorab Roucou.

### **HON MICHEL ROUCOU**

Bonzour Mr Chair. Mersi. Bonzour *panel*, tou bann Manm Onorab e tou dimoun ki dan lakour.

Minis bonzour, mon kestasyon i koumsa. Eski zot annan okenn plan pour anmas sa delo sal ki sorti dan Bazar? Sa i sa delo pwason li menm li.

Aprè mon 2enm kestasyon Minis, mon krwar ou'n koz en pti pe lo la, i annan sa Program *Lasemans*, si mon pa tronpe i pronons koumsa menm *-Lasemans*.

Ti annan en group zenn en 2019 mon krwar ki form par dan sa program, ti annan 50 zot aprè mon krwar ti desann pou vin 18. Zot pa ankor tann naryen lo la, zot ti a voudre konnen ki pe pase avek sa program e si i ankor dan zot program? Mersi.

### **MR SPEAKER**

Kestyon ki konsern delo dan bazar eski i konsern Lagrikiltir oubyen Lanvironnman plito? Minis ou pou bezwen regarde anmezir nou ale lekel kestasyon ki ou adrese la a sa pwen lo Lagrikiltir, oubyen lekel ki nou

kapab anvoy pour Lanvironnman. Minis.

### **MINISTER FLAVIEN JOUBERT**

Mersi Mr Speaker sa kestasyon ki konsern delo dan Bazar i ganny administre par Lazans e mon krwar i pour bann zofisye Lazans pour kapab donn en bon leksplikasyon pli tar.

Me selman ki mon kapab dir deza se ki nou bezwen reget Bazar byen. Nou bezwen aksepte ki Bazar Victoria mannyer i ete la ozordi nou pe zet delo pwason dan rigol pa dan en *drain*, pa dan en *sewer*, i pa dan en sistenm tretman e i pe zet dan en *drain* e nou bezwen fer en bon refleksyon lo la.

Eski nou bezwen kontinyen avek sa kalite *practice*, ouswa eski nou bezwen aranz nou an gro lo kote nou vann pwason dan lavil Victoria pour ki nou pa ganny sa bann problem loder ek delo disan partou.

Me selman Lazans i a kapab reponn pli direk lo zot plan pour travay lo sa size dan Bazar. Mersi.

Pour *Lasemans* mon pou demann *PS* Moustache pou reponn. Mersi.

### **MR SPEAKER**

Mersi. *PS*.



**PS ANTOINE-MARIE MOUSTACHE**

Mersi Onorab Chair. Pou *Lasemans*, sa Program *Lasemans* ti annan en total 52 aplikan, me enn finalman pa ti vini ler nou ti fer entervyou.

Nou ti fer en *interview* avek en *panel* ti an plas e ti annan 32 ki ti'n fer aplikasyon pour prodiksyon fri e legim, 13 pour prodiksyon koson e 6 pour prodiksyon poul lavyann.

Dan premye entans 12 in kalifye anba prodiksyon fri e legim, 4 in kalifye anba prodiksyon koson e 4 egalman in kalifye anba prodiksyon lavyann poul.

Dan sa 12 ki'n kalifye pour prodiksyon fri e legim nou'n deza etabli, anfen nou dan proses pou etabli detrwa ladan parski zot a diferan nivo, detrwa ladan lo later separe, endividi setadir.

I annan apepre donk 8 ki nou pour etabli lo en morso later ki retrouv la kot ti annan ansyen *Hydroponic*, Au Cap. *Hydroponic* ki dan sa letan ti anba *Seychelles Marketing Board*. Vwala, sa se bann premye letap.

Dan en 2enm entans nou pou antretenir bann ki'n kalifye pour prodiksyon *pork* e egalman bann ki'n kalifye pour prodiksyon poul. Demars i ankour la. Travay ki nou ti panse nou bezwen fer nou realize pou dir i demann

bokou plis zefor, bokou plis lenvestisman e mon krwar dan sa moman ki nou ete i esansyel ki nou konpran ki resours i a nou dispozisyon pou kapab met a dispozisyon tou sa bann ki'n kalifye dan sa premye enstan ke se swa lo later pour kiltive, ke se swa lo later kot zot pou fer elevaz. Mersi Mr Chair.

**MR SPEAKER**

Mersi. Onorab Lemiel.

**HON SYLVANNE LEMIEL**

Mersi Mr Chair. Bonzour Minis avek ou delegasyon.

Mon ti a kontan konnen petet Departman Lagrikiltir pandan sa lannen ki pe vini la, petet ki bann sipor ki zot pe donn bann fermye ki pe entrodwi bann nouvo teknolozi lo zot laferm. I annan gro ki pe fer sa apre i annan bann ptipti ki pe anvi fer li. Ki bann sipor ki zot pe donner a sa bann dimoun.

Apre Minis, mon pa konnen si i pou tonm la oubyen si i pou tonm SAA.

I annan bann seri vizit ki ou pe fer kot bann laferm Minister. I paret mwan sa ki mon pe ganny en konpran i annan bann proze *photovoltaic* ki sipoze pe al ganny enstale lo bann laferm, ki mwan mon pa'n vremen ganny *involve*.

Mon pa'n ganny bokou detay lo la parkont mon krwar

i annan distrik ki bann *MNA* ki'n ganny envite dan sa bann vizit.

Petet mon ti a kontan ganny en pti pe leksplikasyon lo kote sa proze li menm ki i *entail*, e lekel ki pe *fund pour* sa bann proze e lekel bann laferm dan mon distrik ki pou pe benefisyè? Mersi.

### **MR SPEAKER**

Mersi Onorab. Minis wi.

### **MINISTER FLAVIEN JOUBERT**

Mersi Mr Speaker. Lafason ki nou pe get nouvo teknolozi dan lagrikiltir. Mwan letan mon'n zwenn bann lalis priyoriter dan lagrikiltir, ki mon'n vwar se ki nou annan en kantite dimoun ki ganny mete dan en laliny.

En sel lake, en sel *queue*, ki fer ki tou dimoun avek ki nide tousala i ganny mete dan en menm laliny e apre letan ou tour i arive ou ganny akse par egzanp avek later ek lezot fasilite par egzanp *loan* eksetera.

Me lapros ki nou pe pran se separ sa bann dimoun dapre sa ki zot pe vin fer. Alor si nou annan en pti group ki e nou konnen i annan en ptipti group me selman i ase enportan.

Si nou annan en pti group ki oule fer teknolozi avanse oubyen bann teknolozi

ki pa pe ganny aplike ozordi dan lagrikiltir zot osi zot bezwen ganny sans pase e aplik zot lekor. Aktyelman la mon konnen i annan 2 me i kapab annan plis.

E nou, nou lapros se ouver laport pou bann ki osi pe vin ek teknolozi diferan e pa zis met zot dan menm group avek lezot fermye, e alor nou bezwen separ nou bann dimoun an bann novis, bann ki ek bann nouvo teknolozi, bann dimoun ki oule fer serten kalite *crop*.

E apre sey gete si nou kapab akseler akse avek resours pou zot kapab demare.

Kot i konsern vizit laferm *photovoltaic*, wi nou ti fer vizit sirtou Anse Royale, me i pa ti en vizit ki ti'n ganny planifye avek okenn *MNA* sa letan.

I ti plito en vizit teknik kot nou ti pe get fezabilite pour lentegrasyon *photovoltaic* dan lagrikiltir, i ankor *still* lo en staz fezabilite avek sa konpanyen ki apel *MASDAR* ki parey ou konnen in deza enplimant serten proze isi, i sorti *UAE*.

E nou pe demar bann diferan nide avek zot gete ki manner nou kap anmenn da laspe *photovoltaic* pour koup kou lenerzi dan lagrikiltir. E zot annan bann model ki zot oule travay ek nou lo la.

Nou pa ankor ni koz lo finansman e nou pa'n kor koz lo en program konplet me selman definitivman i annan gran potansyel ki si nou pou fer bann proze parey, bann laferm ki dan ou distrik pou ganny enplike.

E letan nou devlop proze byensir nou pou enplik Manm Lasanble Nasyonal. Byensir sa i en keksoz normal e nou ava fer kontak avek ou e nou a les ou konnen anmezir keksoz i devlope kote nou ete lo sa size. Mersi.

### **MR SPEAKER**

Mersi Minis. Onorab Hoareau.

### **HON JOHN HOAREAU**

Mersi Mr Chair. Mr Chair mon premye kestyon i baze lo later lagrikiltir.

Mon ti a kontan konnen konbyen *plot* ki Departman Lagrikiltir i annan ase moman *available* pou bann fermye? E konbyen morso i planifye pou distribye la, dan sa lannen ki pe vini la. *I mean* dan sa lannen ki nou ladan.

2enm kestyon mon ti a kontan konnen dan sa legzersis pou rebran later lagrikiltir avek bann dimoun ki'n pa'n devlope, ki zistans zot in arive lo la? E osi si zot annan lentere pour entrodwir pour premye fwa Sesel en *agricultural bank* ki a donn, petet *facilitate* sa, oubyen pa

menm entrodwir me *facilitate* sa ki i ava kapab donn fermye larzan pour fer zot devlopman a en to lentere vremen ba.

Mon koz parey 1.5poursan, en 2poursan. Akoz bokou fermye i vwar ki ase moman sa bann *loan* ki zot pe gannyen i pa a en to favorab pour zot kapab travay avek.

E 3enm kestyon i lo zot *office building rent* ki anba *programme 1* ki'n mont par 1.596, milyon *sorry*, mon ti avar kontan konnen akoz? Mersi.

### **MR SPEAKER**

Mersi Onorab. Minis.

### **MINISTER FLAVIEN JOUBERT**

Mersi Mr Speaker. Lenformasyon lo kantite kare later ki *available*, sa ki mon'n gannyen se ki i annan 37 kare bann ki'n rebran e bann ki kapab ganny *allocate* ozordi.

Me mon kapab anvoy kot Onorab ankor plizyer lezot lenformasyon lo kantite later ki potansyelman annan dan sa lannen.

Akoz i annan ankor en bon pe, ki nou pe fer prosedir pour rebran e sa i pou dekoul dan lot morso kestyon ki kantite progre nou'n fer pour rebran bann later ki dimoun pa pe servi.

Nou'n fer en bon pe *case* selman mon pa pou kapab

donn ou en *figure* la ozordi. Me selman mwan depi ler mon'n vin la dan sa dernyen 3mwan, mon'n siny en bon pe *file* kot later in ganny rebran.

Nou annan plizyer ka, mon kapab nonm plizyer ka, par egzanp si mon rapel byen Praslin, Praslin i annan 3 ka ki aktyelman nou pe fer. Mahe osi nou annan plizyer ka ki nou pe tire e nou pe met nouvo dimoun lo la espesyalman bann zenn.

Me selman mon kapab anvoy ou bann detay egzakt e si ou enterese konnen osi dan ou rezyon lekel ki pe ganny afekte.

Kot i konsern en labank lagrikiltir, resaman bann fasilite *loan* avek *DBS* e sa se *ADF (Agricultural Development Fund)* in ganny ogmante pour sa maksimonm *loan* i ariv R5milyon. E sa ti ganny sinyen 2 semenn pase e son lentere i 2.5 avek 5poursan, 2.5 ziska R3milyon.

E ant R3 ek R5milyon i 5poursan. E sa in ganny fer pour permet fermye ki oule investir dan en fason pli gro pour zot kapab ganny akse avek finansman ki pa tro o konpare avek sa ki bann labank pe ofer.

Byensir dan le fitir i kapab vin en propozisyon Gouvernman pou kapab konsidere, pour donn en li

fasilite e kot i annan en lentere bokou pli ba.

me aktyelman apre sa nouvo laranzman omwen bann fermye pour kapab ganny akse avek plis finans.

Akoz nou konnen pour dir en lenvestisman konmela lagrikiltir bann *loan* ki par anba R1milyon i vremen difisil pour en dimoun, si i oule fer en proze ki ase signifikan.

Alor sa in ganny sanze pour fer ki bann fermye i kapab vremen ganny akse avek en bon sours finansman.

Kot i konsern *rent* mon pou demann *PS Moustache* pour klarifye. Mersi

### **MR SPEAKER**

Mersi *PS*?

### **PS ANTOINE-MARIE MOUSTACHE**

Onorab Chair Mersi. Lo kot i konsern *rent* lo later lagrikiltir, anfen lo batiman lagrikiltir i enportan pour note ki lagrikiltir i annan en long asosyasyon avek lapes.

E finalman sa 2 Departman in divorce efektivman lagrikiltir in bezwen ale. E in al dan en nouvo batiman, donk letan ou antre dan en nouvo batiman ou bezwen esansyelman pey ou lwaye.

E zisteman e tou son bann kou ki vin avek,

elektrisite delo, donk se sa ki ou vwar i annan sa logmantasyon. Mersi Chair.

**MR SPEAKER**

Mersi. Onorab Loze?

**HON JOHAN LOZE**

Mersi Mr Speaker. Mr Speaker, Depi 2enm Ger Mondyal lemond pa'n rankontre sa ki'n ganny term koman en *global catastrophic event*. Ki pour premyer fwa depi dan bann lannen '40 nou'n vwar li komanse an 2020 avek *COVID-19*.

Mon kestyon pour Minister Lagrikiltir, ki resours ki zot santi zot pou bezwen, ki sipor zot pour bezwen atraver Bidze pour zot nobou konmans en plan sekirite alimanter, pratik, *workable*, *actionable on the ground* pour Sesel?

E osi si zot santi ki en tel keksoz i pou menm posibilite akoz la mon krwar nou tou in ganny lesan ek *COVID-19* e ki mannyer nou prepar nou pour le fitir? Mersi Mr Speaker.

**MR SPEAKER**

Mersi Onorab. Minis?

**MINISTER FLAVIEN JOUBERT**

Mersi Mr Speaker. Mersi Onorab pour sa kestyon. Ki resours ki nou krwar nou pou bezwen pou kapab lans en

plan ki vremen anmenn sa sekirite alimanter. Mon krwar i annan plizyer lopinyon lo sekirite alimanter si nou bezwen 100poursan sa ki nou manze.

E lamazorite dimoun i dir nou non, me selman nou kapab prodwir en bon sa ki nou manze e asire letan i annan bann sekous an deor nou pa ganny tape sa kantite.

Resours ki mon krwar dan mon lespri ki nou pou bezwen pour nou vremen relev lagrikiltir dan pei, mon krwar an premye se ki nou bezwen resours imen.

Ozordi nou annan en kantite travayer etranze e i mank en bon pe bann mendev ki mank abilite pou travay dan lagrikiltir.

Alor nou bezwen form dimoun, nou bezwen fer sir ki nou annan bann bon dimoun ki konnen ki zot pe fer, ki kapab lans dan bann linisyativ, pour vremen kapab siport en laferm. E fer ki sa laferm i donn en rannman ki lo en o nivo.

Nou bezwen osi annan bann sipor parey par egzanp pour nou bann dimoun kapab travay ek zot bann prodwi lagrikiltir;- par egzanp dan en dernyen sesyon ki mon ti vin isi, nou ti pe koz lo stokaz e transformasyon.

Nou pa annan ase stokaz ek transformasyon dan

lagrikiltir, ki fer ki petet sa ki nou pe prodwir pa pe byen entegre avek konsonmater.

Alor nou bezwen kapab fer ki lagrikiltir i lo *market*, e non pa ki zis lagrikiltir i ganny prodwir fri e legim i ganny plase bann pti bazar partou. Alor nou bezwen fer sir ki i annan sa lentegrasyon.

E nou vwar sa pe arive par egzanp dan lapès, kot ou annan en kantite bann prodwir lapès ozordi pe ganny transformen, ki pe ganny vann dan laboutik.

E mon krwar i annan sa bout kot nou bezwen fer sir ki sa bout transformasyon, stokaz ek tou si annan pou fer apre laferm, i vreman marse. Byensir resours pour bann ferme zot menm.

Nou bezwen kapab trouv diferan resours e nou bezwen kapab ed zot pour zot kapab servi sa bann resours. E la ankor nou pou retourn lo kapasite nou bann dimoun pour zot *access* bann resours.

Pa tou ki kapab servi da bann resours, akoz zot annan limitasyon dan abilite. Alor nou bezwen, mon krwar Onorab Hoareau in lev en pwen konsernan en labank lagrikiltir, ouswa en fasilite finansyel pour ed zot pour kapab vreman fer bouze bann keksoz.

Me anmennen nou bezwen mazin lenfrastruktir, in

annan en bon pe ka kot nou'n napa ase lenfrastruktir. E nou bezwen kapab travay ek nou bann dimoun pour nou konnen vreman zot bann bezwen par egzanp semen, delo sirtou.

E osi nou annan sa *size access* avek later, ki nou konnen i limite, me nou bezwen devlop bann teknik pour nou kapab servi bann later ki nou annan.

Alor i annan plizyer keksoz. E pa tou sa resours ki pour vin zis pour Departman Lagrikiltir ouswa Minister Lagrikiltir.

Minister lagrikiltir i reste koman en fasilitater, i bezwen annan dimoun ki annan abilite i kapab dirize e ede e devlop bann program avek nou bann dimoun.

Me en bon resours fodre i laba deor parmi sa bann dimoun ki pe prodwir e ki pe vreman anmenn sa rannman dan pei. Alor nou bezwen kapab vwar en sityasyon kot resours i pa zis en keksoz ki Gouvernman i donnen anba Bidze.

Me nou bezwen travay avek tou bann parti dan pei pour ki zot kapab vreman apiy Lagrikiltir dapre zot manda ki zot annan. Mersi Mr Speaker.

### **MR SPEAKER**

Mersi. Wi Onorab ou kapab klarifye.

**HON JOHAN LOZE**

Minis, zis en pti pwen. Eski ou santi ki fezab, ki i *attainable* sekirite alimanter? *Be it* 1poursantaz pa ni menm 100poursan? Mersi.

**MR SPEAKER**

Mersi. Minis.

**MINISTER FLAVIEN JOUBERT**

Mersi Onorab. Mersi Mr Speaker. Mon krwar i posib pou nou mont en pe plis. E mon krwar, par egzant letan ou pe get *livestock*, letan nou get analiz ki bann dimoun in fer i posib pour nou mont en bon pe plis.

E pour nou kapab pran en bon pe sa *market* ki i annan pour prodwir *livestock* dan pei. E sa i kler sa. Pour *crop* i annan posibilite pour nou agrandi ankor kantite marse ki bann dimoun pe okipe, me selman parey mon'n dir i annan plizyer kontrent ki nou bezwen fer fas avek.

E si nou kontinyen fer lagrikiltir parey nou pe fer, nou pou ariv en zistans, me nou pour bezwen al lo sa lot letap, kot nou konnen poudir letan en keksoz i ganny prodwir ki i kontinyen egziste dan en lot laform;- ki pe ganny servi partou dan lekonomi.

E non pa zis en prodwir brit parey nou dir. Alor mon

krwar i posib mwan. Mon krwar i posib pour nou monte *livestock* definitivman, e mon krwar i posib lo kote *crop*.

E mon krwar i posib pour nou kapab entrodwir serten nouvo prodwir, serten nouvo *crop*, nouvo kalite prodwir ki pa egziste lo marse, ouswa ki pe kouver zis par lenportasyon aktyelman. Mersi.

**MR SPEAKER**

Mersi. Onorab Woodcock.

**HON WAVEL WOODCOCK**

Mersi Mr Speaker. Mr Speaker ozordi nou prodiksyon lavyann lokal, i vremen, i vremen ba. Annefe lavyann koson si mon pa tronpe i *around* 20poursan, poul i 30poursan.

Me avan Koudeta prodiksyon lavyann ti bokou pli o, me apre Koudeta ti annan bann konpanyen ki ti ganny kriye parey *SEYCOM* anba *SMB*.

Ou'n war *SADECO* ki tou sa la in ede detrir nou lendistri ki ozordi in fer ki prodiksyon in ariv vremen, vremen ba Sesel.

E lenformasyon ki mon ti gannyen mon rapel dan 6enm Lasanble, se ki ozordi menm si ou pe get lo zil pros prodiksyon bann later lagrikiltir, apepre 80poursan i *less than*, i *less* konmsi i pa pe ganny servi to

*the maximum* ki ozordi Minister I vwar ou i bezwen rebran sa bann later pou refer distribisyon.

E mon konnen poudir Praslin i annan en kantite later ki pa pe ganny servi *to the maximum*. I annan ki pe ganny servi *up to 20percent, 30percent*. Alor mon kestyon i vi ki ozordi Praslin, e mon mazine La Digue osi nou annan en *long list of* dimoun ki pe espere pou ganny en bout later.

Ki bann demars ki zot pe la pour rebran sa bann later ki en bann in gannyen, sa ki'n fer lotel lo la, sa ki zis pe fer diverti kontan lo la pour rebran sa bann later pour donn bann dimoun ki vreman anvi rantre a lendistri dan lagrikiltir?

Konmsi nou a fer ki nou avar ede relans sa lekonomi ki Gouvernman avan pandan 43an zot in ede detrir e anmenn li lo son zenou.

Mon 2enm kestyon, i kot i konsern sa *levy*. I annan en *levy* ki lannen pase ki zot ti mete lo lavyann ... in pa'n mete zot ti ogmante. Sa *levy* ti R5 pour lavyann poul pour monte pour vin R7 e lavyann koson ti R5 pou monte pour vin R8.13.

E tou dimoun deor i konnen le vre rezon aköz sa *levy* ti ganny mete pour plizoumwèn protez lentere en

dimoun ki ti dan ou Minister dan leparse, aköz i annan lentere dan laferm.

Alor le kestyon ki mon pe demande, an vi sityasyon COVID-19 ozordi, kou lavyann bann keksoz pe monte, aköz devalyasyon nou Roupi, eski zot pou *maintain* sa *levy* ki pe fer kou lavyann monte ouswa zot pou redwir sa *levy*?

Finalman i annan sa *Live Trust Fund, Livestock Trust Fund* apre zot annan sa *Agricultural Development Fund*, ki sirtou sa *Livestock Trust Fund* ki i sanmenm sa larzan ki ganny servi pour finans bann ferme atraver bann *loans*.

I annan en Polisi Gouvernman aktyel la ki lakantite larzan ki zot pe donner pour *loan* ki si i ariv, i annan en *ceiling*, si i ariv R5milyon zot bezwen rod permisyon Minister Finans pour zot *disburse* sa larzan.

Alor eski zot pour reviz en pe lakantite larzan ki bann *loans* ki zot pou donner? Aköz mon krwar mon'n tann ou Minis menm ou'n dir ki ennler bann proze ki bann dimoun i annan;- parey mon konn Mr Morel Praslin ki bezwen R5milyon pour li fer son labatwar lavyann poul.

Ki ankor pe esper son larzan *by the way*. E alor eski zot pou rekonsider sa kantite larzan ki zot pou donner



ouswa zot pou ogmant li?  
Mersi bokou.

**MR SPEAKER**

Mersi Onorab. Minis?

**MINISTER FLAVIEN  
JOUBERT**

Mersi Mr Speaker. Mersi Onorab pou ou kestyon. Kot i konsern prodiksyon lavyann ozordi, *statistic* ki mon annan se ki prodiksyon poul i 30poursan e prodiksyon *pork* i 49poursan sa ki nou pe konsonmen. Me mon krwar prensip ou kestyon i plito lo later Praslin ek La Digue en *long waiting list*.

Aktyelman Praslin apepre 10 dimoun ki pe espere e La Digue i par anba 5. E se pour sa rezon dan mon *statement* pli boner mon ti dir poudir nou krwar nou kapab elimin sa lalis an 2021.

E sa nou lentansyon. E kot i konsern *levy* lo lavyann enporte mon ava demann *PS Moustache* pou reponn. Mersi.

**PS ANTOINE-MARIE  
MOUSTACHE**

Mersi Onorab Chair. Onorab, sa bann sif ki ou'n mansyonnen taler lo *levy*, se vremen ogmantasyon ki'n arive lo *levy* ki nou enpoze lo enportasyon poul e *pork*. Sa sanzman ki'n annan i lo *pork* enporte avek poul enporte.

Kot i konsern prodiksyon

nasyonal sa *levy* pa'n sanze. Donk *levy* ki ti la ler sa plan ti ganny lanse an 2018, i ensi i R2.30 par kilo poul ki en prodikter i prodwir e R6.50 par kilo *pork* ki sa prodikter i prodwir.

Sa 2 sif, sa 2 sibvansyon annefe nou apel zot, se in la depi konmansman e dayer an desanm nou ti renouvle li ziska Zen sa lannen. Setadir Zen 2021 apre ki nou a fer konsiltasyon, ariv avek en lot pozisyon si nesaser.

Kot i konsern donk *LTF*: *LTF* i ankor pe donn sibvansyon lo manze poul, par egzanp lo transportasyon ant manze ant Lasose Mahe, Praslin e La Digue.

Kot i konsern *DBS* taler petet ou ti atann petet ki Minis ti mansyonnen ki annan metenan en nouvo lagreman ki'n ganny sinyen par 3 partner *DBS*.

Donk Lagrikiltir avek Minister Finans pou ki i annan en nouvo kategorizasyon *loan* ki bann pti ferme i gannyen.

Pli o metnan ki ferme i kapab gannyen se R5milyon a 5poursan lentere, me an tou ka sa i nouvo e nou'n fer li dan konteks ki mentnan envestisman dan Lagrikiltir I vin ankor pli ser. E donk nou pou bezwen kapab fasilite nou dimoun. Mersi Onorab Chair.

**MR SPEAKER**

Oule klarifikasyon Onorab?  
Wi?

**HON WAVEL WOODCOCK**

Wi Minis avek sa bann fon la ki zot pe servi pour ed bann ferme, mon pa war dan le pase Gouvernman in met lanfaz pour ankouraz *Agro Processing* atraver sa *Agricultural Development Fund* e osi avek sa *Livestock Trust Fund*.

Akoz ozordi ki ou war bann pei bokou bann prodwi ki nou pe aste lokalman, i bann prodwi ki'n ganny *package* deor e i vin isi.

Parey nou, nou pa pe war nou Sesel, nou pe fer sa bann koupe, investir dan *agro processing* parey pou *package* nou bann legim ouswa *why not package* bouden.

Be selman nou bezwen fer sir ki sa bann larzan pa ganny vole, sa bann larzan i ganny servi byen pour nou pei.

Alor mon pe demande eski nouvo Minister, nouvo Gouvernman pou met lanfaz dan *agro processing* ki nou kapab benefisye. Nou a ganny en pe sa *value added*? Mersi.

**MR SPEAKER**

Mersi. Minis oubyen PS?

**MINISTER FLAVIEN JOUBERT**

Mersi Mr Speaker. Mersi Onorab pou sa klarifikasyon.

Mon krwar pli boner mon tin mansyonnen ki *agro processing* i enn bann keksoz ki letan nou'n gete nou'n koz ek bann diferan dimoun nou vwar ki i en landrwa ki vreman enportan pou ed nou sekter lagrikiltir.

Me i osi en landrwa letan ou reflesir byen lo lasenn prodiksyon i en landrwa kot sa dimoun ki prodwir i kapab tir en benefis. Akoz vann en prodwir ki ankor ... sorti lo laferm direk, pa toultan ki ou fer en bon rannman.

Me *process* e vann avek bann konsonmater atraver par egzanp magazen i sanz ou benefis ki ou gannyen. E alor mon krwar i keksoz ki nou bezwen vreman travay en bon pe lo la. E donn sipor nou bann dimoun ki ti a kontan fer li pou ki nou vreman zot vwar benefis.

E aköz lagrikiltir nou bezwen rapel se ki pou en dimoun reste ladan, fodre i vwar en benefis. Fodre i pe tir en benefis e santi ki i vo lapenn son letan dan lagrikiltir.

E non pa en keksoz kot i pe fer en pert toultan. E se sa enn bann keksoz ki'n afekte en bon pe bann dimoun. Zot in dan lagrikiltir en kantite lannen me ou vwar zot benefis ki zot pe tire dan sa travay. Mersi.

**MR SPEAKER**

Mersi. Onorab Aglae?

**HON EGBERT AGLAE**

Mersi Minis. Mr Speaker. Minis bonzour ek delegasyon. Premye size ki mon anvi touse Minis, mon oule konnen ki direksyon ou Departman kot i konsern sa plan konpreansiv, ki en ta travay in ganny fer lo la. In menm ganny prezant avek 6enm Lasanble petet si ou ti a eksplik nou si i pou annan bann sanzman mazer lo la?

Minis antretan ki *PS* Finans i la osi lo size taksasyon. Gouvernman in pronons son lekor ki tou biznes i bezwen pey *tax*.

E fermye osi zot konsider li konman biznes, ki form taksasyon zot pe mazin vin avek kot i konsern nou bann fermye la, ki nou dan bann sirtou nou dan bann letan difikilte?

E dernyen Minis, lo size *land use ok*, lo later lagrikiltir. Minis petet osi i bon eksplike ki i pa sitan senp pou zis *repossess* en later lagrikiltir.

Akoz ler en dimoun in antre lo la, i annan en lagreman, i annan en lenvestisman ki i fer lo la, e Gouvernman osi pou annan en *liaibility* kot i konsern konpansasyon.

Baze lo sa Minis mon ti a kontan demann ou

premyerman lo nivo lo kote later li menm, vi ki i annan en lager ant demann pour later lagrikiltir ek en lager ant demann pour later rezidansyel, komersyal atraver *MIHLT*, ki mannyer zot pe antre ant sa balans pou protez sa (ki mannyer mon kapab dir sa) sa ki sa later lagrikiltir ki deza la sa kantite, pour fer sir ki i pa ganny pran pou al fer lezot devlopman ki zot pa antisipe lo la? Mersi.

**MR SPEAKER**

Mersi Onorab. Minis?

**MINISTER FLAVIEN JOUBERT**

Mersi Mr Speaker. Mon pou pas serten morso sa kestyon *from* Onorab Aglae avek lezot dimoun *panel*.

Me kot i konsern plan konpreansiv Onorab, ti annan en plan ki ti ganny fer avek an konsiltasyon avek tou dimoun fermye.

Menm ti annan enplikasyon lorganizasyon enternasyonal mon krwar *FAO* 2015, e sa plan i sipoze ale ziska 2021. Apre sa, mon krwar ti annan parey en plan aksyon ki ti vini and 2018 ki ti tir serten konponan ladan.

Me mon lentansyon parey mon'n anonse pli boner, se e mon'n trouv en sours finansman pou nou fer sa, se fer en revi konplet sa plan, e

sirtou la a sa pwen la met bann nouvo eleman ki nou krwar nou tou nou bezwen antre ladan, pou nou fer lagrikiltir devlope dan Sesel.

Savedir par egzanp nou'n koz lo *agro processing* koman en keksoz ki nou bezwen travay en pe for lo la. Nou bezwen fer sir ki *agro processing* i antre dan nou plan e ki i form parti nou bann lanfaz ki nou mete dan le fitir.

Nou'n koz lo zil elwanye, pour le moman nou annan apepre 520 mon krwar ektar later, ki la ki kapab ganny servi pour lagrikiltir.

Me si nou azout zil elwanye nou pe apros 900 e posibleman plis. Alor, i bon ki nou met li dan plan. E nou konmans fer sir ki nou pe planifye tou ansanm pou ki nou kapab ganny prodiksyon lo tou sa sirfas.

Alor sa plan konpreansiv mon latansyon se 2021 fer son revi, fer sa bann konsiltasyon, anmenn bann *input* tou nou bann dimoun, nou bann lasosyasyon fermye, menm bann dimoun Lasanble Nasyonal.

Tou bann dimoun ki annan lentere dan pei e vin avek en nouvo plan ki kouver maksimonm tou bann zefor, ki nou bezwen fer lo kote lagrikiltir. Mon pou pas sa size taksasyon avek *PS Thesee*.

Me mon ti a voudre osi

koz lo sa dernyen pwen ki ou'n dir, kot i konsern demann pou *versus* rezidansyel, demann pour lagrikiltir *versus* rezidansyel dan pei.

Enn bann keksoz ki mon fer resaman, mon'n fer en demann avek Minister ki responsab Later, pour transfer avek Lagrikiltir tou sa bann later ki'n ganny idantifye pour lagrikiltir.

Akoz mon'n vwar poudir ki annan serten ka kot i annan serten dimoun ki'n ganny *lease*, me *lease* pa avek nou, transfer tou sa bann dimoun, e nou bezwen vitman kapab vwar tou later ki anba lagrikiltir.

E osi nou bezwen travay avek zot pou fer sir ki bann devlopman lafason ki ganny fer nou napa sa konfli. Akoz nou'n vwar serten ka kot i annan konfli e ki *land use* pa pe vremen pran kont sa bann keksoz e ki Lagrikiltir pe ganny tire.

E mon pozisyon menm si annan serten dimoun ki'n eksprim serten...petet zot en pe enkyet, mwan mon pozisyon se ki si Lagrikiltir i annan son drwa lezitim pour li la. Se Lagrikiltir ki annan son drwa lezitim pou li la. I pa en kestyon tir en lentere lanvironnman ki mon pou pran sa zentere.

Si Lagrikiltir i son drwa se prezan lo en bout later pou

li fer prodiksyon, *then* li ki devret ganny premye priyorite.

E kot i konsern *liability and compensation*. Yer menm, pa yer, Mardi *sorry*, nou ti fer en diskisyon avek *Attorney General* lo plizyer size konsernan Lagrikiltir, e nou'n koz osi lo sa size *liability and compensation*. I en keksoz ki pou bezwen vini, letan ou pou fer ... retir bann *lease* i pou annan bann konpansasyon ki pou antre.

Sa dimoun i fer son lenvestisman, lapros se ki ou donn li son notis, ou enform li ki ou lentansyon pour repran sa later avek li. Me osi ou bezwen kapab ganny en koze avek li lo son lenvestisman.

E osi fer en evalyasyon lo sa lenvestisman, pou konnen ki ou pou fer avek e ki konpansasyon sa dimoun i merit gannyen. Nou pa pou kapab separ sa de, divors sa de.

Si nou pe pran later i pou annan konpansasyon. Nou bezwen fer fas avek konpansasyon. Me, i en kestyon ki kantite e ki fason nou fer li. So, i en keksoz ki nou bezwen *deal* avek letan nou pe repran later. Mersi Onorab. Mon ava demann *PS Thesee* pou koz lo sa size taksasyon pou fermye.

### **MR SPEAKER**

Mersi Minis. Wi *PS*.

### **PS DAMIEN THESEE**

Mersi Mr Chair. Parey nou konnen nou *current* rezim tax partikilyerman *business tax* i *all over the place*, akoz i annan diferan rates ki *apply* pour diferan sekter.

E sa li menm i anmenn serten enbalans e serten lenzistis dan fason ou pe takse ou bann diferan lantrepriz. E ek bann revu ki nou'n fer, sizesyon ki nou'n met devan se ki nou bezwen annan rezim ki *broad*.

Savedir nou anmenn tou dimoun ansanm, donn zot en *rate* ki *apply* lo tou sekter. E sa pou nou i sipoze osi enkli pour lagrikiltir.

Me parkont an vi bann defi ki annan dan sa sekter, nou ti met *proposal* ki pou en peryod letan parey Prezidan in anonse pour 3an sa sekter pou ganny *exempt* avek *business tax*.

E apre 3an la i ava fer en revu pou gete si sityasyon in amelyore ki zot kapab retourn lo rezim. E petet si 3an pa ase la petet i ava annan *extension*. So, pou annan en revu ki pou ganny fer.

So pou nou lo kote Minister Finans e *even* Reveni Konmisyon Sesel, nou krwar ki tou lantrepriz i bezwen ganny takse *even* Lagrikiltir.

Akoz nou anvi ki lagrikiltir i ganny devlope, i ganny vwar koman en biznes, en fason ki ou fer *income* ki ou pe fer profi *out of it*.

Pa kontinyen avek petet sa ki nou apel *subsistence farming*, kot ou zis petet en endividi prodwir zis pou ou viv. So, nou bezwen kapab develop sa sekter pou li kapab ganny son maksimonm *out of it*.

E ler ou ganny sa *out of it*, atraver sipor, akoz i pou annan bokou sipor ki pou ganny donnen ki nou apel bann *cost-based assistance*. Savedir ou *subsidize* en pe son bann *inputs*. Ou donn li en lasistans lo son bann diferan *chain* ki nou pe fer la swa lo prodiksyon, lo *hatchery*, lo sa diferan staz.

E alor prezan si i fer profi ou bezwen takse li. Me selman *tax* i bezwen en *tax rate* ki ekitab e ki fer e ki i pa en *tax rate* ki pe trangle zot. Mersi.

### **MR SPEAKER**

Mersi. Klarifikasyon Onorab?

### **HON EGBERT AGLAE**

Mersi Minis e PS. Minis savedir i kler ki pou annan reperkisyon finansyel si zis ou pou ale pou pran en later.

Minis mon ti a kontan petet ou eklersi nou, vi ki la, ou annan 2 *portfolio* la,

Minister Lagrikiltir anmennen Lanvironnman.

Lo size *agroforestry*, akoz dan mon distrik sirtou kot i konsern *F1*, eski zot pe petet al ver sa demars pou *allow* serten devlopman lagrikiltir kot i konsern *agroforestry*. Akoz dan lepase nou'n koz ankor lo la sa. Ki pozisyon Departman lo sa size?

### **MR SPEAKER**

Minis wi?

### **MINISTER FLAVIEN JOUBERT**

Mersi Mr Speaker. Mersi Onorab pou sa kestyon. *F1* Onorab, *F1* letan ou get lo *draft land use plan* i apel '*forest reserve*' mon krwar. Me selman an realite i pa en rezerv li, i en landrwa ki bwaze, i en landrwa ki annan lafore lo la.

E mon dapre mon nou bezwen al dan plis dan detay sa bann later *F1* e definir byen kler ki savedir *F1*, akoz *F1* i kapab egziste. Apre en sel kou ou vwar en semen in fer dan *F1*.

E *subdivision* pe ganny fer. So nou bezwen tonm dakor ki vreman bann morso sa bann *forest reserve* i sipoze pe fer. E ki bann posibilite pou sak sa bann morso.

E apre petet nou annan en definisyon pli detaye par rezyon, par distrik, ki nou pa

vreman konnen ki bann aktivite ki posib dan bann landrwa.

Akoz i annan en kantite sa bann landrwa ki ou kapab fer lezot aktivite par egzanp ou pe koz *agroforestry* ou kapab. Me sel osi ou bezwen rapel ki en bon pe sa bann landrwa ki *forestry* zot dir i bann landrwa ki ou annan resours delo osi.

Parey mon konnen dan ou distrik en bon pe sa bann landrwa i lo bann montanny, e ou annan resours delo li en lentere ase enportan dan sa landrwa. E alor nou bezwen gete ki kalite aktivite nou kapab fer.

Be selman sa bann *zone* i ganny demarke komen *F1* i toutafe normal ki ou fer en analis en pe pli detaye pou sa *zone* kot i ete. E i annan serten aktivite ki definitivman i kapab ganny entegre ladan.

E *agroforestry* se kiltivasyon e elevaz serten plant dan en lanvironnman fore, ki ou kapab ganny serten benefis avek.

E mon pa vwar li koman en keksoz ki pou koz polisyon grav ouswa ki kapab koz bann diferan problem lo kote lanvironmantal.

E alor mon krwar i annan potansyel pou nou entegre dan en kantite ka *agroforestry* dan en kantite sa bann *F1*. Mersi.

## **MR SPEAKER**

Mersi. Onorab Esparon,

## **HON REGINA ESPARON**

Mersi Mr Chair. Bonzour Minis avek ou delegasyon. Minis anba Polisi *MLUH* i *One Man One Land*. Mon ti pe regarde lo kote, annefe dan *Comprehensive Agricultural Plan 2018–2021*, enn zot lobzektif se pou ankouraz fermye pour prodwi plis.

Mon ti pe regarde lo kote later lagrikiltir ki tonm direkteman anba ou Minister, ki kalite Polisi ki zot annan lo distribisyon later lagrikiltir? Parski ase moman ou annan ou bann zenn fermye ki anvi konmans lans dan sa, dan prodiksyon lagrikiltir ki pe vwar li difisil;

Kot zot pe dir ou poudir dimoun ki deza annan later lagrikiltir, pe ganny donnen ankor plis later lagrikiltir, kan zot sa bann zenn ki anvi konmanse, zot pa pe ganny sa menm posibilite pou ganny en bout later.

Dezyenmman, mon ti avar anvi konnen, lo kote later lagrikiltir, eski zot annan en regilasyon pour si ou annan ou larpan, konmsi en *Cap* la pou dir, si ou annan larpan ou pa ganny en lot arpan, be oubyen ou pa kapab ganny 3arpan.

Zot annan sa regilasyon ki annan en *Cap* ki kantite

later ou kapab gannyen dan later lagrikiltir?

Dezyenmman Mr Chair, mon kontan ki Minis ou'n dir i annan sa fon *ADF* ki'n ganny sa lagreman ki'n ganny sinyen 2 semenn pase. E mon krwar sa pou al dan en bon direksyon. Parski ase moman bann ferme ki pe sey rod en loan avek *DBS* pe ganny bokou retar.

Zot pri dan bann tranzaksyon papye. E sa dele letan ki Minister i donn zot pou komans plante parfwa ki i *lapse*, zot pa ankor ganny sa *loan* e sa i kre bokou difikilte.

Ki Minister i kapab fer pou akseler sa proses, oubyen pou fasilite sa bann ferme dan son bann tranzaksyon? Mersi Mr. Chair.

### **MR SPEAKER**

Mersi. Minis.

### **MINISTER FLAVIEN JOUBERT**

Mersi Mr Speaker. Mersi Onorab pou ou keston. Kot i konsern *One Man One Plot of Land* mon krwar i reste parey. Mwan, mon pa ankouraze kot i annan dimoun ki'n deza annan later pou ganny en lot kare.

Me selman mon pou bezwen klarifye. I annan de ka ki mwan mon'n aprouve ki serten dimoun in depas son

kare later. Kot par egzamp kot in plante, in fini plen.

E i annan en morso akote ki pa en kare apar, me i ankor serten morso ki kapab ganny azoute avek son later pour li kapab maksimiz son prodiksyon.

E dan sa bann ka wi, nou'n aprouve pou ki sa dimoun i kapab agrandi, me non pa rebran en lot kare avek en lot dimoun ki ti kapab gannyen.

Alor agrandisman i enn bann keksoz ki mon krwar ki nou bezwen konsidere akoz i annan dimoun parey nou pe dir, Onorab Woodcock mon krwar ti lev en pwent kot i annan bokou dimoun ki zot pa pe prodwir ase lo zot later.

Me i annan dimoun ki pe prodwi 110poursan lo zot later e nou bezwen kapab ankouraz zot pou zot kapab agrandi dan sa bann ka.

E dan sa bann ka parey nou kot i posib nou trouv bann posibilite pou sa dimoun agrandi, e okip bann morso akote. Me selman pa dan en fason ki kapab anpes en lot dimoun gannyen.

Me selman ou tin koz lo en *Cap* ki kantite later, sa I en keksoz en pe difisil, akoz diferan landrwa ou ganny diferan kare later. E si ou met en *Cap* nou pou vwar nou avek en difikilte.



Akoz i annan laferm Sesel ki nou pe koz 20mil met kare, i annan laferm ki dan bann 10, 12mil e ou annan bann pti laferm ki dan bann 2000mil a 5000mil mon krwar. Ptipti.

So, I annan en pe difikilte pou met en *Cap* lo kantite later, mon krwar ou bezwen get potansyel sa plan devlopman ki sa dimoun pe vin avek. E osi sa ki nou annan pou ofer li.

Me i annan in keksoz ki ou'n nonmen Onorab, kot i konsern Plan Konpreansiv pour Lagrikiltir. Sa i en plan ki ti ganny fer par en lot Minis. Plan ki mwan mon okouran i egziste pou pei, se sa *Seychelles National Investment Agricultural Plan* ki ti ganny fer 2015 e ki regroup tou bann lobzektif nasyonal pou lagrikiltir.

Aprè sa in ganny rebran e in ganny apele en Plan Konpreansiv, pour Lagrikiltir ki annan serten pwen parey en *action plan* pour en Minis. Me selman mon pa pou kapab koz lo la.

Petet sa Minis in prezant sa dan Lasanble e mwan mon pe swiv sa lot gran plan ki mon'n fini deklare mon lentansyon, se fer en revè e fer li anglob tou sa bann lobzektif ki nou pe koz lo la ozordi.

Kot i konsern *ADF*, ki nou kapab fer pou nou fer li al

pli vit, petet mon a demann *PS Thesee* si ou annan okenn komantr lo la.

Me selman mon konnen in annan sa konsern, in annan serten fermye ki'n dir nou e nou, nou lentansyon se anmenn sa a lentansyon *DBS* me mon pa konnen si Finans okenn pwen pour klarifye lo la. Mersi.

### **MR SPEAKER**

Mersi. *PS* ou pou klarifye?

### **PS DAMIEN THESEE**

Mersi Mr Chair. Ou konnen ler i *involve* larzan la, en labank pou touzour fer sir ki i pe *safeguard* sa larzan. Savedir si i annan en dimoun ki pe *apply* en *loan* la, i pe kapab *meet* serten kondisyon, aköz ou pe donn sa *loan*.

E ler ou pe donn sa *loan* ou pe ekspekte ki sa dimoun i annan abilite pour repeye. E se sa mon krwar *challenge* ki i annan. E mon krwar osi nou bezwen konmans edik fermye ki nou pa kapab zis dir nou pe gat letan anpli papye.

Nou bezwen konmans sansibiliz zot ki lagrikiltir i en biznes e ler ou fer biznes i annan en kou ek sa biznes e ou bezwen kapab fer serten rol administratif.

So pou ou ganny larzan, pou ou pey ou *tax*, pou ou aste keksoz i form par osi dan biznes plante. E me selman

mon dakor i annan serten demars ki kapab fer nou pe diskrit avek *DBS*, e osi sa nouvo *loan ADB* ki i annan ek *DBS*, i annan serten fasilite ki Minister Lagrikiltir pou fer ki i pou *vet* en pe bann laplikasyon.

E petet la kot bann lasistans i kapab ganny donnen ek bann ferme ki manner zot kapab petet anpli zot bann laplikasyon. E nou'n sey *as much as possible* osi pou tir en pe bann *collateral* ki ganny demande avek laplikasyon *loan*.

Be selman pli ou pou al bann pli gro sonm par egzans sa sif in ganny *extend from* R1milyon to R5milyon ou bezwen annan kapab serten garanti, ki ou pou protez sa larzan aköz nou annan en fon ki apre ki sipoze kapab repeye pou kapab redonn *loan*.

Me selman si nou pe donn larzan ki nou napa okenn garanti ki pou repeye, sa dilenn. Me selman sanmenm sa bann sektè koumsa i vin kot *DBS* dan plas al dan bann labank komersyal.

Aköz definitivman si ou al kot labank komersyal i pou pli difisil pou sa sektè pa kapab ganny *loan*. So, *DBS* i deza li pli fleksib. Selman nou pou angaze avek Minister Lagrikiltir sa lannen pou gete ki spesifikman bann ferme ki

pe kontinyen met devan konsènan *delay*. Mersi

### **MR SPEAKER**

Mersi. Wi Onorab klarifikasyon.

### **HON REGINA ESPARON**

Mersi Mr Chair. Zis en pti klarifikasyon. Problemm i leve bokou Minis, parski sa letan, sa dele letan ki Minister Lagrikiltir i donn zot pou komans fer zot ... pou komans plante, parfwazot vwar zot difisil aköz sa prosedir avek labank i tarde.

Konmsi kwa ki kapab ganny fer pou *bridge* en pti gin sa *gap* la dan milye? Mersi.

### **MR SPEAKER**

Mersi. Wi *panel*? *PS* pou adrese?

### **PS ANTOINE-MARIE MOUSTACHE**

Mersi Onorab Chair. Dan ka aktyel Onorab, i annan en pti linite dan Lazans Lagrikiltir, ki fer travay ki petet sa ferme li menm ti pou fer ler i al kot labank.

Donk se sa pti linite ki demann li pour anmenn tou son bann dokiman ki neser pou ganny sa *loan*.

Alor donk sa pti linite i fer en travay tre valab. E ler in anmenn tou son papye la i ganny tou bann dokiman neser, se sa linite kot Lazans

ki fer kontak e ki soumet evantyeleman son laplikasyon pou sa *loan* kot Labank. Koumsa i pa vremen monte, desann pour fer sa.

Donk mon krwar sa en bon konmansman e mon krwar nou pou anplifye lo la dan lavenir, koumsa i a minimiz sa letan oubyen travay ki sa ferme i bezwen fer pou kapab evantyeleman met lanmen lo sa *loan*. Mersi.

### **MR SPEAKER**

Mersi. Onorab Ghislain.

### **HON CHANTAL GHISLAIN**

Mersi Mr Chair. Bonzour Minis ek ou delegasyon. Bouzour tou dimoun. Mr Chair, stok orizinal bann *broilers* e bann *layers*, nou pe koz lo poul la, ti ganny entrodwir Sesel apre 1977 par *IDC*. Elevaz koson li lo en nivo komersyal li ti ganny an 1977 par *IDC*.

Me pli tar an 1980 letan ti retir sa avek *IDC*, ti retir kota avek *IDC*, seta la ki zot ti donn bann ferme lo Mahe pou zot kapab konmans prodwir, fer elevaz koson e pou sa bann moman kot elevaz koson in vin lo en pli gran lanpler.

Me avan 1977 laplipar bann ferme parey Minis in fer resorti zot ti pe fer *subsistence farming* e apre ti annan en kantite pye koko, apre ti annan elevaz osi kannel ek

patsouli, sete sa ki ti annan Minis avan 1977.

Mon kestyon i annan pour fer avek leokri bann ferme lo Grand Anse Praslin ase moman. Minis bann ferme lo Grand Anse Praslin zot in *call* i annan detrwa zot, zot pe dir zot be ganny eksplwate par bokou bann gro ferme isi lo Mahe, ki zot non selman zot annan bann gran laferm, me osi zot annan zot laboutik ki kapab vann zot prodwir.

Tandis ki zot lo Praslin zot napa. E trwa kar zot ase moman zot pe ganny difikilte par egzanp zot dir ou zot pe prodwir zironmon *and* zot pa pe kapab vwar sa lavant Praslin, akoz lefe ki trwa kar bann lotel in fermen.

E dimoun Praslin sa pti git ki aste e trwa kar pa pe aste akoz zot napa larzan pour zot aste. So, zot zironmon i pouri ek zot. Ki zot pe dir pour dir menm si bann gran ferme lo Mahe ki deza annan zot magazen pe demann zot, pou vann, pou anmenn Mahe pou vann, me zot santi zot ganny eksplwate.

Akoz par egzanp zot pe dir ou sa bann ferme i demann zot 1 kilo zironmon pou R20 en kilo. Prezan zot bezwen ladan menm pey bato pou anmenn, anvoy Mahe e sa bann ferme zot letan zot aste sa zironmon pou 1kilo pour

R20 zot vin vann R65 Mahe. So zot in menm dir osi in annan brenzel osi menm parey ki zot pe vann R30 kilo, sa zot problemn.

Prezan Minis mon kestyon i annan sa *Livestock Trust Fund*, eski dan ou Minister zot pa kapab annan 1 dimoun ou 2 dimoun? Akoz yer swar letan mon'n regard en nouvel lo televizyon, mon'n dir *vow, this is the power of the media*. En msye ki pa ti pe kapab vann son pwason finalman apre medya in fer en nouvel e zot in nobou kapab vann zot pwason.

So, dan sa *Livestock Trust Fund*, eski Minis ou pa kapab vwar en larzan, pou kapab rod en dimoun ouswa 2 dimoun dan ou Minister ki kapab fer sa bann *advert* parey? Konmsi finans sa ladan, dan sa *fund* sa bann proze, pou kapab ed sa bann ferme pou zot kapab vann, vann zot prodwir, fer bann *adverts*.

Or mon pa konnen mannyer zot pou fer me selman i annan pou fer avek lavertisman lo medya be i ton *social media*, lo *SBC* pou zot kapab vann zot prodwir. Mersi Minis, Mr Chair.

### **MR SPEAKER**

Mersi Onorab. Minis?

### **MINISTER FLAVIEN JOUBERT**

Mersi Onorab pou ou kestyon.

Distribisyon prodwir laferm i en gro konsern. E letan mon'n al Praslin sa ki mon'n konstate i egzakteman sa ki ou pe dir mwan la, kot i annan en problemn kot prodiksyon ek kot dimoun pe konsonmen i pa konekte ansanm.

Enn bann keksoz ki mon'n fer letan mon'n vin dan biro, letan mon'n vin dan sa syez Minis, se ki mon'n aprann se ki ti annan en demars pe ganny fer pour annan en *outlet* pou bann dimoun ki ti Praslin ek sa Lasosyasyon Fermye pour dan rezyon Perseverans.

Ki ti annan en demars pou *set up* parey en Bazar *Wholesale* me mon'n sey rod en pe lenformasyon pou dir ou fransman mon pa'n vwar. Mon pa konnen kwa ki'n deroule, mon'n sey fer kontak avek bann dimoun ki swadizan enplike me mon pa'n ganny okenn lenformasyon.

Me selman lot keksoz ki mwan mon'n fer se ki nou'n deza fini fer laranzman kot mwan mon'n al zwenn, mon'n zwenn ek *Buy & Sell* e zot in fini kree en paz fini fer *advert*, nou pa ankor met lo televizyon, i annan menm *advert* ki nou'n prepare pour, akoz nou bezwen annan sa koneksyon.

Fodre sa koneksyon aster ek vander. E mwan osi mon fermeman krwar ladan. I en keksoz ki nou'n deza fini fer, sa bann *advert* i deza la e *Buy & Sell* in fini fer son lagreman. Par egzantp nou konnen ki nou kapab servi lot platform me selman. Sa i enn ki nou'n zwenn avek zot e nou'n tonm dakor pou nou finans *video*, *advert* eksetera.

E *anytime* sa *mechanism* i sipoze ganny met lo marse pou ki fermeye i kapab konekte. Nou'n fer li atraver sa, atraver sa kalite medya, aköz nou konnen i fasil pou tou dimoun, tou dimoun i al lo *Facebook* toulezour.

E i tre fasil pou poste e sa i en fason ki nou oule ki dimoun i kapab konekte. I annan en lot sistenm ki mwan mon zwenn ki ti pe ganny kree pour lagrikiltir kot bann fermeye, kot bann aster ek bann vander i kapab konekte.

Me selman i en pti pli konplike, i pran en pe plis letan pou met an plas. Me selman i kapab donn ou pli bon kalite lenformasyon. Me selman sa i en keksoz ki pou pran plis prosedir.

Nou nou'n fer sa en ki baze lo medya sosyal aköz nou konnen i vit e i fasil pou tou dimoun servi. Alor i zis en kestyon met dan medya, e fer bann dimoun ganny akse avek pou ki zot kapab vann zot

bann prodwir.

Me tou fason i annan osi en pti inite parey Msye Moustache ti fer resorti ki i annan en *Unit* ki apel *Marketing* kot Lazans Lagrikiltir. E nou ki nou oule fer osi se ranforsi sa *Unit* pour ki letan en fermeye i annan en problemm i kapab zis *call*.

E zot annan en lalis bann dimoun ki kapab aste pour zot kapab konekte avek. Aköz sel keksoz ki mon vwar se ki, sa ki pe prodwir i pa pe konnen oli sa dimoun ki pou aste son prodwi. E sa i pe kre en gro problemm.

E mon'n al Praslin mon'n vwar kot melon par egzantp pe ganny antere, la ozordi 2021 kot i mank prodwir lo *market*, ki mannyer nou pe anter melon lo Praslin.

Me selman i en kestyon market ki pa pe konekte, vander ek aster pa pe konekte. E nou pe sey fer demars pou nou kapab konekte sa 2 ansanm pou ki vremen i annan en bon lavant.

### **MR SPEAKER**

Wi Onorab, klarifikasyon?

### **HON CHANTAL GHISLAIN**

*Yes Mr Chair*, mersi. Zis pou azout en pti keksoz an se ki konsern melon osi zot in, zot ti pe dir mwan lo la.

Minis eski, ler mon pe dir ou dan sa *Livestock Trust Fund*

la, konmsi ki ou kapab tir sa larzan zot menm, pa neserman pe donn sa bann fermye, me selman pou kapab pe tire and fer sa.

Eski sa osi zot kapab pe konsider pri bato osi pou kapab tir sa bann prodwir lo Praslin anvoy Mahe pou kapab vann? Akoz par egzanp melon zot pe dir pou dir menm si sa bann fermye, sa bann magazin Mahe ti'n demande me lefe ki bato pa pe vwayaz toulezour, akoz i annan sa problemm kot napa marsandiz Mahe, so zot pa pe desann.

*And* letan zot in rekolte pou zot al lo bato, bato pa pe monte, se pour sa rezon ki zot in bezwen kapab anter sa bann melon *and all*. Mersi. Si zot kapab enkli dan pri bato, konmsi pey pou zot, konmsi ed zot pour zot kapab fer zot bann zot vann prodwir, an menm tan zot kapab prodwi *and then* vann.

### **MR SPEAKER**

Minis.

### **MINISTER FLAVIEN JOUBERT**

Mersi Mr Speaker.

I pa en keksoz ki pou ganny konsidere la aktyelman me i en propozisyon ki nou pou bezwen gete ki kalite sipor adisyonnal ki nou kapab ganny anmennen pou asire ki sa koneksyon sirtou ant Mahe

kot marse prensipal i ete, ek bann landrwa ki pe prodwir parey Praslin.

Alor en keksoz ki kapab ganny konsidere dan bann demars ki nou pe fer pou amelyor akse avek marse par bann fermye. Mersi.

### **MR SPEAKER**

Mersi. Onorab Mondon.

### **HON TERENCE MONDON**

Mersi Mr Chairman. Bonzour Minis avek ou delegasyon. Mon premye kestyon i adres lekol lagrikiltir, dan zot plan devlopman pour lagrikiltir nou pe get bann zenn, e ler nou ti fer en vizit kot bann zenn ti annan detrwa size ki ti sorti for par egzanp zot *curriculum* kot i annan zenn ti pe gete kot zot program ti devret osi enkli zot bann tes lasyans osi, pli akademik.

E sa i ti pou enteresan pour lezot zenn pour zot kapab anmenn plis zenn dan sa lekol. Epi lespas bezwen agrandi zot bann aktivite laprantisaz e osi bann zouti modern.

E mon anvii konnen dan sa Bidze kwa ki zot pou kapab reisir pour adres en pe sa bann size kot nou bann zenn i konsernen?

Mon dezyenm kestyon i lo *backdoor farming*, ki i osi ...ki i osi ... *backyard* ya *backyard ok* wi, i osi aport en

kontribisyon. Kote i *feature* dan sa plan, dan sa nouvo plan akoz zot, zot pe deservi lakominote an prensipal?

E trwazyenm se sa *Seychelles National Agricultural Plan* la, ki nou'n koz lo la, nou'n aborde e ki Minis in fer nou konpran ki li, i pe vin ek son plan pour li.

Be selman sa plan ti ase detaye ti annan bann target bann edikater pou kapab mezir performans. Mon ti a kontan konnen si zot mezire bann performans ki ti'n ganny set dan sa plan konpreansiv ki ti ganny fer?

E si kapab partaz nou ek statistik pou nou konnen kote nou ete ozordi avek par egzantp i annan bann kontribisyon bann konsonmasyon lokal pour fri ek legim, pour *livestock*.

Si ou kapab donn nou sa bann statistik pou nou konnen kote nou ete ozordi pou nou kapab mezire pli tar. Mersi Mr Chairman.

### **MR SPEAKER**

Mersi Onorab. Wi Minis?

### **MINISTER FLAVIEN JOUBERT**

Mersi Mr Speaker. Mersi Onorab pou ou keston. Kot i konsern lekol lagrikiltir, sa ki konsern sa Minister me osi Minister Ledikasyon. Mon'n an diskisyon avek Minis pour

Ledikasyon e nou'n al lo teren osi, nou'n fer Grand Anse Anse Boileau, Anse La Mouche kot lekol i ete, me ki pa pe ganny servi.

E nou'n koz lo diferan size. e nou'n lo par egzantp lespas pour nou, bann laprantisaz nou bann etidyan. Ki nou pe anvizaze se ki nou bezwen servi nou bann lezot fasilite ki egziste.

E lekol lagrikiltir pa kapab debout lo li menm. Par egzantp nou annan fasilite Grand Anse kot nou annan fasilite laboratwar kot nou kapab enteres bokou, bokou bann etidyan ki annan lentere sirtou lasyans par egzantp.

Nou annan fasilite Anse Boileau kot aktyelman i annan en nouvo batiman ki pe ganny konstrir, me i pou annan en lespas ki pou kapab ganny servi pou akomod, *accomodate* bann etidyan dan sa landrwa kot Sant Resers, pou ki zot a kapab ganny en lentere dan sa bann program ki pe ganny fer e aprann nouvo keksoz.

Alor i annan e demars ki nou pe fer ansanm ek Ledikasyon pou nou revwar lafason ki lekol lagrikiltir i fonksyonnen.

E fer ki i en lekol ki i annan sa bon koleksyon avek bann aktivite ki pe ganny fer dan lagrikiltir e osi trouv en fason pou nou kapab annan

diferan kalite etidyan ki antre dan sa lekòl.

Akoz aktyelman nou konn en pe bann etidyan ki antre dan lekòl lagrikiltir, i annan bokou konplent lo kalite bann etidyan, nou pa blanm zot, me petet nou pe admet ki bann etidyan ki pli ba nivo.

Nou bezwen vwar en fason ki nou bann program ki atir bann etidyan ki annan bokou plis kapasite pour ki nou kapab vremen anmenn sa kapasite dan lagrikiltir e dan prodiksyon.

Me dan Bidze la ozordi, bokou sa bann keksoz ki mon pe koz lo i fer atraver en, atraver bann proze ki *Livestock Trust Fund* i sipote e sa mon krwar nou kapab fer li.

Par egzant pou prepar lespas kot Sant Resers Anse Boileau. Me osi nou krwar ki atraver sa Bidze san ki nou fer adisyonnèl depans nou kapab aranz nou program osi pou ki nou bann etidyan i kapab ganny *accommodate* dan travay ki pe ganny fer kot bann landrwa e ki zot a kapab aprann.

Mon pou demann *PS Moustache* pou reponn lo *backyard farming* apre mwan vin lo sa lot pwen. Mersi.

### **MR SPEAKER**

Mersi. PS?

### **PS ANTOINE-MARIE MOUSTACHE**

Mersi Onorab Chair. Alor sa konsepsyon *backyard farming* ti lanse an apepre 25an pase, nou ti relans li lannen pase en Zen. E dan relansman nou'n annan nouvo partner, nou annan bann lekòl segonder ki nou'n fer en afilyasyon avek.

Nou pou servi bann lekòl. Nou'n deza angaz 4 lekòl ziska prezan lekòl segonder, enkli lekòl primer ki pou servi konman bann inite ki pour prodwir pti plan pour anmenn dan distrik kot zot ete.

Mon kapab servi legzanp Perseverans. Nou donn soutyen lekòl primer Perseverans atraver reanmenazman en fasilite ki ti annan oparavan pou prodwir bann pti plant e nou pe travay la non selman avek lekòl me osi en lorganizasyon non-gouvernmental Perseverans an mouvman.

E donk zot dan sa distrik, mon panse apepre 2000 fwaye, i donn sa bann fwaye pti plan. Setadir se bann fwaye ki annan zanfàn la. Donk sa bann fwaye i aste avek sa lekòl e dont lekòl i donn zot sa bann pti plant pou plante kot lakour.

E nou ti fer pour Zournen Mondyal pour Lalimantasyon lannen pase, nou ti met sa vremen an viger. Nou oule fer



li dan lezot distrik. Donk lagrikiltir i anmenn en fasilite kot bann lekòl segonder ki fer bann striktir e lekòl segonder i aprovizyonn dan sak distrik bann fwaye ki anvi zisteman fer perse avek sa kanpany sak lakour en zarden.

E mon krwar se sa ki fer li pwisan e parski mentnan nou annan partner ekstra. E nou oule kontinyen diran kour sa lannen trankilman kontinyen kapab aprovizyonn bann lekòl segonder avek bann fasilite, pou zot kapab prodwir bann pti plan e non selman sa;- e osi fer zot pti lagrikiltir pou angaz marmay dan sa pti konesans ki dayer i baze lo lasyans i en laboratwar vivan dayer.

E konmsa nou kapab aprovizyonn tou bann fwaye. Nou'n konte i annan plis ki 26000 fwaye e si nou ti kapab met apepre 5met kare dan sak fwaye la kot i posib nou pou deza kontribye dan la kantite later ki pe ganny kiltive. E kontribye ver en sekirite alimanter. Mersi.

**MR SPEAKER**

Mersi. Minis.

**MINISTER FLAVIEN JOUBERT**

Mersi Mr Speaker. Mon pou pran sa lot pwen ki Onorab in leve konsernan Plan Konpreansiv pou Lagrikiltir.

I annan bann evalyasyon ki'n ganny fer e mon kapab partaz avek ou atraver email. Bann evalyasyon in ganny fer lo bann prodiksyon lavyann.

Me selman sa ki mon pou dir ou se ki, sa bann lannen ki'n pase i annan progre ki'n ganny fer lo prodiksyon lavyann me in pa'n ariv lo sa bann target ki ti ganny mete lo sa bann plan.

Swa sa enn 2015 ki ti en plan pli larz e apre sa lot pti plan ki ti vin apre. Me mon kapab partaz sa avek ou atraver *email*, ou ava vwar bann *figures* ladan. Me selman Onorab pour sa revi ki nou pe fer, sa plan ki pe vini la i pa mon plan li. I en plan ki'n egziste la nasyonan e in ganny fer avek lasistans enternasyonan.

E mon lentansyon se fer son revi akòz in ariv son ler pou fer son revi, son dat fini i 2021 e me selman bann keksoz enportan se enkorpor bann nouvo direksyon dan sa nouvo plan, akòz sa plan avan ti annan zis 5 pwen mazer.

Me la i annan plizyer lezot keksoz ki pe leve ki sirtou apre sityasyon *COVID* nou vwar en neser pour nou antre ladan, nou pe koz *agro processing*, nou pe koz akse avek marse, nou pe koz bann diferan size ki vremen pou ed bann ferme avanse.

E mon krwar i enportan ki sa bann target i antre dan sa plan. Alor sa propozisyon i pa pou mwan fer en plan pour mwan avek sa Minister pou sa prosen 5an, me revi, reviz en plan ki ti egziste la e fer li vin pli relevan pour sa prosen 5an. Mersi.

**MR SPEAKER**

Mersi. Avek sa nou a pran en poz e nou a rezwenn 11er. Mersi.

( ***BREAK*** )

**DEPARTMENT OF**  
**AGRICULTURE (Cont)**

**MR SPEAKER**

Onorab Phillip Arissol.

**HON PHILIP ARISSOL**

Mersi Mr Chair. Bonzour tou dimoun. Minis dan menm laliny avek kestyon Onorab John Hoareau, Minis mon ti a kontan konnen ki bann kriter zot pe servi pou fer alokasyon sa bann laferm ki'n ganny rebran avek bann fermye ki pe espere?

Apré Minis sa Stasyon Resers Anse Boileau i sipoze pe fer resers pou amelyor lagrikiltir dan Sesel. Eski Minis i kapab dir nou ki kalite difikilte ki sa stasyon i rankontre pou donn bann

fermye bann rezilta resers ki zot in fer.

Apré Minis mon dernyen kestyon, Minis eski ou Minister i kapab aport lasistans pou bann fermye Anse Boileau sirtou Anse Louis la obor laboutik kot Mr Fock Yune, afen ki zot a ganny en landrwa ideal, tanporer pour kapab vann zot fri e legim ek gro manze. E non pa fer parey ou predeser ti fer, zis fer promes me pa'n zanmen kapab delivre. Mersi.

**MR SPEAKER**

Mersi. Minis?

**MINISTER FLAVIEN**  
**JOUBERT**

Mersi Mr Speaker. Mersi Onorab Arissol pou ou kestyon.

Kot i konsern Sant, pardon, kriter pour alokasyon later, i annan en prensip ki ganny servi lo kote Lazans me, ki mon pou fer si mon kapab defer sa kestyon ziska ler Lazans i vin devan Lasanble, pou petet i ava vin avek sa polisi, i avar kapab eksplik ou en pe pli an detay, ki bann kriter ki pe ganny servi pour alokasyon. Mon pa pou reponn sa la deswit.

Difikilte pou prodiksyon osi kot Sant Resers Anse Boileau, mon krwar ti a bon ki bann Zofisye Lazans i a kapab klarifye sa letan zot vini.

Me selman mon konnen la aktyelman i annan sa bann restriksyon ki anpes zot bann travayer raport toulezour. E sa osi in met en pe retar e mon osi mon'n demann kestyon ki pe arive lo teren, me travayer pa pe kapab raport toulezour e alor i annan serten aktivite ki pe ganny ralanti me avek reouvertir la mon mazine keksoz pou rebran.

Kot i konsern lasistans pou bann ferme ki pe vann zot prodwir Anse Louis, akote kot ou'n dir kot Fock Yune. Mwan keksoz ki mon'n fer aktyelman resaman la se, mon'n fer en diskisyon ek Minis pou Lapes e nou, nou ti a voudre ki nou kolabor ansanm sa 2 Minister, pa sa 2 Minis me sa 2 Minister.

E entegre bann fasilite pou peser ansanm avek lagrikiltir, ki dan en fason ki santral e kot bann dimoun in swazir e se ki nou bezwen fer sir ki rezidan ki'n swazir sa bann landrwa.

E fer ki nou kapab benefisyse osi lo kote depans letan ki nou fer sa bann fasilite Bazar. Me selman si i annan en keksoz spesifik pou en group dimoun, mon ava fer kontak avek ou.

Nou ava trouve si i annan en bezwen spesifik pou adres serten bezwen lokal pour sa bann dimoun alor nou avar gete. Mon pa konnen kwa

ki ou pe propoze si en pti Bazar petet ouswa en pti fasilite, *then* nou ava gete kote nou kapab asiste sa group dimoun zot menm. Mersi.

### **MR SPEAKER**

Mersi. Onorab Gill.

### **HON CHURCHILL GILL**

Mersi Mr Chair. Bonzour Minis, ou delegasyon. Bonzour tou Manm.

Mon premye kestyon i an relasyon ek ou manda prensipal. Apar ki finansman sipor *from ADF*, ozordi dan Sesel ki lezot *avenue* ki annan sipor finansyel ki ferme i kapab tap ladan pou zot ganny, pou zot *boost* zot prodiksyon? Sa i premye.

Dezyenm i an relasyon avek pri lavi. Dan ou '*challenges*' ou'n dir ki ou pou *boost* prodiksyon, *crops* avek *meat* 50poursan sa ki ou pe antisipe. Apre an menm tan bomaten *PS* in dir nou pour dir sa *levy* pou le moman i reste bann prodwi enporte.

Vi ki nou prodiksyon pa ankor ariv a la oter, bann konsonmater dan pei, zot pou bezwen aste sa bann prodwi ki ganny enporte ki deza annan *levy* lo la.

E sa i fer ki zot kou depans i bokou. Alors ki i ou ekspekte *achieve* sa *level of 50percent of productivity*?

Akoz toultan nou pa ariv sa i pou difisil pou konsonmater pou pa aste prodwi ki annan *levy* lo la. An menm tan ler ou pou *achieve* sa 50poursan ki mekanizm ki ou Minister pou met an plas konsernan lenportasyon aköz ler prodiksyon pou monte ou pou bezwen kre lespas lo *market* pour sa kantite ogmantasyon dan prodiksyon pour sa bann ferme kapab vann zot prodwi.

Alors ki mekanizm ki ou pe mazin met an plas *parallel* ler ou pe devlop ou prodiksyon, pou fer sir ki pou annan sa lespas ler ou prodiksyon i monte.

E mon dernyen kestyon se konbyen larzan i annan dan fon *Agricultural Development Fund* apre *Livestock Trust Fund*? Mersi.

### **MR SPEAKER**

Mersi Onorab. Minis.

### **MINISTER FLAVIEN JOUBERT**

Mersi Mr Speaker. Mersi Onorab Gill pou ou kestyon.

Kot i konsern bann diferan posibilite pou dimoun ganny sipor lo kote lagrikiltir. Aktyelman sa *loan ADF* i fasilite prensipal ki egziste pou bann ferme pou zot kapab fer zot devlopman. I annan bann posibilite par egzanp pou *access* lezot *loan* atraver

labank, me nou konnen pour dir zot bann lentere i ase o.

Me selman si nou rapel mon pti lentrodiksyon ki mon ti fer o komansman mon ti endike ki enn mon bann lentansyon se pou al rod bann fasilite ki egziste an deor pei, en pe parey lanvironnman pe fer ozordi.

E fer ki lagrikiltir osi i kapab benefisye atraver sa bann fasilite. Nou konnen ki i annan bokou fasilite ki potansyelman lagrikiltir i kapab ganny akse avek.

Nou pe koz sanzman klimatik par egzanp, ki sipoze annan en gro konponan ki target adaptasyon pou lagrikiltir. E nou, nou ti a voudre ki i annan lezot posibilite pou nou bann dimoun ganny sipor anba sa bann fon ki nou kapab servi osi.

Aprè osi byensir nou konnen i annan bann sipor ki vin atraver fon *Livestock Trust Fund* ki pe siport bann proze me sa i pa pou bann ferme endividyel, me plito bann group ferme dan bann rezyon e sa i kouver sirtou lenfrastriktir.

Alor bann sipor parey mon'n dir i prensipalman i en sel sours, e nou ti a kontan ouver sa pou plizyer lezot sours pou ki ferme i kapab ganny lezot posibilite finansman.

Ou'n koz lo kou lavi e bann target pou fer monte prodiksyon lokal *versus* prodiksyon, bann prodwir enporte. Parey mon ti dir pli boner aktyel *pork* i 30 poursan e poul i 49poursan.

I posib pou nou fer prodiksyon poul monte par lao 49poursan. E avek bann zefor ki pe ganny fer dan san prosen 1an ouswa 2an, nou ekspekte ki i pou monte i pou sot 50 poursan.

Prodiksyon *pork* i pou pran en pti git letan, me i annan bann posibilite pou agrandi bann egzistan. E i annan en de lentere ki'n ganny montre par serten dimoun, pour aktyelman antre dan prodiksyon *pork*.

E mon pa poudir ki toudswit lo kote *pork* nou pou ariv lo sa nivo prodiksyon 50poursan, me nou kapab fer li avans en bon zistans e apros sa nivo 50 poursan.

Konbyen larzan i annan dan sa 2 fon? Mon pou demann PS Finans si i kapab donn en pozisyon lo la ouswa nou kapab apre enform Lasanble egzaktaman. Me zis pou dir ou Onorab, mwan enn bann keksoz ki mon'n demann Finans e ki sa *Livestock Trust Fund* nou fer en odit konplet pou nou konn son *status* egzakt, konbyen sipoze antre.

E konbyen ki sipoze pe ganny servi e konbyen ki'n

ganny depanse, pour ki mon osi letan mon vin devan Lasanble mon kapab vreman kler, 100poursan i annan egzaktaman.

Mon pa dir i annan keksoz mal pe arive me, mwan osi mon pe esper ki nou fer sa odit pou ki nou vreman konpran 100poursan, ki mannyer sa fon i roule e kwa ki i annan ladan a okenn moman. Mersi. Mon demann petet PS Finans pour koz en pti pe lo sa 2 fon *Livestock Trust Fund* osi ADF.

#### **MR SPEAKER**

Wi PS.

#### **PS DAMIEN THESEE**

Mersi Mr Chair. Pour LTF i annan R4.5milyon dan en *Suspense Account* sa ti bann *previous years collection*. E apre parey nou konnen nou'n bouz son koleksyon dan Bidze ki nou estimen, sa lannen nou'n estimen pou kolekte apepre R21milyon ki ganny *spread* dan PSIP anba SAA.

Pou ADF, mon napa balans ek mwan so *by* apre midi mon kapab rode pou gannyen akoz i ganny *manage by* DBS. Mersi.

#### **MR SPEAKER**

Wi, Onorab Gill.

#### **HON CHURCHILL GILL**

Minister i annan en bout ki pa'n ganny reponn lo kote enporte akoz ler nou prodiksyon pou monte nou bezwen annan en loportinite pou sa prodiksyon ganny vann.

E si nou napa en mekanizm dan lenportasyon pou nou kapab redwir, i pou difisil pou sa bann prodiksyon ki nou'n ogmante war market. Mersi.

### **MR SPEAKER**

Mersi Onorab. Minis?

### **MINISTER FLAVIEN JOUBERT**

Mersi Onorab pou sa pti klarifikasyon. Lo kote lespas lo market, enportasyon, enn bann diskisyon ki nou'n, ki mwan mon'n annan avek Departman Komers kot Minister Finans se ki nou bezwen gete vreman ki bann zouti ki nou annan pou nou travay lo sa size lenportasyon.

Aktyelman nou pe servi *levies*, me i annan parey Mr Moustache in endike, en moman *levy* ti en pe o e i annan presyon sorti an deor par egzanp pou nou fer desann *levy* pou ariv mon krwar 25 ou 27 poursan. Ti koumsa.

E mon krwar nou bezwen travay avek Minister Finans lo kote *Trade* pou nou vreman

servi tou bann zouti ki i annan.

Akoz kestyon ki mon demann mon lekor se ki i annan pei ki dan menm pozisyon parey nou me zot pe pli kapab kontrol lentrodiksyon serten prodwi lo zot market, savedir zot kapab fer plis proteksyon pour zot marse.

E alor mon lentansyon se angaz nou avek bann dimoun ki annan ekspertiz dan komers e fer ki nou kapab vin avek bann diferan fason pou nou marse lokal anmezir ki nou fer ogmante nou prodiksyon lokal. Sa i bann mezir lo lafrontyer.

Me lokalman nou pou osi bezwen angaz avek bann dimoun ki dan biznes par egzanp enn bann keksoz ki nou pou bezwen fer se travay avek bann gro konsonmater ozordi, ki pa pe aste lavyann lokal par egzanp.

I annan en kantite bann gro konsonmater bann lotel ki rezon kalite fasilite ki nou pe servi pou *process* nou bann zannimo e nou lenspeksyon pe ganny fer, nou sertifika ki nou pe donner, zot pa pe aksepte nou prodwi.

Alor nou bezwen travay avek sa bann dimoun e vreman konpran ki mannyer nou kapab penetre sa *market*. Nou bezwen satisfere bann bezwen sa marse. E nou pa zis

konplent ki nou pa pe kapab akse *market*.

Me nou bezwen konpran ki sa bann lotel, sa bann gran marse enternasyonal pe demande an term standar lavyann ki bezwen pou li met lo son lasyet dan restoran.

Alor nou bezwen fer sir ki nou pe travay avek bann dimoun ki nou konnen potansyelman i kapab vin en sours, en marse pour bann prodikter lokal pou nou kapab vremen kre sa lespas pou zot antre lo marse.

E la prezan ou avar deplas sa bann prodwir enporte. Enn bann konversasyon ki mon'n gannyen se ki avek en dimoun ki dan en konpanyen, ki dan *wholesale* ki pe enporte, se ki si i ti annan sa bann prodwir lokalman, zot ti pou pran lokalman, akoz lokalman letan ou gete li, son pri i pran tro difisil li, i pa tro lwen avek sa ki pe enporte.

Me selman son kliyan ki li pe vann avek pa tro entere pou pran, si li i pe pran sa lokalman. Alor nou bezwen kapab travay avek zot pou nou kapab *access* sa bann bout *market* e fer ki nou ouver laport pou nou bann prodiksyon lokal. Mersi.

### **MR SPEAKER**

Mersi Minis. Onorab Labonte.

### **HON ANDY LABONTE**

Mersi Mr Chair. Bonzour Minis avek delegasyon. Bon mon kestyon i vize ver lazenes parey Minis in fer sorti dan enn de son bann larepons *regarding* lekol lagrikiltir pou ankouraz zenn *and so on*. I annan serten kestyon ki'n ganny demande.

Me mwan mon pou plizoumwenn met lanfaz en pe lo sa Progranm Lasemans *Youth Farming Enterprise Initiative* ki i ti'n ganny lanse, ti annan en *MOU* ki ti ganny sinyen, ki i annan 12 marmay ki'n ganny selekte.

E dan sa 12 marmay annefe dapre konpran le 13 Novanm zot ti ganny en let konmkwa zot ti'n ganny aksepte, me selman *until now* zot pa ankor ganny okenn leksplikasyon, zot pa ankor konnen ki zistans zot ete.

Akoz sa i bann keksoz parle ki dekouraz marmay akoz zot santi pou dir keksoz i tro tarde, finalman zot perdi lentere dan sa bann, dan sa sekter e zot pe menm demande vi ki zot ti pe ganny dir anba sa *MOU* poudir zot pa pe kapab petet vremen abit lo sa later plizoumwenn zis pou zot plante.

Me zot ti pe sey demande vi ki nou konnen nou annan en problem lakaz, lozman dan pei, petet ti kapab revwar sa, ki zot ti kapab abit lo la

avek serten kondisyon bann letan ki zot pe *acquire* sa later.

E an relasyon avek sa, nou pe get en pe lo kote bann zil. Parey *IDC*, nou konnen *IDC* i lo en program ki zot anvi relans lagrikiltir lo zil, petet ki mannyer *IDC* ti kapab travay avek lekol, pour ankouraz bann zenn pou al en pe lo zil pou kapab travay en pe lo zil.

Aprè mon dezyenm kestyon, i vin plizoumwen lo kote *levy*, *in term of levy* ki parey lo lavyann enporte, prensipal *pork*, i annan serten dimoun la deor ki pe enport plizoumwen keksoz *related* avek lavyann.

Me selman i pa vreman sa lavyann li menm li, me selman zot vwar sa *levy* lo la. Parey sa bann dimoun ki pe enport trip ensi byen ki lapo zot vwar ki sa *levy* lo la e finalman i fer zot prodwir ogmante petet pe gete si zot pa ti kapab vreman revwar sa. Sa i mon 2 kestyon.

Aprè en lot pti keksoz, en pti klarifikasyon Minis *sorry*, ler mon'n get anba *Program 1* kot *Office Expenses* parey ou'n dir poudir avan zot ti napa en lofis, be prezan zot in ganny en lofis ki montre ki i oparavan.

E ou'n koz lo elektrisite, *internet* nou vwar en kou me mon pa vwar okenn larzan ki'n ganny mete pour delo. Eski zot pa pe servi delo vreman? Petet

nou ti kapab ganny en leksplikasyon lo la. Mersi.

**MR SPEAKER**

Mersi Onorab. Minis.

**MINISTER FLAVIEN JOUBERT**

Mersi Mr Speaker. Mersi Onorab pou ou 3 kestyon. Mon ava demann *PS Moustache* pou pran sa enn dernyen konsernan lofis e delo.

**MR SPEAKER**

*PS* Wi.

**PS ANTOINE-MARIE MOUSTACHE**

Mersi Onorab Chair. Annefe *Office Expenses* R112mil ki'n ogmante, i kouver *utilities*, alor dan mon konprenezon mwan *utilities e electricity* e delo. Mersi.

**MR SPEAKER**

Minis.

**MINISTER FLAVIEN JOUBERT**

Mersi Mr Speaker. Kot i konsern *Lasemans*, mon krwar *PS Moustache* in eksplike o komansman bann detay lo *Lasemans*, me selman zis pou asir Onorab kot sa size i konsernen, nou annan 20 etidyan ki pe ganny konsider, 20 zenn e nou, nou lentansyon se pou adres bezwen trwa kar



sa bann zanfan, nou'n fini fer plan. E sa nou kapab partaz ek Lasanble pou eksplik zot lekel ki nou pe met diferan pozisyon.

Nou oule ki 15 parmi sa 20 nou kapab *deal* ek zot *case* dan 2020, 2021. E i annan 3 proze lo Mahe, 1 lo Praslin ki anmars lefe ki nou oule. 2 ki'n komanse lo Mahe, 1 pa ankor komanse e 1 lo Praslin e nou oule ki sa proze lo Mahe ki pa ankor komanse i demare pou ki nou kapab *accomodate* ankor 10 etidyan.

E nou ti a voudre ki keksoz i ganny fer an 2021 pou nou kapab met zot, les zot demare lo sa kote.

Ou'n koz lo zil ek bann zenn. Apepre 3 semenn pase koumsa mon ti fer en diskisyon avek *IDC* lo zot bann plan devlopman pou bann zil, zot in donn nou zot bann detay e i paret tre enteresan sa ki zot in prezant avek nou.

E enn bann keksoz ki nou ti koz lo la, se lafason ki nou kapab anmenn bann zenn pour vin bann partisipan dan program *IDC* li menm pour ki zot aprann. E zot a kapab devlop zot bann abilite apre pran sarz zot prop devlopman lagrikiltir.

E sa mon pa pour fer lanons lo proze *IDC*. Mon krwar *IDC* apre i ava fer tou, i ava prezant tou detay son program avek piblik. Me i

annan posibilite pour lentegrasyon zenn.

E fodre ki i annan sa diskisyon pli detaye avek *IDC* pou ki sa program i aktyelman marse ansanm avek Departman Lagrikiltir, ansanm avek Lekol Lagrikiltir pour ki bann zenn i ganny anmennen pou zot aprann bann teknik ek bann aktivite lagrikiltir lo gran lesel. E zot ava osi ganny sa abilite pou zot kapab devlop zot prop proze.

*Levy*, Onorab ou'n demann nou si *levy* i aplik lo lezot prodwi, wi, dapre sa ki mon konpran, alor sa bann prodwi ki tonm. Si ou annan en *heading* bann *code Customs* alor sa bann prodwi ki tonm anba sa *code* par egzantp si ou pe dir tou prodwi *poultry* ouswa ou pe dir *swine*. Tou sa ki kouver anba la i ganny afekte par sa *levy* ki ganny aplike.

Me selman si i Annan en konsern partikilye, si i annan en demann pour adres serten *levy* ki pe ganny aplike petet mal aplike lo enn ou de prodwi, ki nou konnen petet pe ganny servi dan prodiksyon. *Then* sa demann i kapab ganny fer avek *Unit Trade* kot Finans, i ava adres sa direktman depandan lo son merit byensir. Mersi.

Mr Speaker zis pour klarifye, mon'n ganny en

lenformasyon la konsernen *ADF*, mon krwar ti annan en kestyon pli boner lo kantite larzan ki i annan anba *ADF* dan *DBS*. Aktyelman la i R26.3milyon ki la i kapab ganny servi pou *loan* avek fermye. Mersi.

**MR SPEAKER**

Mersi. Wi Onorab?

**HON ANDY LABONTE**

En pti klarifikasyon, *PS* in dir pou dir i annan *utilities* ki'n ganny met, petet si ou kapab gid mwan, akoz mwan mon vwar anba '*office expenses*,' mon vwar *electricity* in ganny met R100mil, e mon vwar *internet* in ganny met R70mil. Me mon pa pe vwar vreman kote ki ou pe dir mwan sa lot petet ou ti kapab eklersi mwan ki bor i ete?

**MR SPEAKER**

Mersi. *PS*.

**MINISTER FLAVIEN JOUBERT**

Speaker, mon kapab demann ou lo ki paz mon pe koze la?

**MR SPEAKER**

Dir li paz, *micro silvouple*?

**HON ANDY LABONTE**

Nou ti pe koz lo *programme 1*, lo sa detay ki nou'n gannyen lo Bidze.

**MR SPEAKER**

Ou annan nimero paz?

**HON ANDY LABONTE**

Lo sa *breakdown* ki nou'n gannyen Mr Speaker.

**MR SPEAKER**

Ok.

**MINISTER FLAVIEN JOUBERT**

Mon a demann *Accountant* pou pas lo la Onorab. I ava petet donn sa klarifikasyon.

**MR SPEAKER**

*Accountant* i a kontinyen pas lo la e nou a kontinyen ek kestyon. E Minis ou kapab enteronp nou nenport ler in pare avek larepons.

Onorab William.

**HON WAVEN WILLIAM**

Mersi Mr Chairman. Bonzour Minis avek ou lekip. Bonzour tou dimoun ki a lekout.

Mr Chairman, mon annan 3 pti kestyon. Premyerman mon ti a kontan demann avek Minis mon'n regard zot manda anmenn tan mon'n regard zot '*strategic priorities*.'

An menn tan mon pe regard realite dan Sesel sa la, resaman nou'n annan bann peser ki'n konplent akoz zot pa kapab vann zot pwason. E mon anvi demann Minis anba sa nouvo lapros ki i pe pran,

eski in pran konsyans sa nouvo realite, sa nouvo normal?

E an menm tan mon'n tan PS Moustache koz lo *backyard*, proze *backyard farming* e mon anvi demande pour dir avek sityasyon aktyel la kot oparavan 2019, nou ti pe ganny nou R360mil touris ti pe antre;- savedir ti koz apepre R30mil touris par mwan avek 90mil dimoun ti pou fer ou ganny 120 dimoun.

So, la demann ozordi avek lavant i pa parey, eski zot, zot pe adapte zot lapros pou kapab *deal* avek realite ki nou bann ferme pe fer fas avek. Sa i mon premye kestyon.

Par egzanp an relasyon avek sa nou pe koz *cold storage*. Akoz si ou pe fer *over production* ozordi, ou mazin sa ferme ki'n pran en *loan* e mon pa pe dir dekouraz bann *backyard farmers* mwan. Me selman eski nou'n fer en evalyasyon sa lenpak sirplis sorti kot bann *backyard farmers* ki al lo *market* an relasyon avek sa ferme ki'n anrezistre ki ozordi li, bann ki annan bann laboutik i *ok* pou zot.

Me ki napa ki pe prodwir *full scale* e ki zot pe ganny forse pou petet prodwir lo en maksimonm lo zot later me zot pe vwar zot dan difikilte. So,

eski zot pe mazin en pti pe lo la.

Dezyenmman, se ki, ki Polisi vizavi privatizasyon? Eski i vre ki zot pe al privatiz *Genetic Centre*, eski zot in annan en dyalog parmi sa kous prodikter lokal, pour asire ki nou kalite lavyann parey nou pe dir pa ganny afekte?

Eski nou'n annan en evalyasyon lo la? E eski zot pe vremen anvi *push* pour sa ouswa zot ankor pe ankor mazine ki zot pour fer?

Finalman Mr Speaker, mon anvi demande pour dir par lefe ki ozordi ferme pe vwar poudir zot pe ganny serten difikilte avek serten bann problem, enn se *market share*. I annan problem avek *market research*, *scientific research* osi, bann *inputs* osi ki pe ganny fer vini, ferme pa pe satisfè avek.

E la mon anvi demande avek Minis, ki mannyer zot pe fer zot *procurement*? E lekel bann endividi lokalman ouswa enternasyonalman ki zot pe deal avek pour asire ki, bann ferme i ganny bann *inputs* ki vremen alaoter pour zot kapab fer zot biznes? Mersi.

**MR SPEAKER**

Mersi Onorab. Minis?

**MINISTER**  
**JOUBERT**

**FLAVIEN**

Mersi Mr Speaker. Mersi Onorab pou ou kestyon. *Market share* mon konnen i en keksoz ki en pe difisil pou serten fermye la e ou annan en konpetisyon ki pe egziste ant bann gro e bann ptipti.

I annan sa bes dan demann pour fri ek legim byensir. Akoz nou konnen ki *tourism* i *down* me nou pou bezwen fonksyonnen osi an realizan ki dan detrwa mwan ouswa dan sa lannen ki pe vini e menm 2022 an montan nou pe ekspekte ki keksoz pou rebran.

E ki i ava annan sa re demaraz lo kote lavant. Nou konnen pou dir la i pa fasil me letan nou plan pour devlopman lagrikiltir nou bezwen plan pour en *market* ki pe vini e non pa zis fer pou sa ki la ozordi.

Me selman mon pou dakor avek ou ki nou bezwen mazin en pe lo ki mannyer nou bann dimoun i kapab asire ki zot bann prodwir i ganny vann. E osi, parey ou ti pe dir i annan sa *size storage* ki nou bezwen mazin lo la.

Mwan mon'n fer serten demann par egzanp avek *STC*, mon'n demann sa kestyon me i sanble ki aktyelman zot pa dan en bon pozisyon pou zot kapab siport fermye lo kote *storage*.

Me enn bann keksoz ki nou bezwen gete se bann

landrwa kot bann fermye i kapab fer transformasyon ek stokaz poudir zot ki dan lagrikiltir lo en nivo pli eleve komersyal, zot kapab annan zot prodwir lo marse a toultan. E zot kapab kontinyen annan sa prezans lo *market* toultan.

Kot i konsern *backyard farming* mon pou demann Mr Moustache pour al ankor en pti pe plis ladan. E ki lenplikasyon *backyard farming* pour prodiksyon nasyonal, me privatizasyon *Genetic Centre* mon krwar i en kestyon ase enportan ki nou bezwen reflexir lo la.

*Internally* dan Lazans, i annan en rapor ki'n ganny fer pour evalye tou bann diferan opsyon lo kote *Pig Genetic Centre* e ki mannyer nou pou adres sa *size*;- enplikasyon bann prive dan prodiksyon koson ki servi koman sours pour devlop prodiksyon dan bann diferan landrwa.

I annan bann enteraksyon ki'n ganny fer avek bann diferan fermye ki enterese. E nou'n vwar ki i annan plizyer fermye ki enterese sirtou pou fer bann sant miltiplikasyon.

Nou konnen pou dir Lazans ek Minister pou bezwen gard en serten kontrol lo sours zannimo ki ganny servi dan prodiksyon. Sa i kler sa.

E ou bezwen annan sa kapasite teknik pour mentenir sa resours pour ki letan sak fwa nou bezwen li nou kapab kontinyen propaz li atraver bann laferm.

Me i annan fermye ki enterese pou fer bann sant miltiplikasyon e nou pou bezwen vin avek en byensir nou bezwen devan Gouvernman avek en model ki nou krwar i kapab marse.

E dapre bann evalyasyon *internet* ki'n ganny fer, en model kot ou annan plis lenplikasyon prive i kapab marse me selman i pa pou en privatizasyon a 100 pousan.

I pou bezwen reste en bout kot ou annan sa garanti ki ou sours i la, e ou sours i pe aktyelman ede pour mentenir prodiksyon e kalite zannimo ki ou pe met lo laferm.

Ou'n koz lo bann *inputs*, mon osi mon'n demann sa kestyon lo kote *inputs*, mon'n demann kestyon atraver Minister Finans lo bann *suppliers* ki pe fer vini *inputs*.

Mon krwar aktyelman, petet PS ya koriz mwan, mon krwar i annan 8 mazer lo bann peyman ki mon'n vwar ki'n ganny fer zot anmenn input dan pei.

Fermye si pa satisfè avek sa bann *inputs*, mon krwar i en kestyon ki devret retourn, i bezwen retourn kot lagrikiltir li menm pour li kapab evalye.

Me pou le moman la mon pa'n ganny bokou bann konplent lo kote *inputs*, mon konnen i annan problem konsernan lagrenn. E sa i en keksoz ki nou bezwen adrese son sours kot nou pe enport li, lafason kot nou pe stok li, kantite letan ki nou pe gard li avan ki nou vann.

Mon konnen i annan fermye ki pe konplent poudir lagrenn ki zot pe aste i pe vremen pa pe zermen e zot pe perdi en kantite. Akoz zot pe aste en bon pe a en bon pri es a i per fer ki zot pe perdi larzan lo la.

Me mwan non ti a kontan ki nou reget nou bann *inputs* ki nou pe *supply* fermye e osi ki nou reget nou bann *suppliers*. Akoz petet nou kapab konekte avek bann *suppliers* ki donn nou en pli bon pri.

Akoz letan ou pe gete avek sa bann sityasyon *Exchange Rates* ki nou annan la, i posib ki nou kapab fer plis *savings* e nou kapab aranz nou en pti pe plis lo kote sa ki nou pe met lo *market*.

E enn bann keksoz ki partikilyerman konsern mwan ki mwan mon'n obzerve se ki, nou bann pestisid ki nou pe servi mon krwar ti a bon reget en kou nou lalis.

Ti a bon nou vin avek en nouvo lapros e ti a bon nou *supply* bann fermye avek bann

nouvo opsyon lo kote kontrol *pest*. Akoz i annan bann opsyon dan lemond ozordi ki nou kapab akse li e distribye avek nou bann ferme pou ki zot kapab kontrol *pest* dan en fason efikas, san ki nou met an danze nou lekor ouswa lanvironnman.

Alor mon krwar i annan en pe travay ki nou kapab fer lo *inputs*. Langre, *fertilizer* e osi pestisid mon krwar i annan keksoz ki nou kapab fer.

E nou kapab osi parey ou'n sizere et bann lezot *suppliers* lo marse lokal ki kapab travay avek nou, sa *supplier* enternasyonal ki kapab travay avek nou pou nou ganny bann pli bon prodwir lo *market* pe servi ki ferme i kapab servi.

Me mon ti a demann *PS* pou kapab koz en pti lo *backyard farming* vi i ou'n koz lo son lenpak, lo *supplier* ki lo *market* e son size konpetisyon avek bann ferme ki pe plant lo en baz komersyal. Mersi.

### **MR SPEAKER**

Mersi Minis. *PS*?

### **PS ANTOINE-MARIE MOUSTACHE**

Mersi Onorab Chair. Konsep deryer *backyard farming* oubyen plant deryer lakaz sete pou alimant pou lakwizin, alimant lasyet. E sa i reste fondamantal. E mon krwar sa

nosyon plis ki zanmen i enportan mentnan e donk kot dimoun i war li mal petet pou tir sa larzan dan pou aste sa keksoz laba deor nou krwar ki i annan tou kapabilite pou kapab fer li.

Me mon kontan pou dir dan en tel demars ki kapab deborde e ki kapab deborde kot i vin en konpetisyon avek sa ki ladan dan komersyalman.

Donk i pa nou swe ki sa i vin petet lareg, me dan ka ki i arive petet i pa pou ariv avek tou bann prodwir petet serten prodwir ase a serten moman. Me lide i reste fondamantal se pou kapab siport sa fanmir ki pe vwar li mal mentnan spesyalman mentnan pou tire pou al aste sa keksoz laba deor. E i donn li sa kapasite deryer lakaz pou met en pti keksoz e sete sa lide deryer sa. *Ok?*

Zis pou reponn en lot kestyon ki en lot Onorab ki ti poze konsernan '*office expenses*.' Annefe, batiman ki nou pe lwe, nou lwe avek en *landlord* dan ki delo i form parti sa *rent*. *Ok?* E donk se zisteman se sa ki arive, dan en sityasyon kot petet *internet*.

E tou i konsernen nou pou kontinyen valoriz sa fon ki nou met a nou dispozisyon ziska ler petet nou ariv ziska *mid-year review*, kot nou kapab revwar sa.

Me an menm tan osi nou osi kapab fer *virement* nesese dan bann fon ki petet reprezant resours sifizaman pou kapab kouver sa itilite ki nou apel *internet* e telefonn. Mersi.

**MR SPEAKER**

Onorab Labonte mon krwar ou kestyon in ganny reponn non?

**HON ANDY LABONTE**

Zis en pti klarifikasyon akoz mon pa ti ankor fini, i pa tin donn mwan larepons Mr Speaker. Si mon kapab silvouple. Permet mwan.

**MR SPEAKER**

Ale.

**HON ANDY LABONTE**

Ok PS. Premyerman i si nou ti kapab konnen lekel sa dimoun ki zot pe lwe *building* avek? Apre i enportan letan nou demann kestyon si zot napa vre larepons ki nou ganny larepons ki konkret. Mersi.

**MR SPEAKER**

Sa dernyen pwen mon pa vwar akoz ou pe fer, akoz mon sipoze zot pe donn repons konkret Onorab.

Minis oubyen PS Wi? Oule zis eklersi son pwen lo avek ki zot pe lwen batiman.

**MINISTER** **FLAVIEN**  
**JOUBERT**

Mr Speaker, zis pou klarifye lofis Lagrikiltir i dan *Le Chantier Mall e landlord* se byensir *Pension Fund*.

**MR SPEAKER**

Mersi. Onorab Uranie.

**HON ROCKY URANIE**

Mersi Mr. Chair. Bonzour Minister avek delegasyon. Bonzour spesyal tou Digwa. Kouraz pou bann i ankor pe rod en lanplwa.

Minister, Premye i en *request* sorti kot Digwa ki pe demann ou en leksplikasyon pour kwa ki La Digue *Business Association, Club Cars ek Taxi Operators* ki ti ganny envite pour sa *meeting* Sanmdi vi ki ou ti la pe koz lo proze *sewage* ki pou afekte tou Digwa. Selman zis en pti group ki ti ganny envite?

Mon premye kestyon, eski zot in fer en resers lo La Digue pour vwar kote i annan later potansyel pour lagrikiltir.

Dezyenm, ki ou Minister pe fer pou asire ki annan plis sinerzi ant bann fermye Digwa e zot *main* konpetiter L'Union Estate. Apre dan menm laliny ki Hon. Chantal Ghislain ki pa'n mank sa sans pou koz pou zabitan Grand Anse Praslin.

Fermye Digwa pe demann sipor ki Gouvernman i kapab donner pou ed zot vann zot prodwi? Apre

Minister lo en not remersiman, bann fermye i dir ou mersi pou sa masin *rotovator* zot pe byen servi li pou prepar zot teren. Mersi Mr Chair.

**MR SPEAKER**

Mersi. Onorab.

**MINISTER FLAVIEN JOUBERT**

Mr Speaker. Mersi Onorab pou sa bann pwen ki ou'n fer pour sa bann kestyon.

Lenvitasyon pou *meeting* Sanmdi, mon ti dan *meeting* Sanmdi koman Minis ki *oversee PUC* e mon ti la dan sa kapasite, mon ti ganny envite par Minis, se Minis pour Transpor ki ti'n organiz tou sa bann miting e ti i demann mon prezans akoz i annan pour fer avek semen ek *network sewage* anmenn tan.

Me pa mwan ki ti fer lenvitasyon alor i pa neserman mwan ki ti organiz sa *meeting*. Resers pou later lagrikiltir, later ki annan potansyel pou fer lagrikiltir lo La Digue wi nou'n fer serten demars la resaman. Mon donn ou 3 legzanp;- i annan later Grand Anse La Digue ki nou'n fer en diskisyon e mon konnen i annan size legal ki vin avek, sa nou pe gete.

E nou bezwen esper bann dimoun legal fini *deal* avek sa *case*. I annan en lot landrwa dan milye, mon pou

ganny en pe difikilte pou mwan eksplike kote, me selman kot i annan serten demann pour formaliz seren fermye ki pe prodwir en pe dan milye La Digue e Lazans Lagrikiltir i an kontak avek zot, sa bann dimoun zot konnen lekel zot, mon pa tro rapel zot non en.

Me apre osi nou annan en demann ki nou'n fer avek L'Union Estate pou nou get bann later par deryer L'Union e sa demann i ankor avek *Chairman ek Board* L'Union, me nou pe swete si sa i abouti nou pou kapab servi sa pour deblok serten problem ki nou pe gannye lo La Digue lo kote demann ki dimoun in fer pour later lagrikiltir.

Me mon pa pou kapab fer en deklarasyon deswit, mon bezwen esper L'Union byensir fer tou son bann deba entern e apre i avar donn nou en larepons lo la.

Sinerzi ant bann fermye lo La Digue avek zot *main* konpetiter L'Union Estate, mon'n zwenn avek bann dimoun La Digue, bann fermye La Digue e mon'n zwenn avek L'Union Estate, me nou pa'n asize pour nou fer en diskisyon ant sa de.

Me anvi ki landrwa i pa gran, marse li menm i limite e tou dimoun pe akse menm marse lo La Digue, mon krwar i pou enportan pou nou fer en



diskisyon. E sa mon avar pran dan nou lot diskisyon ki nou avar fer avek zot.

E sipor pou vann prodwir, deza enn bann desizyon ki mon ti fer letan mon ti vini lo kote Grand Anse Praslin se nou ti annan en bann demann ki ti pe ganny fer atraver lasosyasyon fermye pour *access* sa Bazar Grand Anse Praslin.

Nou'n fini donn avek zot sa Bazar Grand Anse Praslin pou zot kapab servi. E tou dimoun ki bezwen en lespas zot kapab vin la e organiz zot e vann bann prodwir lo Bazar Grand Anse Praslin.

Savedir nou, nou'n fini *handover* sa Bazar Grand Anse Praslin avek Lasosyasyon Fermye Praslin, Lasosyasyon Fermye pa Lasosyasyon Fermye Praslin, pour zot kapab akse li pou bann dimoun ki bezwen fer lavant zot bann prodwir.

E nou'n ensiste avek zot se ki i pa zis pou bann dimoun ki Manm Lasosyasyon Fermye, me i pou fermye. Me, selman zot ki bezwen organiz zot e tonm dakor lo ki mannyer zot pour servi sa lespas.

Me zot annan zot *full liberty* pour zot organize e vin avek en plan ki mannyer zot pou servi sa lespas pou vann zot bann prodwir. Mersi Mr Speaker

### **MR SPEAKER**

Mersi. Wi Onorab, klarifikasyon?

### **HON ROCKY URANIE**

Mersi Mr Chair.

Minis ou pe koz sa Bazar i Praslin ou? Konmsi ou pe dir sa bann fermye La Digue i bezwen bouz Praslin pou al vann zot prodwir?

### **MR SPEAKER**

Minis? Minis?

### **MINISTER**

### **FLAVIEN**

### **JOUBERT**

Petet Mr Speaker. Mon pou klarifye la. Letan Onorab in nonm lager pour fermye Grand Anse Praslin, mon ti krwar ou pe refer lo fermye Grand Anse Praslin.

Me, pou fermye La Digue byensir, mon krwar i annan serten, serten limitasyon ki nou bezwen travay lo la ansanm avek zot. Parey nou pe mazin adres problemn bann fermye Praslin.

Nou bezwen kapab mazin pran Praslin ek La Digue ansanm e get bann kontrent ki bann fermye pe gannyen pou vann. E sirtou parey ti ganny leve pli boner akse avek marse lo Mahe kot pli gran posibilite i la.

Alor sa mon krwar i en keksoz ki nou pou bezwen fer e dan bann diskisyon nou avar

rode ki manner, ki bann mekanizm ki nou kapab servi pou vreman siport bann ferme.

Me, zis pou donn ou en lendikasyon bann keksoz ki nou pe konmans fer, bann ferme La Digue in endik avek nou ki zot ganny difikilte par egzant pou zot vin lo *Store Praslin*, Grand Anse Praslin pou ganny prodwir. Nou'n fini fer laranzman ek L'Union Estate, nou'n ganny en Store L'Union Estate.

E aprezan nou zofisye letan i monte i anmenn zot bann prodwir sa lo bato e i delivre avek zot lasose. Swa i stoke L'Union Estate e sa bann dimoun i kapab Access zot prodwir L'Union Estate menm.

E zot pa bezwen desann Praslin ditou pour vin aste okenn prodwir eksepte dan bann ka - par egzant si i annan serten prodwir spesifik si zot bezwen swa Mahe ouswa Praslin.

Me la pli par bann prodwi ki lo *store* zot kapab zot kapab akse li dapre sa *store*, *from* sa *store* ki nou'n deza fini tonm dakor avek L'Union Estate lo La Digue menm. Mersi.

### **MR SPEAKER**

Onorab Loizeau.

### **HON NORBERT LOIZEAU**

Mersi Mr Speaker. Bonzour Minis ek ou delegasyon.

Mr Speaker avan mon demann mon kestyon, mon oule refer lo en pti pwen ki Onorab Uranie in dir konmansman son kestyon. In dir kouraz pou bann dimoun ki napa en lanplwa. E mwan mon anvi dir kouraz pour bann dimoun ki napa en lanplwa me ki pe rod en lanplwa, ki pa pe esper lanplwa vin kot zot. Mersi.

**(APPLAUSE)**

### **HON NORBERT LOIZEAU**

Mr Speaker, prezan mon pou swiv lo mon kestyon, i annan en konsern parmi bann pti ferme ki i annan bann gran ferme ki zot osi annan *license* lenportasyon e ki i arive zot fini get zot prodwir ki tel sezon zot pa pou *meet* sa demann lo *market* alors zot enport sa bann prodwi e sa i met sa bann pti ferme an dezavantaz.

Mon anvi demann Minis ki son Minister pe fer pou adres sa sityasyon? Sa i enn.

Mon dezyenm kestyon i relye avek kestyon ki Onorab Aglae ti demande pli boner, konsernan *F1*, bann *zone* forestye, vi ki Port Glaud, Bel Air nou baliz ansanm e tou sa bann landrwa forestye sa 2 distrik i zwenn.

E sa kestyon, depi dan 6enm Lasanble in vin devan, nou'n met devan kan Minis

Bastienne ti Minis pour Lagrikiltir, e sa ki i ti dir nou se ki i pou *liaise* avek Departman Lanvironnman pou zot kapab fer en resers lo sa sityasyon pou vwar kwa ki zot kapab fer dan sa domenn.

E vi ki Minis ou'n dan Lanvironnman en bon pe letan, mon anvi demann ou si vreman in annan sa konversasyon ant zot de, ouswa zis Minis Bastienne in anvi zis en parol zis pou satisfè nou.

E mon trwazyenm kestyon, Minis i annan dimoun ki dan lepase in anvi en bout later pour plante. Me selman zot pa'n kapab gannyen anba lot administrasyon. Me i annan, dan mon distrik, sa i relye dan mon distrik Bel Air, i annan serten zenn ki anvi plante i annan ki'n zis mont lo en later Anse Louis e konmans plante.

E a lafen zot napa lot swa zot in bezwen donn li. Me la en sityasyon ki pe devlope dan mon distrik Bel Air spesyalman Sans Souci, i annan zenn ki anvi plante. I annan en zenn ki annan plis ki 10an in demande, in pa'n gannyen, me i annan plis ki 10an ki in fer li in mont lo en later anviron 300met avek Danm e in plante e i pe fer byen.

In fer demars avek Minister Later pou ganny sa

landrwa pou li kapab batir son bann *shade house* ziska aprezan i pa ankor tann naryen. Ki zot, zot Minister i annan pour fer pour sa bann dimoun ki dan sa kategori? Eski zot annan serten lasistans, siport pour sa bann dimoun? Sa mon trwazyenm kestyon. Mersi.

### **MR SPEAKER**

Mersi Onorab. Wi Minis?

### **MINISTER FLAVIEN JOUBERT**

Mersi Mr Speaker. Mersi Onorab pou ou kestyon. Kot i konsern lenportasyon e dezavantaz ki bann pti fermye i gannyen avek bann gro fermye ki pe osi prodwir e pe enporte, mon krwar sa i en kestyon ki nou bezwen nou bezwen travay lo la anmezir nou kontinyen devlope Lagrikiltir dan pei.

Nou konnen sa ki fer lenportasyon i pe fer li lo en baz koman en komers. I pa neserman en fermye letan i pe enporte li. Mon krwar i bezwen en *license* separe, petet PS Finans, i kapab koriz mwan, i bezwen annan en lot permisyon pou li enporte e i pe *operate* parey en enportater.

E nou konnen sa i vin en dezavantaz pour bann pti fermye e nou pou bezwen travay avek bann diferan dimoun, pour nou fer sir ki sa

ki pe enporte pa pe vremen touy bann pti fermye.

Me selman parey mon'n dir pli boner, enn bann keksoz ki, mwan mon santi letan mon'n koz ek bann dimoun dan Lagrikiltir, ki i bezwen arive se ki bann dimoun ki dan prodiksyon zis prodiksyon laferm, pour zot ganny en benefis fodre ki zot pe entegre. Fodre zot pe entegre avek lavant, fodre zot pe entegre avek transformasyon.

E sa bann dimoun ki bann gro fermye ki pe prodwir e i pe osi vann, i pe osi enporte la, zot pe fer sa zot. E alor nou bezwen ankouraz osi nou bann pti fermye pou zot pa zis fer prodiksyon zis laferm, me zot bezwen osi pe mazin antre dan sa lot bout pour zot kapab osi *capture* en pe sa *market*. Akoz sa kwa zot pou zis reste deryer zot tousel.

Alor, i annan plizyer keksoz ki bezwen ganny fer lo tou le de kote pour travay avek bann ki pe enporte e petet vwar ki kantite zot kapab enporte .

Me osi ed bann fermye ki vwar zot ptipti ki anvi grosi pou zot kapab grosi e servi sa bann loportinite ki annan lo market pou zot etablir zot lekor, akoz i annan en kantite lavantaz ki bann dimoun i annan ki pe prodwir lokal.

Mwan mon'n koz avek serten propriyeter lotel par

egzanp e zot endik ou pou dir si en dimoun pe prodwir lokalman e son prodwir i bon kalite, i definitivman dan en lavantaz konpare avek prodwir enporte kot ou pa konnen kot i sorti. Me fodre ki nou kapab travay lo sa bout e fer ki sa bann dimoun i annan zot bout marse, ki pa pe ganny afekte par sa bann lenportasyon.

Dezyenm pwen kot i konsern *F1*, bann zonn *F1*. Eski nou pour, eski sa resers in deza ganny fer dan le pase? Mon pa tro okouran, mon pa konnen si in ganny fer, mon pa konnen si in ganny fer, me selman mon napa lenformasyon lo la.

Mon prezimen si petet i pe fer, si in ganny fer, in ganny fer pou serten ka spesifik me selman mon pa konnen.

Kot i konsern later pour *farming*, bann dimoun ki pas en long letan lo lalis espere, sa i enn bann keksoz ki gete letan bann nouvo posibilite i egziste pou ganny later lagrikiltir. Bann dimoun ki'n la, pou plis letan, sanmenm sa bann ki ganny donner priyorite.

Me selman la ou pe koz lo en *case* kot en dimoun in antre e in konmans plante e apre nou bezwen donn li en pe sipor. Mon krwar nou bezwen sipor li byensir, kot sipor i merit, petet ou a donn mwan en pe detay sa enn ka. Me an menm tan, nou bezwen fer sir

ki nou pa ganny bann sityasyon kot dimoun i antre partou lo later e nou vwar nou ek bann difikilte akoz i annan bann posibilite ki menm zot menm zot pe antre lo later prive tou.

Akoz pa tou later ki dan *National Park* ki later Gouvernman. Se i posib. Ki nou pe fer en keksoz ki apre i pour kre en difikilte pour nou menm e pou sa dimoun. So, foudre nou fer sir kwa ki nou pe konsey li fer letan i pe fer sa *move*.

So, me selman sa enn ka ou avar donn mwan en pe detay. Nou avar gete ki kalite sipor kot ki nou kapab anmennen pour sa enn pou nou ed li, li osi ou devlop son laferm si vreman tou bann keksoz i annord. Mersi.

### **MR SPEAKER**

Ki klarifikasyon Onorab?

### **HON NORBERT LOIZEAU**

Minis Mersi.

Pou sa later ki mon pe koz lo la Sans Soucis, i en later Gouvernman e menm Minis, e menm ti annan provizyon ki ti pe ganny fer atraver *MLUH* pour li kapab ganny *allocate* sa later me apre keksoz in tonm dan delo, me selman elektrisite in arive, zis semen ki pa ankor arive.

E mon ti a kontan Minis, ti enteresan ki en zour mon

avar anmenn ou, ou menm ou, ou pou vwar pou ou menm ki mannyer i enteresan ki sa zennonm pe fer Michael Belle annefe, ki pe fer sa proze. Mersi.

### **MR SPEAKER**

Minis a note. Nou a pas on Onorab Gabriel.

### **HON CONRAD GABRIEL**

Mersi Mr Chair. *Welcome* Minis ek ou delegasyon.

Minis nou'n tann bokou, depi bomaten, nou'n tann koz lo fermye prodwir plis. Mwan mon pe *stick* lo en *issue*, i annan sa zafer *agro processing* ki nou'n koz lo la.

Prodwir plis, nou a ganny benefis adisyonnèl, valer azoute eksetera.. Mwan, mon konsern se ki dabor en zabitan Pointe Larue okenn i annan sa *Agro Industry* ki ti la.

Si nou pe demann fermye pou prodwir plis, i kapab ariv en moman letan kot i pou napa landrwa pou vann, demann mannyer i ete i pou en pe *tight*, nouvo normal la. Mwan mon stress ou konnen petet ou pa ansarz batiman.

Me selman avek *current challenges* ki i annan la ti a bon nou remet an plas sa *manufacturing industry*, kot Seselwa i santi li kapab prodwir plis.

E i pou annan en landrwa pou li vann son prodwir e sa i osi ede zabitan mon distrik vi ki nou napa en gran sipèrfisi, i napa gran landrwa pou plante, nou teren i *tight*.

Me selman nou avar annan en landrwa kot larestan Onorab ki pe prodwir Anse Boileau, Takamaka partou i avar annan en landrwa kot i anmenn son prodwi pou li kapab ganny vann. Mwan kit sa ek ou Minis. Ou ava get ladan en pti pe.

E mon dezyenm pwen i konsènan fermye ki dan prodiksyon *pork*. E nou aprann ki annan en pe *issue* pou zot ganny bann pti koson pou prodiksyon.

Mon ti a kontan konnen ki ou Minister anvizaze fer pou sa *pig breeding process* pou nou kapab *achieve* nou lobzektif prodwir plis lokalman? Mersi Minis.

### **MR SPEAKER**

Mersi Onorab. Minis.

### **MINISTER FLAVIEN JOUBERT**

Ok Mersi Mr Speaker. Mersi Onorab pou ou kestyon.

*Agro Industry* i en keksoz dan lanmen Minister ki responsab pour Later ek Lenfrastriktir. I annan serten lanvi mon santi pour servi sa landrwa me pa pour met *agro*

*industry* debout, me pou servi sa landrwa pour benefis diferan group dimoun enkli bann dimoun ki dan lagrikiltir.

I en diskisyon ki mon pou bezwen annan ek sa Minister e osi Gouvernman an antye pou vreman konpran ki nou pou fer avek sa landrwa me i kapab ganny servi, i en opsyon pour ganny servi me remet *agro* li menm lo son lipye.

Mon pa konnen si tou dimoun pou an faver. Mon pa konnen ki bann lopinyon ki laba deor ki lo kote *manufacturing* par Gouvernman.

Dan mon lespri i kapab ganny fer byen par prive. Donn li fasilite e donn li lezot kapasite pou li fer li e les bann dimoun ki dan prive fer li.

E zot ava osi grandi dan zot biznes petet i kapab enplik dimoun ki deza dan lagrikiltir pour fer li. Alor i en diskisyon ki nou kapab fer avek Gouvernman, me pou fasilite lavi bann prive pou zot entegre dan transformasyon.

E osi distribisyon bann prodwir lagrikiltir. Mon avar les *PS Moustache* lo pti koson ek *supply* pti koson pour bann laferm. Mersi.

### **MR SPEAKER**

Mersi. *PS*?

**PS ANTOINE-MARIE MOUSTACHE**

Mersi Onorab Chair.

Demars ki nou'n diskite resaman dan Minister, ki nou'n rekonnèt pou dir *supply* pti koson i en kontrent aktyel la. E petet pe limit kapasite nasyonal pou ariv target ki nou'n tin pas lo la.

Donk nou oule pran en lapros diferan mentnan pou al ava se pou angaz prive ki deza dan prodiksyon pour premyerman a en premye nivo vin bann sant miltiplikasyon.

Alor, ki nou pou fer donk, nou pou annan en lagreman avek dimoun ki'n idantifye e ki pare pou fer li. E sa bann sant miltiplikasyon se pour prodwir sa ki nou apel *pure line* ki vant, anvant avek leres dimoun ki dan prodiksyon pti koson.

Sa osi se en demars ki nou bezwen osi angaz dimoun ki enterese pou fer sa. I annan detrwa dimoun ki'n deza donn nou lenpresyon ki zot pou enterese avek sa.

Donk se pour pourswiv avek sa parke parey ou'n rekonnèt, nou osi nou vwar ki petet sel fason pou al avan se pou demokratiz sa prodiksyon pti koson, koumsa nou tir li koumsa nou tir li selman dan en sours me eparpiy li avek prodikter ki avar enterese pour fer sa. Mersi.

**MR SPEAKER**

Mersi. Onorab Henrie.

**HON GERVAIS HENRIE**

Mersi Mr Chair. Bonzour tou dimoun. Minister Chair, mon'n not labsans bann *SDG Target* dan nou deba Bidze depi ki nou'n konmanse e Lagrikiltir i enn bann landrwa kot mon krwar nou bezwen lev sa size aköz azanda devlopman soutenab 2030 e osi lagreman *Paris* lo sa sanzman klima, i rekonnèt ki sekirite alimanter e zesyon resours natirel pa kapab kontinyen ganny separe.

Mon pe lev sa aköz Mont Buxton nou napa bokou later e landrwa pou plante, selman nou annan Mont Signal ki en fore e i annan en landrwa, en *hidden treasure* Mont Buxton ki apel Zarden Nwar kot *back in the '60s and the' 70s* bokou dimoun ti reste e ti prodwir bokou sa ki nou apel an kreol 'viv.'

Dimoun e i mont dan bwa e i rekolte. So, mon anvi konnen dan zot, letan mon pe get zot manda si zanmen i annan posibilite pour eksplwat *agroforestry* dan Sesel e mon anvi ki mon distrik Mont Buxton i ganny konsidere seryezman koman en *pilot project* pou sa kalite devlopman.

Aköz i pour anmenn en loportinite biznes pour

Kominote e partikilyerman bann zenn, mon pe mazin bann dimoun parey Ted anler Mont Signal ki enterese avek Lagrikiltir. So, *agroforestry* ki zot manda ki zot kapab fer. E ki distrik i a benefisyé. Mon premye pwen.

Dezyenm pwen lo kestyon valer-azoute, zot *sister Ministry* Lapes ek Lekonomi Ble pe fer valer azoute vin an vog. E mon vwar i annan posibilite osi dan Lagrikiltir akoz deza Sesel i annan en *line of product, local product*, graton, sosis, bouden, bann keksoz koumsa ki si nou donn valer, bokou plis dimoun ava kontan ankor pour konsonm sa bann prodwir. So mon anvi konn zot lopinyon lo la, koman zot manda i kapab ede dan sa direksyon?

E dernyen pwen Mr Chair, i annan en kestyon kominikasyon, non selman sa Minister, me *across Government* mon krwar, sa i bezwen ogmante pou asire ki dimoun i ganny the *right information*.

I annan en konsern la ki'n vin kot nou ki i anba *ADF* en dimoun i oule fer vini en pti trakter, i ganny dir i pa kapab. Mon al lo son *website* atraver *DBS*, mon vwar poudir i met "*equipment and machinery*" be selman apre *on the ground*

dimoun pe ganny lot lenformasyon.

So si nou ti kapab armoniz kominikasyon asire ki tou dimoun pe koz menm langaz, mon krwar i ti pou redwir en kantite bann kestyon ki'n ganny demande depi bomaten. Mersi.

### **MR SPEAKER**

Mersi Onorab. Minis?

### **MINISTER FLAVIEN JOUBERT**

Mersi Mr Speaker. Mersi Onorab pou ou bann kestyon ki ase enteresan.

*Pilot Project* pour *agroforestry* lo kote Mont Buxton parey ou'n fer remarke, *agroforestry* i posib dan plizyer landrwa kot menm si nou napa later lagrikiltir, mon krwar plizyer Onorab in lev sa pwen.

E mon krwar nou kapab fer li dan sa bann distrik ki nou napa sa bann fasilite, me kot nou annan sa bann lespas fore ki *available* pou nou fer sa bann travay.

So i en sizesyon ki mon krwar i kapab fer tre fasilman dan distrik Mont Buxton. E ou ti'n demann mwan en kestyon lo kote *value addition*. *Value addition* ou'n koz lo lapes. E mwan enn, enn bann keksoz ki mon'n servi konmsi dan sa refleksyon lo *value*



*addition* se vreman sa ki pe pase dan lapas ozordi.

Dan lapas keksoz pe avanse, kot nou konmans war lo marse lokal bann prodwir transformen, ki pe aktyelman konmans vin aksesib toulezour dan magazen. I nepli lo bazar i bann keksoz ki ou war toulezour dan magazen.

E ki pe aktyelman met en presyon lo bann pri enporte prezan e mon krwar lagrikiltir i devret vin parey. Nou bann prodwir lavyann ki nou abitye avek nou merit war li toultan lo *market* me i annan nouvo prodwir osi ki kapab antre.

Nou war *frozen veg* par egzanp ki dan en kantite ka nou kapab annan sa bann prodwir i ganny fer lokalman. Akoz i pa pran bokou zefor pou fer li. Deza i annan dimoun pe fer serten, me i kapab ki i ganny fer lo en pli gran nivo.

Lo sa zafer lo sa size *value addition*, enn bann keksoz ki mon'n konmans en diskisyon avek Minis ki responsab pou Lenvestisman ek Lendistri, se eski nou pa kapab trouv bann lespas an deor lavil par egzanp, kot nou kapab donn permet bann dimoun etabli zot lekor.

Petet nou bezwen kre serten fasilite, petet nou bezwen fer li parey nou'n fer avek lapas, dan serten ka kot nou kree bann sant bann

pwen, kot dimoun prezan i vini i etabli son lekor e li i vin pran biznes dan sa landrwa.

So nou pou bezwen mazin lo la, e nou pou bezwen met, met zefor pou nou kapab kree sa bann lespas e donn dimoun posibilite pou zot fer sa bann transformasyon ek sa bann, sa bann prodwir pou met lo marse lokal.

Praslin nou bezwen mazin lo en refleksyon, eski nou pou zis transport prodwir sorti lo laferm pou vin Mahe, ouswa eski nou kre posibilite pou dimoun transform son prodwir lo Praslin menm, e apre fer li desann konman en prodwir ki'n fini pare, pou al dan, dan magazen ;- par egzanp pou al dan distribisyon. E sa osi mon krwar i en keksoz ase enportan. E lot keksoz lo kote value addition ki mon ti a kontan azoute se ki ozordi nou pe get labatwar Baie Ste Anne ki nou le konplete.

E nou pe get en nouvo labatwar pou Mahe, eski nou pou fer en labatwar debout tousel ouswa eski avek sa labatwar nou pou met nou pou permet sa ki pe *operate* sa labatwar annan en fasilite pou li transformen. Akoz nou konnen ozordi poudir bann prodwir lavyann ki'n transformen son marse i bokou pli enteresan ki bann prodwir ki zis ler laform ankor,

ankor parey i ete sorti labatwar.

Alor nou pou bezwen mazin sa osi e fer ki nou annan bann diferan posibilite, dimoun ki pe prodwir legim, dimoun ki pe prodwir fri, dimoun ki pe prodwir lavyann.

Pou zot kapab transform zot prodwir e lenportans se marse. E fodre zot prodwi i kapab ariv lo marse. I kapab reste lo marse dan en fason kontinyel e non pa vin dan en keksoz ki ou plante ozordi ou sey vann ou pa vann e i gate, so nou bezwen fer sir ki sa i arive.

Lenformasyon Onorab, mon pa konnen ki'n arive dan sa ka partikilye, me mon osi okouran ki poudir lekipman i sipoze ganny kouver dan sa *loan*. E i merit ganny kouver dan sa *loan*.

*PS* Thesee in diskite ki i annan serten diskisyon ki nou bezwen fer avek *DBS*, pou nou asire ki sa prosis donn *loan* bann dimoun i mars byen.

E ki bann baryer i ganny tire. E petet sa i enn bann keksoz ki nou bezwen dan sa bann prosis, pou fer sir ki bann dimoun i konpran byen kler byen boner. E zot pa ganny bann larepons ki kontradiktwar.

Me selman nou kapab aktyelman petet kapab anvoy mwan lenformasyon pou sa enn ka, nou ava trouve

egzakteman kwa ki pe anpes sa dimoun ganny son *loan*. Akoz mon konnen poudir lekipman definitivman i ladan. Mersi.

### **MR SPEAKER**

Mersi. Onorab Pillay.

### **HON SEBASTIEN PILLAY**

Mersi Mr Chairman. Mr Chairman mon pou demann Minis detrwa kestyon akoz mon krwar personn pa'n tous lo sa bann pwen, mon pa konnen si zot in touse si zot in reponn eskiz mwan.

Premyerman Minis konbyen dimoun i annan dan Departman Lagrikiltir? *Ok*, wi mon ti a kontan konnen konbyen dimoun i annan dan Departman Lagrikiltir, akoz ler mon pe get, ler mon pe get Bidze 2021, ler ou tir sa bann kou *rent* transportasyon e *maintenance and repairs* nou pe war en Bidze *around* 1.5milyon.

So sa i fer mwan, mazin poudir i annan konbyen i bezwen annan en pti git dimoun ki pe travay laba. E mon prezimen lamazorite dimoun i dan *SAA*, akoz li i en lazans enplimantasyon.

Be sa rol Polisi se sa rol Minister e tou sa bann kestyon ki'n ganny demande depi sa enn ziska sa enn dernyen la, se Minister ki bezwen fer.

So oli dimoun dan, dan Minister, dan sa Polisi *brain* sa Minister pou fer sa travay? Sa i mon premye kestyon. Mon dezyenm kestyon i relye avek lefe ki Minis ou sipoze sa dimoun ki responsab pou *Livestock Trust Fund*.

Eski *Livestock Trust Fund* ler ou'n antre Minis oubyen *from now* pou ganny mete anba kontrol Minis pour Lagrikiltir, parey i devret dapre son, dapre son Lalwa ki ti pase an 2020 dan Lasanble?

E ki prezan Minis ou a *more aware* lo bann eleman ki pe depanse, malgre ki'n ganny *spread* dan Bidze SAA, akoz se SAA *obviously* ki fer lenplimantasyon pou bann pou Minister Lagrikiltir.

E mon dernyen pwen *Minister*, akoz en Bidze Lagrikiltir i enportan e Bidze Departman Lagrikiltir nou pe rod son lenportans akoz nou bezwen vot sa Bidze Departman Lagrikiltir.

Akoz nou bezwen konpran ki rol sa departman pou zwe si Gouvernman in dir prezan i pe pran SAA i pe met, i pe met anba la. Eski sa i nouvo direksyon ki nou pe pran? Mersi Mr Chairman.

### **MR SPEAKER**

Mersi Onorab. Minis wi.

**MINISTER** **FLAVIEN**  
**JOUBERT**

Mersi Mr Speaker. Mersi Onorab pou ou kestyon. Premye kestyon ou ti demande konbyen *staff*, i annan 6 *staff* aktyelman dan Departman Lagrikiltir.

E ou pe demann kestyon lo oli dimoun pou enplimant sa bann Polisi. Byensir aktyelman avek sa 6 *staff* mon annan en serten kapasite pou enplimant Polisi, me en pe sa kapasite pe ganny servi dapre sorti depi Lazans.

Me parey ou konnen i annan en lentegrasyon ki pe al ganny fer ant Lazans ek Departman. Ki fer tou sa bann dimoun prezan pou ganny servi dan diferan fason, pou kapab devlop bann, devlop bann *Policies*.

Me zis pou reasir ou ki en bon pe bann lenformasyon i sorti kot Lazans e apre se bann dimoun kot Departman ki, ki fer sa travay.

Me alor mon krwar avek sa reorganizasyon ki pou arive, nou pou nepli annan sa pti Departman ki annan 6 dimoun, me nou pou annan en morso dan en Departman Lagrikiltir ki *focus* lo Polisi.

E mon krwar sa i ava kapab ed nou osi, pou anmenn serten rakoursi zistans ki egziste ant Departman Lagrikiltir avek SAA lo serten ka.

Kot i konsern *Livestock Trust Fund* mon pa konnen si

mon'n reponn tou ou bann pwen la Onorab.

Me kot i konsern *Livestock Trust Fund*, kontrol Minis wi i annan bann tranzaksyon *Livestock Trust Fund* ki pas kot mwan konman Minis pou sertifye pou fer ale.

Sirtou bann *levies* ek bann *subsidies*. E me selman i annan enlot *Livestock Trust Fund* ki konsern bann proze ki pe ganny enplimante la aktyelman.

E mon parey mon'n dir pli boner, enn bann keksoz ki mon'n met devan Minsiter Finans e ki mon le ganny sa *Livestock Trust Fund* dan tou son detay, pou ki vreman mon annan tou bann lenformasyon lo kantite ki sipoze pe antre dan sa fon.

E tou bann laliny depans ki sipoze egziste anba sa fon. E si i annan okenn keksoz ki *Livestock Trust Fund* i bezwen fer pou li *manage* son bann depans.

I annan bann keksoz ki nou remarke ;- par egzanp lo kote bann *levies* mon annan bann konsern lo kote bann *levies* kantite ki nou pe peye. E bann sistenm kontrol ki devret egziste pou nou fer sir ki *levies* sa fon i reste soutenab.

Alor mon lo mon kote wi *Livestock Trust Fund* i anba Minis, dapre bann amannman

Lalwa 2020, me mwan, mon ti a voudre ki mon ganny plis lenformasyon lo son konteni sa fon.

E ki mon kapab ansanm avek bann dimoun ki la otour mwan fer en pli bon kontrol lo lafason ki sa fon i ganny servi. Mersi.

### **MR SPEAKER**

Wi Onorab.

### **HON SEBASTIEN PILLAY**

Mersi Mr Chairman. Mr Chairman de klarifikasyon enportan. Premye klarifikasyon ler mwan, mon pe get Lalwa *Livestock Trust Fund*, sa lamannman ki ti ganny fer anba sa Regilasyon Seksyon 2 nou ti azout "*the function shall administered by the Ministry responsible for Agriculture.*"

E '*Board*' was substituted for "*the Minister responsible for Agriculture.*" Dan mon lenterpretasyon sa i vedir poudir se ou ki, ki sipoze annan kontrol total lo sa ki sa larzan pe ganny depanse avek.

So prenan kont sa sityasyon *levy*, eski Minister baze lo, lo lefe ki nou pe al donn en zot larzan pou annan sa Polisi *arm* i annan okenn, dan okenn fason pe al revwar, oubyen annan okenn lamannman an se ki konsern sa sityasyon *levy* premyerman?

E dezyenmman Minis, sa i en keston ki pertinan, akoz bokou dimoun pe koz lo la. Ki manner ou reponn sa kritik oubyen sa komanter ki Gouvernman aktyel, pe met bokou kontrol an se ki konsern lagrikiltir pei, dan lanmen serten gro fermye, par lefe ki i pe met bann, par egzant bann *loans* ki pe ganny mete akse ek sa bann *loan* pou pli fasil pou bann gro fermye?

Mon asire ou'n tann sa largiman. E osi parey par egzant lo sa size sa sant, sa sant zenetik, ki ler sa pou ganny mete dan lanmen prive, pou ki i asire i pa al dan lanmen serten gro fermye, oubyen serten endividi ki kapab apre kre en monopoli dan lagrikiltir, en sityasyon ki pa bon ditou *going forward*. Mersi Mr Chairman.

### **MR SPEAKER**

Mersi Onorab. Minis.

### **MINISTER FLAVIEN JOUBERT**

Mersi Mr Speaker. Mersi Onorab pou sa bann pwen adisyonnèl. Wi amannman i met tou i met sa fon dan lanmen Minis.

Me selman mwan, mon ti a kontan administre li pa konman mwan endividyeleman, me avek konsey lezot dimoun otour mwan.

Akoz mon pa tro, tro krwar dan sa prensip, kot en dimoun tousel i pran en fon, e i fer tou desizyon otour sa fon, e se zis li ki annan en lavwa lo lafason ki sa fon i devret ganny servi.

Sa fon i devret ganny servi dapre serten konsey. Akoz menm si son *Board*, i ganny *substitute* pou Minis pou Minis sa fon i *still* annan bann, bann lobzektif ki i devret satisfè.

E alor mon krwar i bezwen ganny fer avek konsey serten dimoun. Eski nou pe *review levy*? I pou annan bann azisteman an mezir nou ale me selman la nou pa pe *review levy*, me selman i pou annan bann azisteman ki, ki pou vini an mezir nou ale.

E sa byensir Lasanble i a ganny enformen letan i annan bann sanzman lo kote *levy*, akoz mon konnen i en size ki vremen, vremen enportan. Serten kritik ki ou pe koz lo la bann gro fermye pe ganny plis akse avek *loan*, lenformasyon ki mwan, mon annan se ki *loan* i aksesib pou tou dimoun. E bann pti fermye konman gro fermye zot tou zot kapab ganny akse avek *loan*.

E napa en preferans ki sa ki gro. Mon'n get lo lalis dimoun ki ankor annan *loan* ki pe peye avek *DBS*, e lo la i annan diferan varyete *loan*. I

annan dimoun ki'n pran *loan* depi R50mil ziskan 500mil R800mil an montan.

E alor i annan sa posibilite pou ptipti ferme e gro ferme kapab ganny akse avek *loan*. Me mon konnen i annan serten demann. Par egzamp i annan en MNA bomaten ki'n demande en Onorab ki'n met en pwen devan pou nou kapab annan bann lezot pti, pti *loan* ki bokou pli ba ankor.

E sa i enn bann konsiderasyon ki nou kapab reflesir lo la, pou ki bann pti ferme ki vreman bezwen bann pti, pti *loan* kapab ganny bann fasilite ki pou ed zot lavi ankor.

Sant zenetik ek monopoli, byensir i enn bann keksoz ki enkyet mon pou nou bann aksyon ki nou fer nou bezwen fer sir ki okenn dimoun pa ganny en monopoli lo lagrikiltir dan pei.

E sa i enkli bann keksoz parey sant zenetik;- i enkli prodiksyon poul osi ki nou bezwen mazin lo la. E nou bezwen fer sir ki letan nou fer nou bann demars i pa koz en sityasyon kot en dimoun i annan okenn monopoli.

E parey mon'n eksplike bomaten, sa demars privatizasyon se e PS Moustache mon krwar in eksplik ankor, i annan plizyer dimoun ki pou enplike ladan.

i pa pou enn mon pa tro krwar si nou devret anmenn zis enn akoz si i anmenn zis enn i pou kre en sityasyon kot en dimoun i dan en pozisyon for e larestan pou bezwen swiv li.

E alor nou, nou pe mazin annan en keksoz ki bokou pli zis e bokou pli favorab pou plizyer dimoun partisip ladan e ki en bon pe dimoun i a kapab ganny benefis ladan e zot a kapab partisip dan sa, dan sa laliny prodiksyon pti koson.

E alor mon note sa pwen sa konsern monopoli e mon pou reasir ou ki nou osi nou konsernen lo sa size monopoli, nou bezwen fer sir ki tou bann demars ki nou fer i pa fer ki nou ariv dan en sityasyon monopoli dan pei. Mersi Onorab.

### **MR SPEAKER**

Mersi. E avek sa nou a pran vot lo Bidze pou Departman Lagrikiltir ki lo paz 506 ziska 509 pou en total R6milyon 33mil. Manm ki an faver lev lanmen silvouple? Mersi. Tou Manm in vote.

Bidze pou Departman Lagrikiltir lo paz 306 ziska lo paz 506 ziska 509 pou en total R6milyon 33mil in ganny 30 vot pour, 0 vot kont e 0 abstansyon. Alor Lasanble in aprouv sa Bidze. Avek sa mon a dir zot mersi e mon a dir mersi sirtou bann zofisye

Departman Lagrikiltir e Minis mon krwar nou pou zwenn ou ankor apre midi. Nou ava pran en poz ziska 2er.

**(BREAK)**

**DEPARTMENT OF CLIMATE CHANGE & ENVIRONMENT**

**MR SPEAKER**

Bonn apre midi tou dimoun. Nou a apel delegasyon pou nou kontinyen avek *Appropriation Bill* silvouple. Nou pe pran *Department of Climate Change & Environment*.

Bonn apre midi Minis Flavien Joubert e *PS Thesee* e osi Madanm Tamatave. Pou *Department of Climate Change & Environment* nou annan avek nou Mr Alain Decomarmond *Principal Secretary for Environment*. Mr Wills Agricole *Principal Secretary for Climate Change*.

E Mr Selvan Pillay *Director General for Climate Change Division*. Avek sa mon a pas lo Bidze pou *Department of Climate Change & Environment* lo paz 494 ziska 505 pou en total R121milyon 871mil.

E nou ava envit Minis pou prezant sa Bidze silvouple.

**MINISTER FLAVIEN JOUBERT**

Bonn apre tou bann Manm. Mersi Mr Speaker pou donn mon sa sans. Mon delegasyon i la pou reponn okenn kestyon ki konsernen avek sa Bidze.

Parey zot konnen nou pe koz de manda la. Nou pe koz Departman Lanvironnman li menm e ki responsab tou bann size ki annan pou fer avek biodiversite, proteksyon lanvironnman e osi Ledikasyon lanvironnman.

E apre nou annan en lot Divizyon ki konsernen avek sanzman klima ek lenerzi e sa i reprezante par Mr *PS Agricole*.

Apre midi nou'n la pou diskit en Bidze R121milyon 871mil e mon ava les laparol avek bann Onorab pou nou bann kestyon konsernan sa Bidze e bann ki lo *panel* kapab reponn. Mersi bokou.

**MR SPEAKER**

Mersi. Likel ki pou konmanse? Minis eski ou'n dir mon ou pe pas parol avek *panel* pou anplifye oubyen oule nou pe pas lo kestyon?

**MINISTER FALVIEN JOUBERT**

Mr Speaker nou a pas direksyon lo kestyon.

**MR SPEAKER**

Ok mersi. Nou a konmans lo kestyon alors.

**MR SPEAKER**

Mon a konmans avek Onorab Henrie.

**HON GERVAIS HENRIE**

Mersi Mr Chair. Bonn apre midi tou dimoun. Mon kestyon dabor lo kestyon lanvironnman peizaz pei. Enn bann remark ki dimoun i fer sak fwa zot vin Mont Buxton bor Mont Signal - *in fact* mon'n fek ganny sa de semenn pase en zanmi in al Roche Gorilla laba anler.

Apre i telefonn mon i dir mon be i zoli selman i annan tro bokou bann plant anvaisan ki pe kouver lafore dan sa rezyon. E vre. So mon anvi konnen ki plan zot annan pou *restore* peizaz nou pei ek nou bann lafore, pou *deal* avek sa plant sa problemn plan anvaisan aköz i pe, i pe koz serten problemn? Sa i mon premye.

Dezyenmman dan Departman Lanvironnman ki annan en zafer en *Unit* ki apel *CAM* en keksoz koumsa zot *manage* bann zafer delo larivyèr lot, lot ?

Depi 2016 mon'n verifiye *verbatim* pou Bidze 2017 mon'n lev sa problemn 2018. En pe letan pase dan bann lannen '90 i annan en bann rigol ki ti ganny konstri dan

plizyer distrik Larivyèr Anglez, Mont Buxton i annan plizyer kantite sa bann rigol.

Pou zer delo me apre i paret *whoever* ki'n fer, fer sa bann rigol in bliye sa bann rigol i la. So ozordi aköz i lo bann propriyete prive *Land Transport* i dir ou i pa *deal*, avek Minister Gouvernman Lokal i dir i pa son problemn.

Dernyen fwa ki en zofisye Minister Lanvironnman Mr Labrosse ti'n dir zot pe fer en *mapping exercise* pou zot konnen kote sa bann rigol i ete e pou zot *deal* avek. Aköz bokou sa bann rigol prezan pe, pe i pe konmans demoli e i pe afekte bann propriyete prive dan Mont Buxton en kantite.

So ankor enn fwa la i ava fer senkyenm lannen mon lev sa *issue*, eski zot kapab annan en keksoz pou fer avek swa pou antretenir li ouswa pou, pou *deal* avek sa sityasyon?

Aköz i 5, - 5 an la mon pe koz lo sa menm size en avek sa Minister konsernen. Mersi.

**MR SPEAKER**

Mersi. *Panel* si zot decide reponn zis lev lanmen pou sinyal mwan silvouple. *Ok*.

**MINISTER FLAVIEN JOUBERT**

Mersi Mr Speaker. Mon pou vitman pas lo sa size plant anvaisan apre mon pou donn



laparol avek *PS Lanvironnman* pou li vitman pas lo la. Mon konnen nou prese pou letan e apre mon ava demann Mr Pillay ki *DG* dan sa Divizyon ki apel dan sa seksyon ki apel *CAMS* ki travay lo bann zafer bann size delo, drenaz ek lanmar, pou li donn en leksplikasyon lo sa bann *drain Larivyèr Anglez*.

Vitman Mr Speaker kot i konsern bann plant anvaisan, i annan plizyer aksyon ki nou le pran e ki nou ti pe al konmans pran. I annan enn kot mon'n ti'n fini ganny diskisyon avek Minis pou Zafer Entern, kot nou ti pou annan program an servan bann dimoun ki annan bann, bann *issue* sosyal bann dimoun ki lo bann program par egzanp servis kominoter.

Pou nou kapab konmans retir en pe bann lalyann anvaisan, me nou pa'n kapab fer li aköz lasante in dekonsey nou pou nou konmans li la dan sa letan.

Me i enn bann keksoz ki nou oule konmanse pou nou kapab annan bann dimoun pou fer bann travay pou fizikman retir sa bann lalyann dan serten landrwa kot nou konnen pe koz serten problem.

Lot keksoz ki nou bezwen fer se nou bezwen ankouraz dimoun pou servi zot later ; - savedir vin avek bann *Scheme*

pou ki dimoun i vremen rekonmans servi zot later.

Ou a remarke ki enn bann rezon ki nou pe ganny problem lalyann anvaisan, se ki i annan pou fer avek lafason ki nou pe servi nou later. Nou nepli fer bann aktivite ki dimoun ti fer lontan bann landrwa ki ti ganny kiltive en bon pe in i nepli ganny kiltive, bann landrwa ki ti annan zannimo osi i nepli.

E alor mon krwar i enportan pou nou kapab ankouraz bann dimoun servi zot later e rod bann diferan fason, pou zot re demar sa bann aktivite. Lot keksoz ki nou pe fer se ki mon'n lans en lapel avek bann dimoun ki travay en pe lo bann size lalyann pou nou get en pe ki bann lezot solisyon ki nou kapab anmennen pou kontrol sa bann lalyann.

Nou annan bann posibilite biolojik. Nou menm annan bann posibilite kemikal ki deza ganny eseye serten dan pei. Me mon pa pe dir ki nou bezwen entrodwir masiv *spraying of* sa bann zafer.

Me nou pou bezwen rod bann solisyon ki kapab servi nou byen e ki nou kapab bann dimoun dan zot bann, dan zot lanvironnman lokal ouswa prive zot kapab osi servi pou tir sa bann lalyann lo zot bann later.

So i annan sa trwa pwen ki mon pou, mon pou met la pou demann PS Lanvironnman pou li kontribye lo sa pwen e apre nou ava al lo sa size drenaz. Mersi.

### **MR SPEAKER**

Yes PS Decomarmond.

### **PS ALAIN DECOMARMOND**

Bonn apre midi Mr Chair. Bonn apre midi tou bann Manm Onorab. E mersi Onorab pou kestyon. Zis pou azout lo sa ki Minis in mansyonnen sa konsern konsernan bann lalyann anvaisan i en keksoz ki'n avek nou pou en bon pe letan.

Sa ki enportan pou note se ki *over the years*, i annan bokou bann diferan proze pilot, program ki'n ganny enplimante an servan resours nasyonal atraver Bidze Departman ouswa Bidze Lotorite Park Nasyonal.

E osi in annan bann proze enternasyonal osi ki'n ede pou etidye sa domenn e osi fer bann proze pilot. I en size ase konpleks, akoz i ase teknik akoz sak kalite plant pou ou lespes i annan son lapros ki ou lapros lafason ki ou *deal* avek li.

E i annan bann pratik enternasyonal osi ki par egzanp dan *Pacific* zot, zot osi zot ganny menm *challenge* en

pti pe, ki nou pe war ansanm lo nivo enternasyonal ki mannyer bann lezot leksperyans par egzanp lezot pei osi zot in pas ladan, sirtou avek bann lespes spesifik.

An term Bidze par egzanp, nou'n met en larzan anba nou *programme* 3 ki konsern konservasyon pou en *consultancy*, pou en *firm* ouswa en endividi fer en program pou met an plas sa program anvaisan pou laplant anvaisan, pou *irradicate* li.

Me osi pou eksplor bann lezot loportinite parey in, in mete ki'n ganny seye deor be kekfw nou pa ankor seye isi. So dan nou Bidze nou'n met an plas en serten resours pou kapab fer sa plan.

E osi an vi ki sa i ankor en size tre enportan pou Gouvernman ler nou annan bann loportinite pou diskite avek bann partner enternasyonal bann pei ouswa bann lorganizasyon sa i reste toultan en, en priyorite lo nou lalis ki nou fer en demann, an term lasistans teknik ouswa finansyel, ki zot kapab ed nou ladan.

Parey Minis in dir nou anvi sa lannen demar sa program, *formulate* sa plan e apre an term solisyon li menm, war osi ki mannyer pou *upscale* sa avek bann laspe finansyel ki nou pe regarde isi

Sesel. Me osi bann lezot loportinite deor ki kapab annan pou nou *upscale* sa bann zefor.

So sa en pti pe nou, nou plan pou bouz en pti pe pli devan avek sa size. Mersi.

**MR SPEAKER**

Mersi. Lo lot size lekel ki pou reponn. *Yes DG.*

**DG SELVAN PILLAY**

Mersi Mr Chair. Mersi Onorab pou ou keston. An se ki konsern *maintenance* rigol, nou zofisye dan nou Departman ansanm avek Lotorite Distrik dan Minister Gouvernman Lokal e avek bann zofisye *SLTA* ek *LWMA*, tanzantan nou fer bann vizit e nou get lo bann kondisyon bann rigol.

E anefe i annan en, en travay ki pe ganny fer pou *maintain* sa bann rigol sirtou dan sa Bidze sa lannen. E kot i konsern bann nouvo drenaz ankor ansanm avek *SLTA*, nou i annan bann travay entans ki ganny fer. E an se ki konsern netwayaz *SLTA* avek *LWMA* ki responsab pou netwayaz rigol. Mersi.

**MR SPEAKER**

Mersi. Onorab Labonte.

**HON ANDY LABONTE**

Bonn apre midi *panel*. Mersi Mr Chair. Mr Chair zis en pti

klarifikasyon zis pou mon demande plito *panel*. Anba *programme 2* mon war kot i annan en faz de proze pou drenaz Union Vale *I mean* Quincy Vilaz vi ki en bout English River i form parti Quincy Vilaz.

E mon pa konnen si sa menm landrwa kot mon pe realize in met en R600mil. Petet eski sa i pou fini sa proze oubyen pou rektifye serten problem ki ti annan avek sa proze?

Akoz i annan en proze drenaz ki ti pe deroule e i ti pe afekte en bann zabitan lo bor. Petet si nou ti kapab ganny en pti klarifikasyon lo la ? Mersi.

**MR SPEAKER**

Mersi. Silvouple sinyal mwan ler zot pe reponn. *DG wi.*

**DG SELVAN PILLAY**

Mersi Onorab pou ou keston.

**MR SPEAKER**

*DG.*

**DG SELVAN PILLAY**

Mersi Onorab pou ou keston. Sa larzan ki'n ganny *allocate* sa lannen sa R600mil i pou kontiny sa proze drenaz son dezyenm faz. An plis pou rektifye bann *issues* ki ti leve lo premye faz. Mersi.

**MR SPEAKER**

Onorab Labonte klarifikasyon.

**HON ANDY LABONTE**

En pti klarifikasyon. Ler ou pe dir rektifye problemm, akoz sa bann zabitan ki ti pe reste obor zot lakaz ti *crack* konpletman. E ler zot ti pe rod serten lasistans lo kote zot Departman oubyen pou ganny en soutyen, me selman zot pa ti pe ganny okenn *response*.

Eski petet nou kapab rod en fason pou kapab zwenn sa bann zabitan, pou nou kapab diskite en pe, pou get en pe si vreman zot pe rezourd sa problemm e ki soutyen zot pou gannye pou, pou rezourd zot problemm? Mersi.

**MR SPEAKER**

Mersi. *DG* ou a klarifye silvouple. Wi.

**MINISTER FLAVIEN JOUBERT**

Mr Speaker mon krwar lo sa kote si mon kapab reponn sa, sa kekyon par Onorab Labonte, mon krwar ki nou a fer apre sa sesyon nou ava fer kontak avek ou, nou ava zwenn sa bann dimoun nou ava rode kwa egzakteman kwa ki problemm.

E nou ava trouve egzakteman kwa ki solisyon ki merit anmennen. E esey enn fwa pou tou met sa problemm anba kontrol, si vreman in annan bann problemm asosye avek sa proze.

So sa i langazman ki nou pe donn Lasanble ozordi, nou a fer li apre ki nou'n fini dan Lasanble isi. Mersi.

**MR SPEAKER**

Mersi Minis. Onorab Vidot.

**HON AUDREY VIDOT**

Mersi Mr Chairman. Bonn apre midi tou delegasyon e tou dimoun ki a lekout. Bonn apre midi spesyal pou zabitan Roche Caiman. Mon kekyon pou vin dan laliny manda zot Minister.

Minis ou Minister i annan sa manda pou servi bann Lalwa ki egziste, pou protez nou bann Seselwa dapre Konstitisyon, pou asire ki sitwayen i vin dan en lanvironnman prop e an bonn sante.

E ler mon pe regard zot *current challenges* dan Bidze, mon war ki zot annan en gro problemm resours, ki fer ki zot pe ganny bokou difikilte pou zot montre efikasite pou enplimant zot manda.

Mon konmans lo la akoz Roche Caiman mon distrik i en i plizoumwen gran mazorite *housing estate*, e i annan pa mal defi ki bann zabitan i rankontre, ki swa polisyon tapaz, polisyon loder, polisyon bann aktivite anti-sosyal.

E nou santi ki lanvironnman i annan en gran rol pou zot zwe pou ranforsi sa

bann Lalwa, pou asire ki bann lezot partner dan bann diferan lezot Departman ki swa i atase avek ou Minister oubyen lezot, pou ki bann dimoun i respekte Lalwa e permet ki bann lezot i viv an trankilite dan lape.

Eski sa Bidze ki la zot bann program ki zot annan ki swa dan program 4 avek 5, zot pe ant entansifye ledikasyon pou asire ki dan bann kominote parey Roche Caiman, i annan plis *enforcement* pli efikas, ki kapab reprim bann ki pe kas Lalwa?

Akoz i annan dimoun ki i santi poudir sa bann Lalwa pa pe morde menm si nou annan laprev nou anvoy levidans me nanryen pa pe marse. Eski ou pe asir nou avek sa Bidze ki ozordi ankor enn fwa ek gran ker mon pou lev mon lanmen pou vote me nou anvi war rezilta?

E mon krwar Minis ou konn tre byen letan ou ti kot *LWMA* sa size osi ti ganny ou okouran ki pase. E *PS* osi i konnen an term polisyon tapaz dan mon kominote, nou'n deza met dan zot latansyon me nou pa pe war laklerte silvouple ?

E dezyenman, ki travay ki zot Minister pe fer an referans avek bann landrwa ki pa zis kot i annan gran, gran lans. Mon pran legzanp parey Roche Caiman nou annan

bokou *wetland area* i annan bann konstriksyon ki ganny fer.

E Roche Caiman nou annan pa mal problem nou pe war osi ki annan potansyel pou degradasyon. Bann obor otour bann lanmar so petet ki travay ki zot pe fer dan bann landrwa parey pou asire ki nou, nou pli *conscious* pou prevansyon lerozyon ki pa afekte bann dimoun ki pe reste obor bann lanmar? Mersi.

### **MR SPEAKER**

Mersi Onorab. Minis.

### **MINISTER**

### **FLAVIEN**

### **JOUBERT**

Mersi Mr Chair. Mersi Onorab pou ou, pou ou de pwen. Kot i konsern laplikasyon Lalwa bomaten dan mon lentrodiksyon mon krwar, mon ti lev sa pwen, kot nou rekonnet ki laplikasyon Lalwa dan lanvironnman i feb.

E mon ti mansyonnen ki i annan en nouvo pozisyon Direkter *Enforcement* ki'n ganny aprouve kot nou le *recruit* en lot dimoun ki pou ed nou aplik Lalwa lo teren.

Me mon pozisyon se ki pou nou kapab vremen avek Lalwa e montre rezilta fodre ki nou bann *case* i ariv devan Lakour. Ou a realize ki nou bann *case* pa pe arive devan Lakour en kantite fwa i annan,

i annan *case* ki ganny met a latansyon zofisye plizyer keksoz i ganny fer me i pa zanmen ariv okenn par.

Fodre ki dimoun i santi poudir i annan en Lalwa e sa Lalwa i pe ganny aplike. E ou a fer ou ti fer remarke ki par egzant letan mon ti kot LWMA, i annan bann size ki annan pou fer avek salte par egzant dan Roche Caiman.

Nou bezwen aksepte ki dan Roche Caiman e dan plizyer *estate* mannyer, mannyer in ganny konstri e mannyer sityasyon later i été, nou nepli annan landrwa pou nou fer *bin site*, pou nou met *bin site*, aköz kot ou pou tire ou pou met devan laport en lot dimoun.

Ou pou tir la ou met la e nou bezwen sanz nou fason fer e war bann nouvo solisyon pou ki nou pa bezwen akimil salte dan okenn pozisyon dan nou *estate*. Nou bezwen kapab tir nou salte letan i ariv son ler dan en fason apropiye, e pa les li akimile obor lakaz personn. Mon krwar sa i kler.

E zis sanz pozisyon *bin site* i pa pou rezourd nou problem. Menm si ou annan en frekans koleksyon ki bon i pou fer en diferans me toultan ou pou annan sa risk ki ou pe koz en lenkonvenyans pou lezot dimoun.

Alor pou mon, mon target prensipal se ki nou aplik Lalwa nou annan dimoun lo teren ki fer sa bann travay, me nou osi anmenn Lalwa devan pou ki i annan pinisyon ki ganny aplike.

E ki dimoun i konpran poudir i annan pinisyon ki pe ganny aplike, e zot a kapab sanz zot konportman. Byensir i annan sa bout kot nou bezwen fer ledikasyon piblik.

E mon'n annan diskisyon avek Departman Lanvironnman, bann dimoun ki responsab ledikasyon. E nou pe menm zwenn en dimoun ki pe travay lo ledikasyon kot LWMA ansanm ek Lanvironnman ;-pou nou fer en lekip ki annan plis lenpak.

Pou ki nou kapab prodwir materyo ki bokou pli o nivo pou nou kapab konekte avek nou bann piblik e donn zot plis lenformasyon e osi edik zot lo lafason ki zot pou fer.

Me i toultan reste konportman nou bann dimoun fodre nou sanze. Nou bezwen aksepte en keksoz se ki nou'n fer ledikasyon en kantite lannen.

I annan en group dimoun ki zot konportman pa pe sanze pa tou dimoun ki konportman pe sanze, e nou bezwen kapab adres nou lekor byen kler avek sa bann ki konportman pa pe

sanze dan pei. E fer ki zot santi ki i annan en Lalwa e ki sa Lalwa pe ganny aplike. Mersi.

### **MR SPEAKER**

Wi *PS* Decomarmond.

### **PS ALAIN DECOMARMOND**

Mersi Mr Chair. Zis pou azout lo sa ki Minis in mansyonnen. Definitivman i en gro defi lapropte Roche Caiman i zis 1 distrik dan 26. E an term resours aköz nou'n mansyonn sa pou laplikasyon *Environment Protection Act* tou bann vyolasyon lanvironnman si oule i ganny fer par en pti tim 9, 9 *environment police officers*. So zot kouver antye pei zot.

E sa i en defayans i pa en leskiz me selman i en defayans dan li menm. Me parey Minis in mansyonnen, mon krwar nou'n koz ase lo lapropte e nou soulaze osi nou war ki dan en kantite dimoun i konsernen sa, sa sityasyon i tre enportan.

Mwan, mon swe personnelman e osi kekfwa departman Minister, se ki lo nivo kominoter osi mon krwar i kapab annan bann lorganizasyon volonter, kot ansanm avek lotorite ansanm avek Minister nou, nou ralye ansanm nou target sa bann aktivite.

E menm sa bann dimoun ki pe fer sa kot i posib en, kot

nou organiz bann netwayaz me osi i annan parey toultan in ganny dir dan bann diferan lezot sekter i annan sa *Committee* Polisi osi.

So nou bezwen led partou pou annan bann lizye pou ed nou avek sa zefor. An term Lalwa parey Minis in dir i annan Lalwa, wi dan lepase nou'n tre diplomatik dan nou lapros. Bokou zot bann Onorab bann *DA* osi i konnen aköz nou kopi zot dan tou nou bann, tou bann *enforcement*.

Nou al ek en lapros diplomatik nou koz ek sa dimoun nou dir silvouple landrwa i sal, ou'n fer tel keksoz, tel vyolasyon, netwaye.

Me nou'n koze sa lannen konmansman sa lannen avek tou mon bann *staff* mon dir sa lapros la nou pe, nou pe sanze konpletman nou pe al en pe pli direk en pe pli *firm*.

I annan provizyon pou *fix penalty* anba nou Lalwa, kot direk i annan en vyolasyon nou pa pe perdi letan nou ale. Nou *apply* nou *fix penalty*. Napa negosyasyon ;- napa donn mon 2 zour 3 zour ensidswit pou adrese. So nou pou al en pe pli for lo sa domenn.

An term ou'n mansyonn tapaz, tapaz i en keksoz ki Gouvernman pe revwar en pti pe son globalite li menm, ansanm avek par egzanp bann

lezot Lotorite, Lapolis. Ki manner i annan en kantite bann bout, bout Lalwa ki *deal* avek tapaz anba Kod Penal Lanvironnman e lezot.

En bout Lalwa ki lo nou program pou nou fer revizyon sa lannen e *the Noise Regulation* ki kontrol an term nivo tapaz dan kominote, bann landrwa rezidansyel osi dan bann landrwa endistriyel.

So nou pe al reviz sa Regilasyon pou adapte li dapre norm aktyel la, anliny avek tou sa bann *challenge* ki nou annan. Regarde ki manner nou kapab fer li mord en pli pe pli for.

Me parey Minis in dir *in the end* nou kont lo sak Seselwa silvouple pou kit nou pei prop. Lotorite toultan i pou fer son mye pou fer son bout lo kote Lalwa me nou, nou fer demann avek tou dimoun silvouple annou kit nou pei prop.

E ki Lotorite i pa la toultan pou as deryer ouswa pa en lepok la pou nou ganny *fix penalty* R500 mon krwar. Me malerezman nou pe vin for lo la.

Akoz nou'n ase koze i annan resours anba Bidze anba program 5 parey ou'n mansyonnen e osi anba program 4, pou met plis medya e bann prodiksyon laba deor pou kontinyen edike. Be selman i sa aksyon endividyel

ki nou pe demande e nou pe, nou pe vin pli for an relasyon avek aplikasyon Lalwa sirtou an relasyon avek *fix penalty*. Mersi.

### **MR SPEAKER**

I annan son pwen lo lerozyon mon krwar ki i pa'n adrese. Wi PS.

### **MINISTER FLAVIEN JOUBERT**

Mr Agricole pou reponn son lot kestyon. Mersi.

### **MR SPEAKER**

Wi PS.

### **PS WILLS AGRICOLE**

Mersi Mr Chair. Mersi bann Onorab. Mersi pou tou dimoun ki a lekout e dan lakour. Konsernan sa kestyon lo netway lanmar Roche Caiman. Onorab mon krwar ou bezwen konnen *by now* ki nou annan de kontrakter ki pe fer sa travay.

E sa dan li menm i koute e son frekans netway lanmar dan sa de sit i de fwa par semenn. E lefe ki Roche Caiman i sa bann lanmar kot i ete i bord avek lanmer. Ki arive parfwa se ki dan en 24er ou annan de *high tide*.

I annan tre probab ke ler sa kontrakter i fini netwaye *high tide* i antre e ki i fer se i anmenn en pe debri e keksoz i



ou kapab dir i retourn *back* konmsi i pa netwaye.

E lefe ki fer sa de fwa dan en semenn, i fer ki parfwa ler in fini netwaye parey mon dir i annan sa de *high tide* ki en dimoun ki pas apre, i pou war ki be sa dimoun pa'n fer sa travay. Ler annefe in fer.

Mwan mon ti a swete ki e sa i aplik pou tou bann distrik ki, ki annan lanmar. Mon krwar in ler pou aköz dernyerman sa *issue* Anse La Mouche i montre ki ler i annan en devlopman, ki ou war bann dimoun i sorti, i dir i annan en lanmar la pou zot fer zot pwen.

Mwan mon ti a swete ki sak distrik i vin en *partnership* avek Minister kre en parey en Klib Lanvironnman ouswa ou a *own*, ou a vin *ownership* sa bann *eco* sistenm parey ki vremen enportan.

E, e sa osi i ava, i ava redwir lo Bidze Gouvernman ki pou le moman parey ou konnen i pa sa kantite ki nou ti a swete pou nou fer tou sa travay. Nou, nou ti ava kontan ki nou ogmant frekans parey lefe ki mon'n donn sa rezon. Be i pa posib.

E se pou kwa ler ou get sa Bidze '*Marsh and Cleaning*' i annan en rediksyon. E rediksyon i kler aköz Bidze la pou le moman i pa ase. Me selman tou fwa la kot kominote i antre, i kre sa bann group kot i ava asiste

Gouvernman byensir pou fer sir ki bann lanmar bann *ecosystem* i viv e osi parey nenport ki. Mersi bokou Mr Chairman.

### **MR SPEAKER**

Wi Onorab Vidot pou eklersi.

### **HON AUDREY VIDOT**

Byen zis en pti leklersisman. Aköz *PS* pa'n tous sa bout kot mon pe dir si zot annan travay ki zot in konmanse dan bann rezyon parey Roche Caiman kot i annan sa bann *rock armoring*?

Aküz pou i annan dan lepase kot distrik in war konsern, kot i annan petet degradasyon si zot pe fer serten *monitoring* dan sa rezyon.

Apre dernyerman Mr Chair, mon oule zis fer rekomandasyon si i posib pou zot Minister *provide* Ladministrasyon Distrik ensi ki bann stasyon lapolis be petet bann ler ki permet fer serten bann konstriksyon bann parey tapaz ki permet annan si sa?

E osi ki bann *fix penalty* oubyen bann kontak, ki bann dimoun i fasilite zot pou zot kapab ganny kontak avek bann *enforcement* pou kapab reazir atan? Mersi.

### **MR SPEAKER**

Mersi. *PS Agricole* pou azout keksoz lo kan lo, lo *rock armoring*.

### **PS WILLS AGRICOLE**

Wi lo, lo *rock armoring* byensir ankor i en, i en travay ki kout bokou. E nou dan Bidze ki nou annan aktyelman la nou napa sa Bidze pou nou kapab fer sa travay.

Me toutfwa avek lefe ki nou, nou dan sa *issue* sanzman klima kot nou kapab tap en pe laport en pe partou. Nou annan la aktyelman dan pei en *National Climate Change Advisor* en *National Climate Change Finance Advisor* ki pou ed nou asiste nou pou nou kapab *access* bann finansman ki la deor enternasyonal.

E sa dimoun pou la pou de lan in ganny *seconded* par *Commonwealth* e la petet bann travay ki ou pe mansyonnen i kapab nou kapab ganny sa finansman avek bann diferan *donors* deor e nou kapab fer sa travay ki ou pe dir. Mersi.

### **MR SPEAKER**

Mersi. Onorab Samynadin.

### **HON KELLY SAMYNADIN**

Mersi Mr Chair. Bonn apre midi Minis avek delegasyon. Dan son ladres pou Bidze, Minis Finans ti fer referans avek en letid 11 mwan ki *World Bank* an kolaborasyon

avek Minister pou Sanzman Klima pe fer, pe fer aktyelman. Avek bi pou evalye ki mannyer Sesel i kapab adres bann problemn lerozyon linondasyon e bann risk asosye ek klima lo bann lakot.

An vi ki sa i dan zot priyorite stratezik, mon ti a kontan konnen ki zistans sa letid in arive lekel bann landrwa ki'n deza ganny kouver e petet ki bann *findings* ki zot in fer *so far*?

E vi ki Minis ti dir ki Gouvernman pou travay avek sa lorganizasyon pou kapab idantifye bann sours finans pou ki apre sa letid ki sipoze vini ver trwazyenm kar sa lannen travay i kapab konmans vitman pou kontrol bann problemn lerozyon ki nou pei pe fer fas avek.

Alors mon ti a kontan konnen vi ki sa proze pou benefisyen mon distrik Au Cap osi enormeman? Ki mannyer travay lo sa proze pou ganny antreprann eski i pou ganny fer par faz oubyen par distrik depandan lo gravite zot sityasyon? En leksplikasyon lo la silvouple. Mersi.

### **MR SPEAKER**

Mersi.

### **MINISTER FLAVIEN JOUBERT**

Mersi Mr Chair. *PS Agricole* i a reponn sa kestyon. Mersi.

**MR SPEAKER**

PS.

**PS WILLS AGRICOLE**

Ok mersi Mr Chair. Mersi Onorab pou keston. Mon krwar i en keksoz enportan i vre parey Minis in anonse se ki nou annan lasistans teknik sorti kot *World Bank*, ki pe fer en letid lo 5 sit lo Mahe ek Praslin.

E sa 5 sit i swivan Beau Vallon i enn, e dezyenm i Au Cap lo Mahe parey Onorab in mansyonnen. E pou bann benefis lezot Onorab se nou annan trwa lo Praslin e sa i Cote D'Or, e Grand Anse Praslin apre Amitie pou al Anse Kerlan.

Byensir sa letid in avanse bokou e nou ganny bon pe *feedback* nou ganny diferan lo, lo platform medya, *media* ki lo *zoom* nou, nou zwenn a plizyer repriz ler i annan progre pou get en pe kwa ki pe arive.

Mon kapab dir ek fyerte ki vremen letid in avans bokou. I pa neserman zis bann *expert* enternasyonal ki la. Nou annan ki sorti *New Zealand*, me nou osi annan en group nou Seselwa ki pe travay lo la sa travay.

E mon kapab dir ki i annan en bon lavans e nou espekte ki sa letid a fini an Out sa lannen. E sa ki pli enportan la se ki

lentervansyon sa letid pou anmennen dan diferan sa bann sit. Nou tou nou la nou bezwen espere ki kalite *intervention* ki nou zot pou, zot pou apre sa *assessment* vin war vin met devan nou.

E la met rod sa finansman ki kapab aprezan *start implementation*. Me nou espekte byensir si pou annan okenn enplimantasyon i pa pou sa lannen, akoz pou ou kapab ganny bann resours enternasyonal ankor, ou bezwen fer en ta travay zistifikasyon eksetera akoz ou bezwen tel, tel resours.

Me selman mon kapab dir ou Onorab se ki lefe ki mon pli boner, mon'n dir nou annan en *National Climate Change advisor seconded by Commonwealth* Sesel. E son travay ki dan son *term reference* se ki rod bann finansman ki la deor, kot nou kapab fer bann travay parey pou konbat lerozyon e osi konbat sanzman klima. Mersi.

**MR SPEAKER**

Mersi. Onorab Mondon.

**HON TERENCE MONDON**

Mersi Mr Chair. Mr Chair mon keston i enn ki senp. Mon anv konnen si zot annan zot in fer provizyon dan Bidze, pou kapab adres bann size disab ki *end-up* lo, lo semen ki apre i

sorti dan sa *sieve*. Sirtou dan bann letan gran mare e bazarka Anse Bazarka kot mon reste i en ka an partikilye.

En kantite disab i *end-up* lo lans e mon'n deza *raise* sa dan sizyenm Lasanble. E nou bezwen fer keksoz. Mon ti a kontan konnen si anba zot proze mon war en 20milyon 108mil pou *Ecosystem-based Adaptation*, eski i annan posibilite pou fer bann pti proze ?

Pa bann proze ser zis pou bar sa bann disab ler gran mare, bann letan gran mare pou anpese ki vin *end-up* lo semen? Mersi Mr Chairman.

### **MR SPEAKER**

Mersi Onorab. Minis.

### **MINISTER FLAVIEN JOUBERT**

Mersi Mr Chair. Mersi Onorab pou ou kestasyon. kot i konsern disab lo semen, nou'n deza antre an diskisyon avek *Land Transport*, aköz i annan en konfizyon ki toultan in la lekel ki tir disab lo semen.

Letan mon kot *LWMA* nou'n tire en bon pe fwa nou'n depans larzan pou tire anba nou Bidze. *SLTA* osi i tir en pe disab lo semen. Parfwa distrik osi i fer en pti gin. Me ki nou le fer se ki si i annan en provizyon pou nou tir disab lo semen nou met li dan en sel Bidze. E sa i pa zis disab i pou

annan serten size ki nou bezwen tonm dakor lo la ansanm avek *SLTA* e i annan diskisyon ki ankour la.

I annan pou fer ek disab i annan pou fer avek *over hanging vegetation* i annan serten louvertir lanmar osi ki pa pe ganny byen kouver. So nou bezwen bous tou sa bann landrwa kot nou pa pe ganny en bon kordinasyon kot nou pe fer diplikasyon.

Alor mon espekte ki menm la an Mars nou kapab fini tonm dakor lo lekel ki pou fer e kote sa bann sours finansman pou sorti. Be byensir pou sorti anba bann Bidze ki pe ganny aprouve la nou a rod en fason pou nou kapab fer li sorti anba sa bann Bidze pou nou, pou nou depans li.

Me selman nou le ki apre sa diskisyon nou annan en laranzman ki pli kler. Aköz toultan i annan en konfizyon e toultan pe ganny *call* diferan dimoun pe rode lekel ki pou fer.

Kot i konsern bann proze *Ecosystem-based Adaptation*, wi i annan en, en larzan en *Grant* ki pou Sesel, me mon krwar *Ecosystem-based Adaptation*, son proze in fini idantifye plizyer aksyon direk aksyon lo teren pou li kapab kre serten form adaptasyon.

Par egzanp si ou al Val Den Dor ou pou war ki i annan bann rezervwar delo ki'n fini ganny fer. I annan lanmar North East Point i annan plizyer landrwa ki'n ganny idantifye konman bann sit ki'n ganny idantifye pou fer sa bann travay.

Byensir letan pe ariv a lafen proze, ki mon krwar i plitar sa lannen letan nou pou ariv lafen proze, nou pou gete ki mannyer larzan in ganny depanse. E si i annan posibilite pou nou re sa bann larzan dan bann lezot pti proze pou osi ede adapte avek sanzman klimatik, byensir nou ava fer li.

E si ou dir mon ki Bazarka i en ka partikilye ki nou bezwen adrese. E nou konn byen Bazarka letan lanmer i monte semen i preski disparet avek kantite disab ki monte.

Alor i enn bann keksoz ki nou kapab fer anba sa proze si a lafen proze nou war ki i annan en pe resours ki reste. Mersi.

### **MR SPEAKER**

Mersi. Onorab Gill.

### **HON CHURCHILL GILL**

Mersi Mr Chair. Bonn apre midi tou dimoun lo *panel*. Mon premye kestyon PS Agricole in donn en pe

lenformasyon lo sa letid ki pe ganny fer.

Me selman sa problemm erozyon i annan i *two parts*. I annan bann ki pa pe tonm dan sa letid, parey ou'n nonm sa bann landrwa ki pe ganny kouver dan sa letid.

Par egzanp Anse La Blague gran lans ek pti lans zot, zot in ganny afekte e ti annan serten larzan ki nou ti'n ganny fer konpran, ti'n deza mete pou adrese. Eski sa larzan dan sa Bidze pou adres sa *coastal erosion* Anse La Blague? Sa i premye kestyon.

Dezyenm kestyon eski dan sa Bidze i annan larzan pou drenaz Marie-Jeanne Estate parey PS Agricole ou konnen vizit in deza fer.

E ler i annan en konbinezon lapli avek *high tide* i annan en lanmar deryer sa *housing estate* prezan lanmer i plen apre delo e prezan sa i, i *flood housing* estate antye.

Eski dan sa Bidze i annan serten provizyon kanmenm en faz, ou a les nou konnen si i annan? E mon dernyen kestyon pou eklersi avek PS Decomarmond, dan semen Anse La Blague Praslin nou annan en gran konsern kot semen i etrwat. E nou ganny plizyer aksidan e prezan mon konnen sa pa konsern ou Minister i konsern Minister *Land Transport*.

Me selman propriyeter kot sa i été, nou pe ganny bokou difikilte, akoz sa menm propriyeter i annan en proze isi Mahe ki ti'n deza *submit* e sa i trouve Bel Ombre. Me selman mannyer mon konpran i annan en rezerv.

E prezan mannyer diskisyon pe ale i vin tre difisil pou nou kapab ganny laprouvasyon, pou nou fer sa semen, tir sa danze kot i annan plizyer aksidan.

Akoz i annan sa lot bout la ki an deor nou kontrol. Prezan mwan, mon le konnen si parey bann sityasyon koumsa i annan posibilite negosye kot sa rezerv i été, baze lo zot Lalwa ki mwan, mon pa o fe avek.

Si i annan keksoz i kapab ganny fer en konversasyon i kapab ganny fer avek sa dimoun, pou nou kapab ariv lo en solisyon? Mersi.

### **MR SPEAKER**

Mersi. Minis.

### **MINISTER FLAVIEN JOUBERT**

Mersi Mr Chair. Mersi Onorab pou sa trwa pwen. Mon pou les sa bout ki konsern Anse La Blague avek drenaz Marie Jeanne avek *PS Agricole* ek Mr Pillay.

Kot i konsern semen Anse La Blague ek sa propriyete lo Mahe, mon pa Mr

Speaker mon pa santi si mon bezwen diskite ka en, endividi partikilye ki aktyelman an diskisyon. Mon pa konnen si i pou apropiye pou mon diskite devan Lasanble.

Me i annan serten zis pou eksplik zot i annan serten rezervasyon lo en lot propriyete lo Mahe byensir. E sa i annan pou fer avek serten lespes ki lo sa propriyete. Me mon pa konnen si mon pou kapab si mon repons ki mon pou donner la i pou en repons apropiye.

Mon pou demann Onorab petet pou annou angaz dan sa konversasyon e apre nou ava kapab letan Lasanble pou demann nou en klarifikasyon lo la nou ava kapab annan en repons ki pli kler.

Akoz petet mon kapab dir en keksoz ki apre i afekte konversasyon ki pou vini apre. Mersi Mr Speaker, mon a pas laparol avek *PS Agricole*.

### **MR SPEAKER**

Mersi. *PS* wi.

### **PS WILLS AGRICOLE**

Mersi Mr Chair. Wi, Onorab konsernan Anse La Blague wi parey ou konnen i annan travay ki'n ganny fer, ler mon dir ou travay se ki nou'n fer *design* nou'n fer *costing* e nou sipoze ganny finansman anba *Indian Grant*.

E dernyerman e sa nou fer sa depi lannen pase en byen boner lannen pase. E pou le moman nou pa ankor ganny okenn *feedback*. E dernyerman mon ti zwenn sa *chair Indian Grant* sa dimoun si oule ki responsab, i ti dir mon *ok* tenir keksoz pe vini.

E nou pe espere petet tre probab i kapab sa lannen me si toutfwa parey mon, mon'n dir pli boner se ki *design* in ganny fer, *costing* in ganny fer e zis nou pe esper finansman.

E le moman finansman nou gannyen mon krwar nou a fer enplimantasyon. E kote lo kote Marie-Jeanne *Estate* Mr Pillay i kapab donn en pti leklersisman lo la.

Me dan Bidze li menm la si ou pe, ou pe koz finansman lo Marie-Jeanne *Estate* nou, nou pa'n met larzan pou Marie-Jeanne *Estate* apard ki nou kapab fer bann *one-off* ki parey nou fer dan tou distrik ler i annan, i annan en *needs* pou nou fer sa.

E sa byensir nou pou fer. E ki mon kapab dir ou se ki nou pou fer en vizit tre byento Praslin nou ava *assess* sityasyon e nou a regarde kan nou kapab fer sa *one-off*. Mersi Mr Speaker.

### **MR SPEAKER**

Mersi. Mr Pillay pou azoute la? Non. Mersi *ok* nou a

kontinyen. Onorab Phillip Arissol.

### **HON PHILLIP ARISSOL**

Mersi Mr Chair. Bonn apre midi tou dimoun. Minis dan milye lannen pase mon ti fer en vizit avek *PS Agricole* pou war kote aktivite lanmar pe koz lerozyon e linondasyon lo serten propriyete Anse Boileau.

Eski Minis i kapab dir Lasanble, ki plan Departman Lanvironnman e Sanze Klima in konsevwar pou redwir risk e inondasyon dan plato Anse Boileau, koze par bann lanmar ki deborde pandan letan gro lapli?

E mon konnen i kout bokou e i pa pou ganny fer tou deswit, me eski zot i dan zot plan pou fer en *rock armoring* lo bordaz sa bann lanmar? Pou osi anpese ki sa bann zabitan i perdi zot landrwa zot later avek lerozyon? Mersi.

### **MR SPEAKER**

Mersi.

### **MINISTER FLAVIEN JOUBERT**

Mersi Mr Chair. Mersi Onorab pou sa kestyon. Mon pou pas laparol a Mr *PS Agricole* pou li reponn.

### **MR SPEAKER**

Wi *PS*.

**PS WILLS AGRICOLE**

Mersi Mr Chair. Mersi Onorab pou ou kestyon. Wi Onorab nou ti fer vizit mon rappel tre byen Out lannen pase. Nou idantifye bann landrwa ki nou, nou kapab entervenir, pou fer sir ki i rezourd en pe sa bann *issues*. Lannen pase nou pa'n kapab fer gran soz apard ki kot Mr Malvina nou ti'n fer en travay.

Me sa lannen i annan dan nou, dan nou lalis fer serten travay dan Anse Boileau. Nou annan de landrwa ki nou pou, ki nou pou antreprann. E i dan Bidze. I pa neserman ki i reste Anse Boileau akoz sa *budget item* i tonm anba *'repairs and maintenance.'*

E nou fini fer bann travay preliminar ki lafason ki nou pou fer sa travay. Byensir nou pou zwenn ek ou pou nou kapab osi met ou *input* dan en fason ki ler sa travay i ganny fer i pa zis ekspertiz sorti kot Minister ki vini ki fer sa travay.

Nou osi nou a ganny ou, ou *input* e petet osi kapab i kout pli bonmarse ki nou ti pe mazine. Mersi Mr Chair.

**MR SPEAKER**

Mersi. Onorab Bistoquet.

**HON ROSIE BISTOQUET**

Bonn apre midi Mr Speaker. Bonn apre midi Minis avek ou

delegasyon. Mon annan trwa kestyon, mon pou deriv lo sa kestyon ki Onorab Arissol in dir.

I annan anba *PSIP channels and marshes* lanmar avek debousman mon krwar i apele an Kreol. I annan R15.742milyon, mon pe regarde si sa osi pou ede sirtou dan sa lanmar Pointe Larue ki fer letour deryer lekol ki afekte lekol ki pas anba dan anndan dan lekol segonder i al debous lot kote. Si zot pe konsider akoz menm i afekte bann zabitan ki reste zis akote lekol segonder?

Dezyenm mon pou al lo *flooding* ouswa linondasyon Pointe Larue ankor. I annan diferan letid ki'n ganny fer letid lo lerozyon lakot e linondasyon e zesyon stratezik 2014 ti ganny fer par *JICA*. Apre i annan lezot letid ankor ki'n ganny fer anba *EIA Regulations 1996*.

Be baze lo sa bann letid nou ti ganny detrwa sityasyon par egzanp letan nou ti annan siklonn *Dallas* ti annan *flood* 2013 en rapor ti ganny sorti. Ankor ti annan *Felleng* 2013 ankor Zanvyen en lot rapor ti ganny sorti.

Me ziska ozordi nou pa ankor tann nanryen ki pe arive lo kote *flooding*. Konmsi ki plan stratezik ki nou Gouvernman i sipoze anmennen?



Petet la avek sa nouvo Gouvernman nouvo Minis, mon konnen zot bezwen annan, annan en, en proze ki pou vini byento lo la. Be selman dimoun Pointe Larue pe demande.

Letan nou lo *flooding* i annan sa bout ki apel *Cat DDO* mon pa konnen si zot konnen *Department Policy Loan with Catastrophic Deferred Drawdown Option*. Petet donn nou en pti pe leklersisman lo la ?

Mon lot pwen dernyen i lo lenerzi renouvlab anba zot *programme 2* mon annan i annan apepre 37milyon en Bidze ki mon'n trouve 005.

Ki bann proze ki pou fer kot bann lakour bann dimoun vilnerab. E ki pe arive avek sa proze eski i ankor pe demare aköz nou pa pe tro tann, tann byen lo la? E apre baze lo sa mon a demann, mon a demann leklersisman. Mersi Mr Speaker.

**MR SPEAKER**

Wi.

**MINISTER FLAVIEN JOUBERT**

Mersi Mr Chair. Mon krwar *PS Agricole* in byen plase pou reponn sa bann kestyon, sirtou bann ki konsern bann keksoz ki'n pase, apre bann rapor ek bann solisyon ki'n ganny prezante konsernan

bann problem ki'n pase dan lefase.

Mon mazinen ou pe koz tousala i annan pou fer avek Pointe Larue Onorab. E mon demann laparol mon a demann Mr Agricole pou pran laparol.

**MR SPEAKER**

*PS* wi. Wi.

**PS WILLS AGRICOLE**

Mr Chair mersi. *DG Pillay* i o fe ek tou sa bann *issues* ki'n ganny mansyonnen e i pare pou donn en, en pti leklersisman. Mersi.

**MR SPEAKER**

Mersi. Wi *DG*.

**DG SELVAN PILLAY**

Mersi Mr Chair. Mersi Onorab pou ou bann kestyon dan sa Bidze sa lannen pou nou zefor pou minimiz inondasyon nou'n *plan* pou nou fer *disilting* lo trwa pwen Pointe Larue.

Sa i konpri kot *lower* Matata obor kot Lakademi Lapolis. I annan sa larivyer kot Anse Déjeuner kot la vizavi *bus stop* Erport. Apre i annan sa lanmar ki deryer lekol Pointe Larue i osi lekol segonder i osi i dan lalis pou nou fer *disilting work*.

E sa parey mon'n dir taler i en zefor pou minimiz *flooding*. Nou pa pou elimin

*flooding* 100poursan e i ava, i ava fer en pe *mitigation work*.

Ankor dan laliny pou nou minimiz inondasyon Pointe Larue dan distrik Pointe Larue i annan sa proze *third lane* ki sipoze vini pandan sa lannen 2021, ki Departman Transpor Lotorite Transpor ki pe travay lo la.

E nou'n travay etrwatman avek zot, e bann solisyon drenaz in ganny enkorpoze dan sa proze *third lane* ki ava soulaz en pti pe sirtou bann motoris avek bann rezidan ki reste lo plato Pointe Larue. Mersi.

### **MR SPEAKER**

Mersi. Wi PS.

### **PS WILLS AGRICOLE**

Konsernan sa keस्थ्यon lo *renewable energy* pou bann dimoun vilnerab. Petet Onorab i kapab eklersi mon ki bor *PSIP* in war sa?

### **MR SPEAKER**

Ou *micro i on*. *Micro* silvouple.

### **HON ROSIE BISTOQUET**

I lo ou *detail budget* apre i annan osi lo *PSIP* lo *table of content* si ou get anba byen.

### **MR SPEAKER**

Wi PS.

### **HON ROSIE BISTOQUET**

*Programme 2*, i *programme 2* lo *carbon* i annan enn ki koz lo *renewable energy budget PSIP* *programme 2* - 37million 005.

### **PS WILLS AGRICOLE**

Ok mersi Mr Chairman. Anfet sa, sa proze i pa sipoze sa lannen, akoz mwan lenformasyon ki mon annan lo sa proze se ki sa proze ti sipoze konplete depi 2019.

E i ti pe ganny *manage* par *the Project Cordinating Unit of Government of Seychelles and Global Environment Facility - NDP*. E petet Onorab mon kapab rod en plis leklersisman pou ou kapab, pou nou kapab byen konpran si vreman i annan sa larzan la ki pou *entail* tel proze.

Akoz mwan si i annan sa larzan byensir nou pe rod finansman pou nou akseler *renewable energy* dan pei. Mon krwar i zis ti a byen ki nou, ki nou met larzan pou fer sa travay.

Parey mon'n dir mon a rod sa leklersisman epi pou nou kapab donn ou sa lenformasyon. Mersi Mr Chairman.

### **MR SPEAKER**

Mersi. Wi Onorab.

### **HON ROSIE BISTOQUET**

Ok mersi Mr Chair. Mon pe demann en lot keस्थ्यon

siplemanter i swiv avek sa.  
Eski Minis i ...

**MR SPEAKER**

Onorab ou'n demann trwa  
kestyon siplemanter.

**HON ROSIE BISTOQUET**

Non lo sanmenm sa *climate* sa  
...

**MR SPEAKER**

Ale rod leklersisman wi.

**HON ROSIE BISTOQUET**

*Solar* leklersisman *solar*, e  
akoz mon ti pe dir zis mon pe  
demann sa kestyon avan.  
Eski Minister i konsider met  
*solar panel* lo tou bann lekol  
avek bann lakour, avek sipor  
osi bann lakour bann dimoun  
ordiner? Mersi.

**MR SPEAKER**

Mersi Onorab. *PS*.

**PS WILLS AGRICOLE**

Wi kot i konsern bann lekol,  
byensir dernyerman ki'n arive  
petet ou parey ou, ou'n an  
tande dan nouvel ti annan en  
delegasyon Sinwan ki ti vin isi,  
nou ti siny en *MOU* anfet nou  
Minis ki la ti siny en *MOU* avek  
zot, pou environ \$6.4milyon  
pou zisteman met fotovoltaik  
lo bann twatir bann lekol.

E sa i en travay ki pe al  
ganny antreprann sa lannen.  
E sa i enn. Dezyenm kot i  
konsern pou bann dimoun

vilnerab oubyen bann dimoun  
kot lakour.

E nou annan en, en  
sistem an plas ki *Seychelles  
Energy Commission* ki li ki  
kordin sa. Nenport ki dimoun  
ki petet i anvi met *PV* lo son  
twatir lo son *household*, ki  
annan pou fer se zis i kontakte  
*Seychelles Energy Commission*  
e sa lorganizasyon i kapab  
donn zot sa bann detay ki kwa  
ki merit ganny fer e zot, zot a  
fer le neser.

Me pou le moman  
Gouvernman *as* finansman  
sorti kot nou i konsernen pou  
met *PV* lo lakaz endividyel,  
nou napa finansman. Nou  
annan finansman parey mon'n  
dir pou met lo lekol atraver sa  
don sorti kot Gouvernman  
Sinwan e vwala se sa. Mersi  
Mr Chairman.

**MR SPEAKER**

Mersi *PS*. Onorab Gabriel.

**HON CONRAD GABRIEL**

Mersi Mr Chair. *Welcome*  
delegasyon. Premyerman  
Pointe Larue i annan sa  
*mangroove swamps* mon  
krwar Mr Pillay i konn tre  
byen, i sipoze anba proteksyon  
and *accordance* avek *UN  
Ramsar Convention on  
Wetlands Protection*.

Petet mon ti a kontan  
konnen ki zot Minister pou fer  
pou netway sa *wetland* la.  
Mon krwar ou ti al ek mon lo

vizit Mr Pillay ti al vizit ansanm i annan en pe *flooding* la.

E i a tir en pe presyon ki sorti otour lekòl Pointe Larue an zeneral sorti Nageon Estate ki al direk la ziska *wetland*? Apre lo sa bout erport kot i annan sa solisyon tanporer ki'n ganny trouve, mon ti a kontan konnen dan sa main *outlet* ki zet sa delo si zot annan plan pou fer sa *disilting this year*?

Akoz i kapab en *major factor* si lapli i tonbe, e an menm tan i annan lanmer mont i kapab kre en gro problemm. Mersi.

### **MR SPEAKER**

Mersi. Lekel ki pou adrese DG? Wi.

### **DG SELVAN PILLAY**

Mersi Mr Chair. Mersi Onorab pou ou kestyon. Pou reponn ou kestyon kote Erport sa *main channel* parey mon'n mansyonnen taler i annan en *disilting work* ki nou'n met dan nou lalis proze sa lannen.

I pou konmans kot deryer lakaz Mr Stravens e ziska kot sa *main outlet* kot larantre kot *roundabout* Erport.

Apre kot i konsern kot lekòl la bann *flooding* kot lekòl ensi avek sa *mangroove* ki trouve zis par devan kot *DA's office*.

Annefe i anba netwayaz kontra *outsourcing* e nou'n, nou'n fini koz avek kontrakter ki i pou bezwen fer sir ki sa i ganny netwaye e sa i *following* sa vizit ki nou ti fer ansanm.

Apre zis pou azout lo la ankor, i annan en proze drenaz, sa drenaz ki sorti deryer lekòl segonder, i pas deryer lakres apre i pas par deryer lekòl primer.

I dan nou plan pou nou *improve* sa drenaz e nou pe travay ansanm avek Departman Enfrastruktir pou realiz sa proze. Mersi.

### **MR SPEAKER**

Mersi. Nou kontinyen. Onorab Adelaide.

### **HON FRANCOIS ADELAIDE**

Mersi Mr Chair. Bonn apre midi Minis avek ou delegasyon. Minis lo *anyway panel* lo PSIP paz 31, nou annan de proze mon war enn Anse Gaulette mon konfirman i Anse Gaulette Baie Lazare pa La Digue.

I annan R1.5milyon apre nou annan Anse La Mouche *maintenance phase 1*, R500mil. So mon ti a kontan konnen lekòl sa de proze? E mon dezyenm kestyon se mon, mon pe demande ki protokòl pou en dimoun swa en group dimoun kas en lanmar?

Akoz mon konnen lanmar i en keksoz ki dan son

leta natirel ki filtre delo *whatsoever* apre ler i pare.

Be Anse Gaulette i annan enn, aparaman mon krwar i annan bokou bann keksoz ki pe mete ladan. E tou lede semenn nou bezwen kase akoz i sal i pi, e ler si nou pou esper letan li menm i pou pran bokou letan e fer ki i annan problemn.

So petet mon ti a demande ki zot vin get en kou. Mon pa ti anvi demann sa keston la, be selman mannyer sityasyon i ete mon bezwen fer li pas ladan. So mersi.

**MR SPEAKER**

Mersi.

**MINISTER FLAVIEN JOUBERT**

Mersi Chair. Mersi Onorab. Mon ava, mon ava pas laparol avek PS Agricole avek DG Pillay silvouple.

**MR SPEAKER**

PS wi.

**DG SELVAN PILLAY**

Mersi Mr Chair. E mersi Onorab pou ou keston. i vre nou annan 1.5milyon dan nou PSIP pou sa lannen 2021. Pou *coastal protection work* Anse Gaulette e sa i sa *stretch* semen kot lontan ti annan en *nightclub* ki apel *Greenways* i dan sa rezyon la.

E annefe la aktyelman la ansanm ankor ansanm avek Departman Enfrastruktir nou pou *design* en proteksyon *along* sa semen. Akoz parey ou konnen i annan disab ek delo sale pandan *high tide* i *flood* sa semen.

Apre Anse La Mouche i annan 500mil i annan mon krwar ou okouran i annan sa premye faz ki ti ganny fer, i annan apepre 8an pase kot ti servi *timber piling*.

I zis pa tro lwen avek *Anchor Cafe* e in ganny andomaze. Alors nou bezwen nou'n met sa 500mil pou kapab fer en pe restorasyon probableman remet sa bann nouvo *timber piling* pou kapab *secure* sa bout lans. Mersi.

**MR SPEAKER**

Wi Onorab pou klarifye. *Micro*.

**MINISTER FLAVIEN JOUBERT**

Mr Chair mon krwar Mr PS Agricole pou reponn dezyenm morso sa keston konsernan kas lanmar. Mersi.

**MR SPEAKER**

Wi, PS.

**PS WILLS AGRICOLE**

Wi mersi Mr Chairman. Mersi Onorab pou keston. Mon krwar Onorab parey ou'n fer resorti se ki nou ava organize mon annan ou limero ou

kontak pou nou kapab zwenn nou kapab koz lo sa size ki ou'n met devan, e nou ava war en solisyon pou li. Mersi.

**MR SPEAKER**

Wi. Onorab klarifye.

**HON FRANCOIS ADELAIDE**

Mersi *panel* pou zot korperasyon. So zis en pti gin petet lo kote sa de proze anba *PSIP*. Minis avek ou lekip mon ti a kontan ki si zot lekip avan zot fer okenn proze, ki mon krwar i pou bon pou nou selman annou konsilte en pti gin avek piblik anmenn piblik en pti gin ladan.

Akoz nou annan en pe konsern i annan bann lakaz lanmenm sirtou Anse Gaulette la obor semen, so zot osi zot annan enn de kontrent ki zot anvi pase devan e petet ansanm nou a kapab fer en pli bon travay, so ki dimoun ava korpere. Mersi.

**MR SPEAKER**

Mersi. Minis ou'n note.

**MINISTER FLAVIEN JOUBERT**

Wi mersi Mr Speaker. Mon'n not Mr Chair mersi Onorab pou sa kestyon. Mon'n note e zis pou enform ou Onorab ki sa proze tre probableman i pou ganny fer avek kolaborasyon *Land Transport*

ek Departman Lenfrastriktir i pou en proze ase konpreansiv.

Alor byensir i pou bezwen annan sa lenformasyon ganny pase avek tou dimoun dan sa rezyon, letan sa proze pe ganny fer a pe ganny fer e nou ava asire ki sa i ganny fer. Mersi bokou.

**MR SPEAKER**

Mersi. Onorab Uranie.

**HON ROCKY URANIE**

Mersi Mr Chair. Bonn apre midi Minis, *PS* e tou koleg Onorab. Minis mon krwar sa kestyon ki mon pe al demande i annan pou fer avek priyorite stratezik katriyenm boulet pli prezizeman, ou a koriz mwan si mon mal.

Minis ou'n war ki La Digue i annan bokou plis konstrikasyon letablisman touristik ki pe ganny fer lo lakot. An vi sanzman klima lakot pe degrade eski zot antre pou ed sa bann letablisman pou fer zot bann baraz ros, oubyen sa i vin zot demerd, akoz zot ki'n deside pou fer konstrikasyon lo lakot? Sa ti mon premye kestyon.

Mon dezyenm drenaz La Digue i reste enn nou priyorite nou'n war lo La Digue i bezwen bokou plis drenaz ki pou kre sa *network*, pou ede anpes linondasyon dan bann plato letan gro lapli.

Me mon pa war okenn alokasyon dan Bidze ni pou sa lannen, ni pou lannen prosenn e menm son lannen answit ou war en pti zafer. Petet Minis ou ti a donn mon en leklersisman lo la.

Mon trwazyenm, eski Minis i kapab dir mon an relasyon avek La Digue, lekel ki responsab pou tir disab, debri, oubyen *disilting* dan sa bann *outlet* pou fer ki delo dan plato i kapab ganny tire, pou anpese ki linondasyon i arive. Mersi Mr Chair.

### **MR SPEAKER**

Mersi. *Panel.*

### **MINISTER FLAVIEN JOUBERT**

Mersi Mr Chair. Mon pou reponn de parmi sa trwa kestyon, e sa lot morso mon pou pas avek PS Agricole. Kot i konsern konstriksyon lo lakot byensir ki nou bezwen a tou moman letan i annan bann problemm lerozyon antre e protez nou lakot. Akoz sa lakot i pa pou bann endividi i plito pou pei.

E nou bezwen rod fason pou nou protez li me parey Onorab i konnen parfwa resours i limite. Me nou bezwen sey priyoritiz bann resours e azir dan bann landrwa ki nou konnen problemm i pli serye.

E dan bann ka kot bann dimoun pe ganny bann problemm ase serye, i enportan ki zot vin devan e en fason ou en lot nou bezwen trouv bann lezot resours adisyonnal pou nou kapab adres bann problemm dan sa bann landrwa, kot i annan sa bann problemm pe arive.

Alors i annan en pwen partikilye lo La Digue, ki i pa pe ganny adrese la konmela e ki pa'n ganny met dan priyorite la deswit.

Mon krwar ti a bon enform nou, nou ava gete kwa kot nou kapab trouv en pe resours e nou a sey gete si nou kapab adres li dan en fason ase vit.

Me en lot keksoz ki mon ti a kontan fer, fer sorti Onorab se ki, i osi annan sa posibilite pou bann dimoun ki annan propriyete lo bor lakot i annan plizyer in pran linisyativ in fer li.

E bann ki kapab annan ase resours, zot kapab avek gidans Minister fer zot prop travay me nou, nou fer nou bezwen asire ki sa i mars ansanm avek tou bann lezot proteksyon, ki ganny fer lo lakot e i ganny fer dan en fason byen.

Alor mon pou ankouraz bann ki kapab pou osi aproz vin devan avek zot bann propozisyon, e nou ava travay avek zot nou lekip teknik ava

travay avek zot pou asire ki sa bann proteksyon osi marye ansanm avek bann ki pe fer par Gouvernman.

Akoz i pou difisil pou Gouvernman kouver tou lakot dan en letan vreman kourt nou bezwen pran letan. E an mezir ki ou pe fer sa i pou annan bann lezot ki pe ganny afekte ki pa pou ganny adrese deswit.

Kot i konsern *outlet* mon krwar Onorab Mondon pli boner ti lev en kestyon konsernan disab lo semen, e mon ti mansyonnen ki sa i enn bann size ki nou bezwen klarifye. Akoz nou pe ganny enpe problem lo la mon bezwen dir ou fransman i annan en pe konfizyon ant *LWMA* sa ki fer drenaz ek *Land Transport*.

E nou bezwen tonm dakor enn fwa pou tou lekel ki debous sa *outlet* letan disab i akimile lekel ki tir disab lo semen e menm brans par lao semen. I annan plizyer sa bann keksoz ki nou bezwen klarifye.

E parey mon'n dir ou mon ant diskisyon avek *Land Transport* pou nou fer sir ki dan en letan tre kourt nou kapab tonm dakor lo la e trouv bann resours anba Bidze pou nou fer li arive.

Mon konnen poudir La Digue i en ka partikilye, kot nou fer drenaz disab i ranpli

ladan apre nou netwaye lo sa disab me nou pa tir sa disab li menm dan sa drenaz. So mon krwar i en keksoz ki nou bezwen adrese ase vit. Mersi.

### **MR SPEAKER**

I annan pwèn ki *PS Agricole* pou adrese oubyen *DG*? *Ok*.

### **DG SELVAN PILLAY**

Mersi Mr Chair. Mersi Onorab pou ou kestyon. Permet mon pou dekrir en pe bann travay ki *on deza ongoing* e bann travay ki nou, nou pe *plan* pou fer.

Aktyelman la i annan en travay ki ganny finanse par Linyon Eropen, i annan 5 *outlet* i annan 4 in fini fer i annan enn dernyen ki pe fer. I annan en proze drenaz ki nou pe travay ansanm avek Departman Lenfrastruktir dan rezyon kot lekol avek legliz.

E sa i pou ganny *tender* dan 3 ou 4 semenn e sa i pou ede tir delo dan rezyon lekol avek kot legliz, e i pou desarz dan, dan enn bann *outlet* ki'n ganny fer anba sa proze *EU*.

An plis ki sa nou annan ankor 3 lezot proze ki Gouvernman in fini anvoy kontra. Premye i annan en *disilting* ek *rock armoring* kot lanmar Soupap i konmans pre kot sa pon kot bann Waye-Hive i reste e i ale kot sa lot pon kot bann Lablache.



Apré de, dezyenm bout i konmans kot Estelina Bibi apre i fini kot bann Redegonde. Apré La Passe *River* kot i konmans kot i annan en landrwa kot i annan en bon pe lisyen ziska kot sa tipti pon kot Estelina Bibi i reste.

Sa i louvraz *disilting* ek *rock armoring work* lo lanmar Soupap. Prezan i annan en, en proze drenaz nou pe nou'n fini donn kontra annefe *LABCO* ki kontrakter.

Proze drenaz kot Coco Ibri en semen ki appel Coco Ibri sa, sa parey zot konnen i *L'Union Estate*. E sa, sa drenaz li i pou desarz dan lanmar i pa pou desarz bor lanmer. Nou pe fer sir ki i desarz dan lanmar, aköz tipografi ki mannyer i ete nou pa pou kapab anmenn sa delo desarze dan lanmer.

I e sa proze i pou annan en dezyenm faz plitar e dan rezyon Coco Ibri sa semen Coco Ibri e li i pou desarz kot sa *outlet* ki'n fek fer par anba proze Linyon Eropéen kot *helipad*.

Nou dernyen proze ki nou'n fini donn kontra *Allied* ki'n ganny kontra, i konstriksyon drenaz *Liside Road* La Passe plizoumwen kot La Passe.

I annan en bout ki konmans kot apepre kot Chez Marston apre i al fini kot bann

Radegonde zis par deryer biro, biro *DA*. Apré i annan en lot seksyon ki konmans kot *housing estate* e i desarz dan lanmar Soupap.

Apré i annan en lot faz kot, kot i pou desarz kot dan sa *outlet Doctor's House*. Mon krwar mon'n reponn - *I hope* mon'n reponn bann kestyon tou bann kestyon ki Onorab in poze. Mersi.

### **MR SPEAKER**

Mersi *DG* tre byen. *Ok* Onorab Esparon.

### **HON REGINA ESPARON**

Mersi Mr Chair. Bonn apre midi Minis ek ou delegasyon. Mr Chair dan *PSIP* i annan lo paz 31 ankor i annan en sonm R200mil anba *local financing* pou proze *coastal protection*.

Eski sa i en nouvo proze nouvo faz travay anba *coastal management*? Mon ti a kontan ganny en pe leklersisman sa R200mil pe al ganny depanse North East Point pou fer egzaktaman kwa?

An menm tan ti annan en proze ti annan enn sa proze rre amenazman lanmar North East Point anba proze *GEF Small Grant Program* ki ti ganny inisyé par *UNDP*. Ki mon pe, mon pa pe war i reflekte dan sa Bidze mon mazine ti en *foreign Grant* sa.

Mon ti a kontan konnen si, si i en proze ki'n ganny

finanse antyerman anba program *UNDP* e si Gouvernman Sesel i annan kontribisyon ladan? Si wi konbyen larzan Gouvernman Sesel in mete dan sa proze e kan ki sa reanmenazman pou terminen?

Lekel ki sipoze - nou konnen poudir bokou fwa ler nou fer amenazman apre napa *maintenance* ki ganny fer, lekel ki pou finanse pou *maintenance* sa lanmar?

Mr Speaker mon ti a osi kontan konnen ki Polisi an sa ki konsern konstriksyon lo lanmar? Parske i annan *pegging* ki'n ganny fer lo sa menm lanmar pou en konstriksyon.

E mon'n tann, mon'n tann *PS Agricole* in dir poudir kominote i bezwen raport sa bann keksoz. I annan en *task force* ki ti ganny *set-up* e la mon pou remersi i annan sa trwa dimoun ki sorti kot sa *Unit* ki pe fer *oversight* lo sa bann sa proze *UNDP* i annan Miss Betty, i annan Rohan apre i annan Rajel.

Zot pe fer en bon travay zot in *set-up* en *task force* ki bann dimoun ki *neighborhood* dan sa rezyon sa lanmar. Sa keksoz in ganny raporte me ziska prezan nou pa ankor tann nanryen.

Mon ti a kontan konnen ki Polisi konstri lo lanmar parske nou bezwen mazine

kontrent ti annan ler sa lanmar ti bouse? Lafanmir Godley dan plato souvandfwa ti ganny afekte parske lanmar ti monte e parfwa zot pa ti menm kapab sorti dan zot lakaz.

An se moman la i annan plan pou, pou fer renovasyon lo *vocational training center* sa lanmar i konmans deryer sa batiman kot bann *autism* i ete la.

Letan lapli i tonbe lanmar i monte delo i filtre partou la. E pou bann marmay kot *VTC* la i fer ki manner sa lanmar i ete la zot pa pe kapab traverse sorti kot zot *main block* pou al lot kote kot zot *workshop* i ete. Parske ler delo i monte letan lanmar i plen delo i monte e i difisil pou zot travay.

Mon pe mazine Mr Chair avek en konstriksyon ki pou ganny fer lo sa lanmar sa konstriksyon i dan rezyon kot bann Pool kot Villa Koket.

Mon konnen dan sa plan ek *UNDP* i annan en, en plan pou fer en *culvert* ant *Rehab* avek Villa Koket. Me selman sa i ankor dan plan i pa en keksoz ki'n ganny materyalize konstriksyon *go on?* en pti pe leklersisman silvouple?

### **MR SPEAKER**

Mersi Onorab. Minis mon a dir ou diriz sa.

**MINISTER FLAVIEN JOUBERT**

Mersi Mr Chair. Mersi Onorab pou ou bann kestyon. Kot i konsern proteksyon lakot North East Point ek lanmar North East Point mon ava demann PS Agricole pou entervenir. E apre mon ava demann PS Decomarmond pou koz lo konstriksyon lo lanmar ki'n ganny leve par Onorab. Mersi.

**MR SPEAKER**

Mersi. PS Agricole wi.

**PS WILLS AGRICOLE**

Mersi Mr Chairman. Mersi Onorab pou ou bann kestyon. Kestyon i vreman enportan. Premyerman mon a *tackle* sa zafer R200mil ki ou'n war dan Bidze sa pou konstri bann *bollards* me sa larzan i pa pou sa lannen i pou nou *project* li pou lannen 2022 si sa ki mon pe war i korek.

Wi be pli devan, pli devan si ou ale *forecast* 2022 selman i ant 21 a 2023. Selman i pou fer li *in 2022*. So swiv byen sa laliny ou al kot 2022 ou pou war anba 2021 napa nanryen.

Apre konsernan *EBA project* wi sa i, sa i vreman enteresan sa enn. Wi *EBA project* i en, en proze ganny finansman anba *Adaptation Fund* en, en *mechanism* finansman anba *United*

*Framework Convention of Climate Change*.

Kot zot asiste bann pti pei ouswa bann pei ki pe devlope pou adapte avek sanzman klima. E nou Sesel nou'n vreman *lucky* pou nou ganny 6.5, \$5.6milyon. E sa ti depi 2017 sa proze pe ale e sa proze i sipoze terminen sa lannen 2021 Oktob.

Prezan ki pou arive, ler nou'n fer sa bann travay diferan travay ki'n ganny fer depi Danm Lerwa Baie Lazare, Bougainville, dan Caiman, Anse Royale menm Praslin apre osi byensir parey Onorab in fer resorti North East Point.

Nou bezwen vin avek en *exit strategy* lekel ki *take over*? *How do we manage* sa zoli travay ki'n ganny fer depi tou sa peryod ek sa, sa kalite finansman ki vreman en gro finansman enkrwayab?

E se pou kwa ki mon konman PS nou pe met ansanm sa tim nou pe met en ansanm en *Watershed Management Team* pou tou sa bann distrik ki mon'n mansyonnen pou war ki fason nou travay ler sa proze i, i terminen.

Dan en mannyer parey mon kapab aksepte ki dan lepase in ariv koumsa ki ler proze i fini personn pa gete e keksoz i al an dan labandon.

E nou, nou pe fer sir ki sa voyaz ek sa kalite finansman

ki vreman sibstansyel. Nou bezwen fer sir ki ler nou, nou bann diferan zofisyè sanzman klima ki baze Lonn, i vin Sesel omwen i a kapab war sa kalite travay ki'n ganny fer avek sa bann larzan.

E plitar osi nou kapab ganny ankor finansman pou, pou nou fer lezot proze. Epi Onorab nou pou fer en travay vreman, vreman enportan lo la.

Akoz parey mon pa konnen si ou'n deza tande, ki nou annan en *Shoreline Management Plan* pou North East Point ki nou'n fini lanse.

E tousala i en i fer sir ki depi son lakot, son lans, son lanmar, kot bann dimoun aze i été.

E sa semen ki kapab dir i vreman detrwa dimoun i fer *speed* lo la, se ki nou bezwen met en tim ansanm ki dan sa *shore line management plan* sa landrwa North East Point i ganny byen zere, e dan en manner ki tou bann dimoun i entegre e zot viv parey zot sipoze viv.

E mwan, mon annan plezir pou dir ou ki tre byento mon pou al rapor avek UNFCCC pou donn zot montre zot ki, ki Sesel in fer avek sa lasistans ki nou'n gannyen. Kot ankor mon krwar plis ki sir ki i ava ed nou pou nou ganny lezot lasistans pou lezot

distrik, pou bann proze en pe similer.

Akoz *Ecosystem-based Adaptation*, i bann *Nature-based solutions is a talk of konmela*. E se sa ki, ki bann diferan *donors* ti a kontan ki bann pei i antreprann. Mersi Mr Speaker.

### **MR SPEAKER**

Nou a les PS Decomarmond reponn apre nou a regarde si ou bezwen klarifikasyon Onorab.

### **PS ALAIN DECOMARMOND**

Mersi Mr Chair. Zis pou azout en pti pe sa laspe konstriksyon. An term Polisi *Wetlands* Polisi nasyonal an prensip, se ki i demande ki si i annan okenn devlopman i bezwen ganny fer dan en fason soutenab. E sa i enkli konstriksyon osi.

Donk parey tou dimoun i konnen okenn aktivite devlopman, i bezwen permisyon Lotorite. I annan de Lotorite ki bezwen permisyon.

Premyerman i annan Lotorite Planifikasyon *Physical - Planning Authority*. E apre anba Lalwa osi i bezwen annan lotorizasyon lanvironnman.

Donk i enportan pou ki okenn aktivite devlopman, konstriksyon ki ganny fer dan bann landrwa - par egzantp

annou servi legzanp North East Point ;- vi ki i annan kantite zefor pe ganny fer atraver parey bann proze *Eco system-based Adaptation*. I enportan ki si i annan bann proze aktivite ki pe vini, konstriksiyon ki pe vini dan lefitir nou pran kont sa bann zefor sa bann proze in fer.

E ki mannyer nou fer sir ki bann bezwen kominote ekonomik i ganny kouver byen se ki sa *process* i bezwen ganny swiv.

I enportan ki si dimoun pa tro sir an term Lalwa ouswa lapros ki zot kapab swiv, zot kapab toultan demann konsey Lotorite *Planning* e osi Lanvironnman, kot nou dir en *pre-planning advice* e la zot kapab ganny en evidans si en keksoz i wi zot kapab fer i annan en posibilite ou non.

Me i annan en *apply application* i bezwen ganny fer. Mon a donn en senp *back filling* pou met *coralfil* enn pti pe dan lanmar i bezwen en *Planning application* ou bezwen lotorizasyon Lanvironnman.

Akoz nou an term lapros i annan konstriksiyon i posibil ganny fer dan lanmar. I depan son lapros i depan teknolozi i depan konstriksiyon ki mannyer pe ganny fer, si pe ganny fer lo pilye, i pe ganny *counter levered*.

*As much as possible* en Lalwa kle ki nou fer lo kote devlopman ansanm par egzanp lot Departman ki *deal* avek konservasyon lanmar, se ki *as much as possible* nou pa redwir kapasite sa sistenm li menm.

Donk nou konsiderasyon devlopman *physical development*, i bezwen pran kont sa, ki nou regarde si i posibil ki sa de i kapab *coexist* e i pou napa sa lenpak lo tou sa bann zefor ki nou pou investir sirtou lo bann proze finansman, pou *deal* avek ladaptasyon lo kote natirel. So i enportan ki sa i ganny met an plas.

Nou konnen i annan en kantite presyon lo bann lanmar, aköz dimoun i war sa toultan konman en lespas ki la ki potansyelman zot kapab devlope.

Me nou lo kote Lanvironnman tou lede Departman nou get sa byen strikteman. I annan ki ganny *approval* be selman sak *case* i ganny gete dapre son perspektiv parey nou dir, dapre son lapros e apre sa alokasyon spesifik si i posibil. Mersi Mr Chair.

### **MR SPEAKER**

Wi ou bezwen en leklersisman Onorab silvouple.

### **HON REGINA ESPARON**

Wi Mr Chair mersi bokou. Mr Chair mon konpran sa lesplikasyon ki *PS* in donnen, me selman an menm tan mon ti a swete ki nou annan konsiltasyon.

Parske Lotorite Distrik pa'n ganny konsilte pou sa proze ki pe al ganny fer lo lanmar. Kekfwa avek plis, plis konsiltasyon e lesplikasyon nou ava osi kapab, kapab *advise* bann dimoun dan *neighborhood*, ki pe kestyonn lo la.

Lo sa kote sa R200mil *PS* Agricole ou dir mwan i pou ganny depanse lannen prosenn sa.

An menm tan mon ti ava kontan konnen ou dir mon i anba proze, prozeksyon 2022. Wi mon ti ava kontan konnen la sa R200mil osi, nou ti ava kontan konnen egzakteman ki pe al fer avek. Lotorite Distrik i pa konnen. Parske ozordi mon pou lev mon lanmen mon pou vot pou sa Bidze mwan.

Me selman an menm tan mon pa konnen egzakteman kwa ki ou pe al fer avek sa R200mil. Akoz in napa konsiltasyon. Ti a bon a lavenir ki nou annan plis konsiltasyon avek Lotorite Distrik sirtou bann dimoun ki'n viv dan sa landrwa.

Si ou pe al *alter* en keksoz kekfwa kapab *advise* ou be non pa fer koumsa avek gran mare pou afekte koumsa,

koumsa. Plis konsiltasyon plis dyalog avek kominote silvouple ! Mersi.

### **MR SPEAKER**

Mersi. Minis wi ou a adrese.

### **MINISTER FLAVIEN JOUBERT**

Mersi Mr Chair. Mersi Onorab pou ou pwen. Mon krwar sa pwen konsiltasyon i enn ki nou bezwen pran kont. E mon dakor avek ou ki i annan en bon pe fwa pa zis dan ka North East Point, me dan plizyer dan bann devlopman dan distrik ki nou war ki i annan sa mank konsiltasyon.

Me la mon pou profite pou ankouraz tou lede sa ki pe fer devlopman, sa ki pe vin dan bann distrik konman Lotorite pou fer travay me osi nou bann dimoun dan distrik pou demann kestyon boner.

Akoz nou war ki parfwa dimoun in krwar poudir zot in konsilte salerla zot in koz avek en dimoun ouswa en endividi. Me apre nou realize poudir lenformasyon petet pa'n arive dan tou landrwa kot i merit arive.

Alor mon pou dakor avek ou ki wi nou pou bezwen amelyor konsiltasyon. Wi nou bezwen fer konnen bann piblik boner letan i ariv sa bann keksoz. E koumsa kekfwa keksoz i ava kapab bouz dan en fason pli normal e nou pa

ava ganny en konfli ki leve ant zabitan avek bann Lotorite.

Ti annan en lot pwen ki ou ti'n demande lo kwa ki sa proze pou fer? Mon krwar mon kapab zis pran sa vitman PS Agricole.

Se ki letan ou pe get lo, lo son deskripsyon i *bollards*, lenstalasyon *bollards basically* se bann striktir pou anpes transpor antre lo lans. Alor mon pe prezimen i sa, se en proze ki pou anpes letan ou fini fer proteksyon lakot, ou bezwen anpes transpor antre dan sa bann landrwa, ki ou'n proteze e donn li en sans pou li refer.

Zis parey nou'n war in arive Au Cap devan Pomme Cannelle. E nou war vezetasyon pe repouse aköz transpor i nepli sirkile dan sa bann landrwa e prezan sa lakot i ganny sans rebran. Alor mon krwar se sa. Mersi.

### **MR SPEAKER**

Mersi. Onorab Aglae.

### **HON EGBERT AGLAE**

Mersi Mr Chair. Bonn apre midi Minis, le de PS, delegasyon antye. Minis dabor mon ti a kontan remerci ou lekip pou zot travay ki zot pe fer, etandonnen ki Port Glaud i en pti pe mon kapab dir spesyal an term lanvironnman e nou lanvironnman.

Etandonnen ki nou posed de park maren nou annan sa *mangrove area* ki annan sa 7 *mangrove* kalite, apre nou annan sa bann rezerv.

Baze lo sa Minis mon ti a kontan petet demann ou dan si pou annan nouvo lapros travay ant bann *partners* ki relye avek sa bann mansyon ki mon'n nonmen, parey vi ki SNPA, *Botanic* nou'n nonmen ki i pou annan en *merger*.

LWMA, PUC e bann NGOs, Minister Lanvironnman li menm avek nou bann partner lokal. Eski pou annan sanzman dan fason fer? Aköz parfwa difikilte ki nou gannyen se bann konprenezon. Enn i tarde ler pou pran serten desizyon e li i annan son, son serten konsern kot pa pe ganny adrese e enn i tant pou blanm lot.

Eski nou pou annan sa sinerzi travay ansanm lo nivo distrik, sirtou pou nou kapab adres bann problem ki relye avek lanvironnman dan distrik?

Dezyenm Minis i annan en sonm 1.5milyon ki'n ganny mete anba zot *non-product assets* sa i plizoumwon pou fer avek *climate change*. Mon ti a kontan petet demann ou Minis lo size konstrikasyon sa *breakwater* ki'n ganny mete

dan Bidze pou 2021 pou Port Glaud.

Sa i mon konnen i devan kot Vilaz Prezidan *along that way*. Eski zot in fini finalize anvi ki ti pou annan bann eksper pou fer serten pti letid, pou zot kapab enplimant sa proze ki en bon pe letan nou pe espere, *ok?*

E dernyen Minis lo size, lo size rezerv Minis mon ti a kontan petet demann ou vi ki pou annan sa sanzman *SNPA* pou al direk anba *Seychelles Botanical Garden*, ki'n ladministrasyon in anonse.

Eski lo nivo bidzeter pou annan serten kontrent aköz deza problem se pou *maintain* sa bann *trail*. An vi ti annan *issue* bidzeter, eski nou pou asire ki sa bann *trail* ki'n ganny *earmark* depi lepase ki enportan ki bokou dimoun i frekante i pou ganny son lenportans neser pou ganny *maintain?* Mersi.

### **MR SPEAKER**

Mersi. Wi Minis.

### **MINISTER FLAVIEN JOUBERT**

Mersi Mr Chair. Mersi Onorab pou ou trwa kestyon. Mon a konmans lo kestyon limero 1 apre mon a pas laparol ek limero 3 petet apre mon a pas laparol avek *PS Agricole*.

Kot i konsern zesyon bann park ek bann rezerv, ou

kestyon ki ou pe demande se, eski pou annan plis kolaborasyon ant bann lotorite avek bann zabitan dan distrik e osi Lotorite Distrik?

Mon krwar sa i en bon en tre bon pwen ki nou devret reflexir lo la. Mon konpran apre mon konversasyon avek Minis ki responsab pou Gouvernman Lokal, ki zot pe reorganize pou fer sir ki Lotorite Distrik i vin pli efikas dan lafason i fer son louvraz.

E osi mon konpran ki parey in ganny anonse bann *MNAs* pou baze kot Lotorite Distrik pou ki nou kapab annan plis sa bout sa pli bon relasyon ant *MNA* avek Lotorite Distrik ek bann piblik.

E mon krwar atraver bann striktir ki pe vini nou pou bezwen entegre sa bann enteraksyon ki konsern bann Lotorite, e ki annan bann ki kouver bann keksoz enportan dan distrik.

E sa i enkli zesyon lanvironnman dan distrik li menm. E avan sa mon konnen ti annan bann *District Team* petet nou, nou bezwen re mazine ki mannyer nou kapab fer bann lekip ki efikas.

Akoz letan mon ti *LWMA* par egzant mon konnen bann zofisye ti bezwen al bann *District Team Meeting*, me nou bezwen petet fer en revu la i le moman pou nou fer en revu e gete si vremen sa striktir ki ti



an plas ti efikas ouswa si nou bezwen amelyor li ankor.

Pou nou annan en enteraksyon ki bokou pli aktiv dan sa bann ka. Dan ka Port Glaud an partikilye mon konnen poudir la resaman i annan en proze ki'n lanse pou zesyon park ouswa rezerv, an kolaborasyon avek zabitan avek kominote, e mon krwar sa i en bon linisyativ i pe ganny fer par *SNPA* avek *Nature Seychelles*.

E mon krwar sa i en bon linisyativ kot nou kapab angaz bann dimoun ki pe reste otour bann rezerv, vreman dan desizyon ki annan pou fer avek sa bann lespas proteze.

Alor mon pe get li konman en keksoz ki pozitiv pou le fitir e ki nou kapab devlope atraver bann nouvo linisyativ ki pe vini, dan distrik li menm.

Eski sa *merger* avek *SNPA* avek *NBGF* pou anmenn bann, bann kontrent bidzeter? *SNPA* ti pe pran en lapros kot i ti pe vin endepandan lo Bidze lo kote Bidze e i ti pou anmas son prop reveni e i ti pou servi sa.

E Botanik pou le moman i pe anmas en pe larzan me i pa pe kouver 100poursan son Bidze ki i pe depanse. I pou annan bann kontrent byensir e letan sa nouvo antite i demare, nou pou bezwen travay avek li pou fer sir ki i

kapab siport son lekor, e ki evantuelman i debout lo son de lipye, pou li kapab fer sa ki i sipoze pe fer.

Me mon napa dout ki letan ou met sa de Lotorite ansanm e letan ou eksplor bann lezot loportinite reveni, i posib dan en lannen normal pa en lannen parey 2020 ouswa 2021.

Dan en, dan en lannen normal i posib pou ou ganny en bon pe reveni, ki a kapab kouver en bon pe sa bann aktivite ki sa de antite i bezwen fer. Me selman parey mon ti tann *PS Decomarmond* koz en pti pe lo la pli boner, nou osi annan bann possibilite pou atraver resours sorti lezot landrwa. Toultan nou kapab atrakte resours sorti - lezot sours ki kapab ede dan sa bann ka parey.

Mon a donn ou en legzanp se ki letan ou pe koz bann *trail* tou sa bann *board* nouvo *board* ki'n ganny mete lo bann *trail* bann *board* lenformasyon Mahe, Praslin, La Digue, sa i sorti anba en proze kot Lotorite. Gouvernman in al rod sa bann resours an deor e in met an plas en proze e la prezan nou kapab depans li lo sa bann *trail* e amelyor li.

Apré egzanp *Copolia trail* bann lezot landrwa eksetera. Alor i enportan ki nou ganny nou en antite ki kapab sipor

son lekor finansyerman me nou osi annan nou en antite ki annan sa kapasite pou ale kre proze e akse sa bann resours ki annan dan bann diferan landrwa sirtou aletranze.

Pou ki zot kapab fer en diferans dan zot manda ki zot sipoze pe fer. Mon a pas laparol avek PS Agricole pou sa lot kestyon konsernan *breakwater* Port Glaud.

### **MR SPEAKER**

PS wi. Wi PS.

### **PS WILLS AGRICOLE**

Mersi Mr Chair. Wi konsernan *breakwater* Port Glaud si ou get dan sa dokiman PSIP i dir *financing between 2021 to 2023*. E ler ou al swiv pli devan si ou get dan lannen 2021 i pa la. I aparet dan *forecast 2022*. Savedir 2022.

*Anyway* konsern, konsernan sa *breakwater* ki nou'n fer antretan se ki nou ti annan en, en *consultancy* ki ti vin isi en *consultant* apele *One World* baze Sid Lafrik.

E mon dan mon bann negosyasyon sanzman klima nou'n kapab ganny bann finansman avek *Green Climate Fund*, pou anmenn sa group isi e fer en *assessment* zisteman lo ki fason nou kapab fer sa *breakwater* Port Glaud.

E sa dimoun in fini, i ti la lannen pase in fini fer sa

travay e la nou pe esper *feedback* sorti kot li. E tre byento la lafen Avril, nou pou annan sa group byensir zot baze Sid Lafrik si restriksyon i ganny *lifted* si Sid Lafrik i sorti dan bann *Red List*, i zot pou kapab vin isi. E byensir nou kapab fer sa enteraksyon ki fason nou pou antreprann sa proze.

Akoz sa i baze lo en *country program* anba *Green Climate Fund*, kot Sesel in kapab ganny bann sipor teknik en, nou pa'n ganny finansman - sipor teknik pou *assess* fer *assessment* e raporte apre nou kapab ganny bann lezot finansman pou enplimante.

Me la pou le moman sa ki dan Bidze la se sa la Gouvernman Sesel ki pe in met sa larzan pou fer sa travay. I pa neserman ki sa larzan pou adekwa pou ase. Me toutfwa avek *advice* sa konsiltan i kapab dir nou ki kantite konbyen pou arive pou nou fer tel travay e nou kapab re aziste.

E si sa larzan pa adekwa ankor, nou bann kontak ki nou annan *Green Climate Fund* nou kapab vin avek en proze kot nou kapab ganny bann finansman adekwa pou finans sa proze. Mersi Mr Chair.

### **MR SPEAKER**

Wi Onorab si oule leklersisman.

**HON EGBERT AGLAE**

Yes mersi Minis e Mr Agricole osi. Petet Mr Agricole zis annou sey pouse pou nou kapab fer li arive osito posib, pou rezourd sa problemn.

Minis mon ti a kontan zis demann anba *ETF Environmental Trust Fund*, eski pou annan larzan sirtou pou sa bann zafer pye dibwa danzere ki trouve lo lakot e obor semen sirtou dan rezyon parey Morne Blanc, Sans Soucis ki souvandfwa i tonbe. Eski nou pou annan en larzan pou ganny mete anba la pou kapab *tackle* sa sityasyon? Mersi.

**MR SPEAKER**

Wi Minis.

**MINISTER FLAVIEN JOUBERT**

Mersi Onorab pou sa kestyon. Mersi Chair. Eski i annan larzan anba *ETF* pou koup bann pye dibwa danzere? Dapre resers ki mon mon'n fer nou pa bezwen al anba *ETF* me i annan larzan anba Bidze Gouvernman, me nou bezwen pran sa bann larzan anba Bidze Gouvernman e met li dan son landrwa korek pou nou kapab fer sa travay.

An 2019 mon rapel nou ti fer en lapel pou bann kotasyon

e apre ti annan bann diferan keksoz ki ti ganny arive, apre nou ti dir napa larzan. Me apre nou realize poudir i annan en pe larzan ki nou kapab met ansanm.

Alor mon krwar dan Bidze Gouvernman anba bann Bidze par egzanp pou Lanvironnman e osi pou Gouvernman Lokal i annan bann morso larzan ki nou kapab met ansanm.

Me nou kapab adres en bon pe sa bann size ki annan pou fer avek pye dibwa. Parey mon'n dir pli boner i annan in annan en pe konfizyon osi lo lekel ki sipoze pe fer? Eski se *Land Transport* ki sipoze pe fer pou sekirite semen, ouswa eski se Lanvironnman ki sipoze pe fer li?

Ouswa eski se distrik ki sipoze pe fer li ouswa menm dan serten ka mon bezwen al demann ou si *DRDM*, i sipoze pe fer li akoz i en danze?

Alor nou bezwen tonm dakor enn fwa pou tou. I annan en larzan pou koup pye dibwa danzere lo semen, donn en Lazans ouswa en Lotorite pou fer li e asire ki i ganny fer.

Omwen enn oubyen de fwa par lannen. So pa bezwen nou fer letour avek sa problemn. Akoz i annan posibilite pou li ganny fer. Mersi.

**MR SPEAKER**

Mersi. Nou pou pran en *break*. Me selman nou a rakoursi li en pti gin nou a retournen 4er. Nou a fini avek sa antite apre nou annan en lot antite pou kontinyen avek pou ozordi. Mersi nou a pran en poz la.

**(BREAK)**

**DEPARTMENT OF CLIMATE  
CHANGE & ENVIRONMENT  
(Cont)**

**MR SPEAKER**

Onorab Monthy.

**HON PHILIP MONTHY**

Mersi Mr Chair. Bonn apre midi Minis avek ou delegasyon. Mr Chair zis *bear* ek mwan mon pa anvi repetitif me mon pou bezwen repas lo serten pwen ki'n ganny leve, akoz mon pa pou fer zistis mon bann zabitan Cascade si mon pa fer li.

En pe lo menm laliny ki Onorab Audrey Vidot ti leve lo *enforcement, ok*? Mon ti anvi zis konnen parey i annan bann propriyete prive ki'n ganny lese abandonnen dan bann landrwa rezidansyel, *ok* ki annan bann *overgrown vegetation* lo la e ki vin bann nwizans pou vwazen akote.

Donk ki bann prosedir *enforcement* ki zot pe prevwar? Eski zot donn en *fix*

*penalty* oubyen bann *case* i bezwen ganny anmennen Ankour parey mon'n ganny tann dir?

Dezyenm pwen mon ti anvi konnen Petit Paris dan sa *channel* mon krwar PS Agricole ou, ou okouran vizavi kot lafanmir Gappy la an desandan, dernyen fwa mon krwar en bonpe letan pase mon krwar ti ganny *disilt* sa *channel*.

E i en problemm la mon'n ganny bokou konplent lo sa landrwa la. So mon ti anvi konnen si i dan zot proze pou *disilt* sa, sa *channel*? Akoz i pe afekte i annan en madanm i reste la mon ti al vizit li lot fwa i ganny afekte Madanm Assary e lafanmir Gappy la dan sa rezyon e i en problemm osi pou zot.

E nou'n koz lo *rock armoring* e mon krwar osi i annan en relasyon pou fer, lefe ki sa landrwa pa'n ganny *rock armoring* pa'n ganny fer lo sa bout *highway ok*?

Donk mon ti a sizere ki ler zot rod finansman pou finans bann proze *rock armoring* ki sa bout semen *highway* Petit Paris, kot mon pe koze PS Agricole i konnen, mon ti a sizere ki sa osi i ganny pran an konsiderasyon.

E finalman mon annan en problemm lo sa bout semen an alan Talbot *ok*? Mon koz lo la lot fwa dan Lasanble kot

enn de zabitan ki'n vin devan ki'n anvi konble serten bout serten parti sa landrwa, pou serten proze selon zot *Planning in ok*, me retar in vin avek Lanvironnman akoz serten pye manglier, manglier blan ki annan dan sa landrwa.

E zot in dir osi ki i annan zwazo ki frekant sa landrwa i, i proteze. Mon war i en pe drol akoz Erport i pa tro lwen donk mon pa tro war mannyer i annan proteksyon zwazo zis detrwa 100enn met avek Erport ki pa ale *ok* donk si zot kapab donn mon zot pwennvi lo la ? Mersi.

**MR SPEAKER**

Mersi Onorab. Minis *yes*.

**MINISTER FLAVIEN JOUBERT**

Mersi Mr Chair. Mersi Onorab pou ou kestyon ou kat pwen. *Enforcement* avek *private property* mon ava pas avek PS Decomarmond e osi sa katriyenm pwen limero 1 avek pwen limero 4 ki konsern *Planning Approval Land Reclamation*.

E apre sa de lezot pwen Petit Paris *channel* apre *rock armoring highway* mon ava pas avek PS Agricole. Mersi.

**MR SPEAKER**

PS Decomarmond wi.

**PS ALAIN DECOMARMOND**

Mersi Mr Chair. Zis konsernan *overgrown vegetation* lo bann propriyete kot propriyete i bwaze an labandon ensidswit. *Main Lalwa* ki *deal* avek sa i *Public Health Act*, me selman anba lanvironnman vi ki souvandfwa avek sa bann propriyete abandonnen ki annan en kantite keksoz ki'n grandi lo la, i anmenn salte ensidswit.

Nou osi nou, nou met en lanmen ladan an pratik nou, nou travay ansanm avek *Public Health Authority*, me selman sa ki pou mord plis se lo kote *Public Health Authority* akoz anba zot Lalwa zot *deal* avek sa.

Kot i annan kot sa propriyeter i la i pou pli *straight forward* byensir pou fer li *comply*, me souvan ou annan bann propriyete ki dimoun i deor. E la kot i fer li en pti pe pli konplike kot ou kapab fer *enforcement* ou bezwen sey gete si i annan fanmir isi ki kapab kontakte li.

I annan menm bann ka kot nou ganny propriyeter ki dan prizon kot i pa posib pou *even* fer serten aksyon lo la.

Selman nou, nou travay lo la ansanm avek *Public Health Authority* anba nou *programme, programme 4*. Zis mon anvi konn nou pe koz lo *enforcement* par kwensidans Onorab.

Yer mon ti dan Cascade ou kapab dir en pti pe la kot bazar Cascade mon'n war ki i annan en bon pe salte en. Mon okouran mon fer serten klarifikasyon avek *CEO SFA* ki'n dir mon i annan en Lasosyasyon Peser Cascade, mon krwar nou bezwen fer serten travay an term pou *provide* serten fasilite pou fer sir sa landrwa i reste prop.

Lo konsernan en pti pe, mon pou les bann lezot koleg azout lo la an relasyon avek devlopman Talbot, byensir tou bann aplikasyon i pas kot mon Departman.

Bann *case* dan lepase *main issue* avek sa *area* Talbot i annan pou fer avek kapasite sa lanmar la. Akoz i annan en debousman la, so i en keksoz ki sirtou lo kote lot departman la zot pran kont sa byen. Akoz i annan en kantite demann ki vini bokou fwa pou dimoun fer *backfilling* ensidswit.

Me *main issue* i annan pou fer avek pou redwir kapasite akoz i ganny debousman la. Wi i annan sa bann manglier, be selman *from* mon leksperyans *main* keksoz i annan pou fer avek kapasite e *retention capacity* sa lespas.

Akoz i en pti pe kwense la e i enportan ki nou kit sa landrwa manner i ete sansan nou pou annan bann *flooding* evantyelman si nou al redwir

son kapasite. Selman mon a les bann lezot koleg azout lo la. Mersi.

### **MR SPEAKER**

*PS* Agricole wi.

### **PS WILLS AGRICOLE**

Mersi Mr Chairman. Wi parey *PS* Decomarmond in fer resorti i vre ki sa bout la Talbot nou bezwen kanmenm dan lepase i annan bokou diskisyon ki'n ganny fer la, pou annan dimoun ki anvi fer serten devlopman.

E lo nou kote lefe ki i annan bann manglier ki la i, i vremen i tenir sa landrwa anpes si i annan gro lapli annan en inondasyon ki kapab agrav sityasyon. E se pou kwa ki toutfwa nou annan bann konsiltasyon ki nou bezwen fer avek Lotorite Distrik dan sa ka *MNA* Cascade.

Nou bezwen petet asize koz en pe war en pe kwa ki bann zabitan dan sa rezyon i anvizaze fer, petet nou a kapab vin lo en konpromi.

E, e kontrent kot i konsern wi *disilting* Petit Paris avek *rock armoring*, wi mon dakor avek ou ki sa *disilting* en bonpe letan in ganny fer. E mon konn sa lafanmir ki ou'n mansyonnen ki parfwa i demande ki sa i ganny refer. *I mean* fer ankor enn fwa akoz

*disilting* ou i en keksoz ki i kontinyel.

Ou fer en serten apre ou bezwen vin *monitor* vin regarde ki mannyer keksoz i été, dan en fason ki sa *channel* i *free flow* ek bann bato ki pas la.

E lo kote finansman pou fer sa travay mon'n regard dan Bidze nou annan anba '*repairs and maintenance*' kot '*other repairs and maintenance*' i annan en *budget item* kot i annan R2.7milyon e se sa bann travay *disilting* ki nou anvizaze fer dan bann diferan distrik ki nou annan en lalis deza, selman Petit Paris pa ti lo la.

Me ler nou'n regard nou'n total fer total sa bann diferan distrik ki nou pe, pe fer sa travay pou annan en, en larzan pou reste e nou ava regard *costing* konbyen pou arive e la nou a kapab fer en travay dan sa *area*.

Selman mon pa kapab dir ou 100poursan nou pe al fer, me selman i *either* si nou pa li sa lannen nou bezwen fer li lannen prosenn. Selman toutfwa parey mon dir sa, sa *leftovers* ki pou annan, i annan en posibilite nou kapab fer sa travay.

Me kot i konsern *rock armoring* ankor la kote finansman, i vre si ou pou fer *disilting* osi ou bezwen fer sir ki sa landrwa i ganny proteze. E la kot nou konnen *rock*

*armoring* i en travay ki kout en pe larzan, pou le moman nou napa sa finansman.

Me i pa anpes nou war bann lezot *avenues* finansman, *be it* enternasyonal kot nou kapab *chip in* negosye pou nou kapab fer sa travay a lavenir. Mersi Mr Chairman.

### **MR SPEAKER**

Mersi. Wi Onorab.

### **HON PHILIP MONTHY**

Mr Speaker de pti klarifikasyon rapidman. Tou dabor konsernan kot bazar Cascade, anefe mon'n ganny kontakte bomaten par CEO SFA e mon'n anvoy li en *email* problem se ki napa en fasilite *bin* la kot bazar Cascade.

E mwan ler mon'n ansennyen LWMA i dir mwan zot in tire aköz bann peser ti pe zet trip pwason ladan. Ok donk se sa problem. E mon an diskisyon avek LWMA pou vin fer en vizit dan distrik pou sey regete si i pa kapab fer en fasilite *bin* la, e nou a konsyansiz bann peser pou ki zot arete avek sa pratik. E mon okouran poudir sa i en problem e mon pe sey *deal* avek.

E lo kote sa bout Talbot sa detrwa dimoun ki pe demande pou konble i pa pe konble ziska deryer dan sa

*channel* i pou ariv menm pa lanmwatye sa bout.

Donk parey *PS* in sizere mon ti a kontan ki nou zwenn nou asize nou diskite pou gete ki mannyer nou kapab bouz devan. Akoz i annan detrwa zot ki en bon pe letan zot in fer aplikasyon e zot en pe fristre *ok*. Mersi.

### **MR SPEAKER**

Mersi. Zot pa bezwen adrese zot in note. Minis.

### **MINISTER FLAVIEN JOUBERT**

*Thank you* Mr Chair. Mon pou zis fer en pti komanter lo size *bin* kot bazar Cascade. Mon krwar i en konversasyon ki nou kapab gannyen en pti pe plis letan *LWMA* i vin isi dan Lasanble.

Akoz lakantite fasilite *bin* landrwa kot i ganny pozisyonnen, ek osi bann difikilte ki nou gannyen parfwa avek bann dimoun ki pe servi sa bann *bin* mon krwar i en problem mazer.

E fodre ki tou distrik, tou Manm Lasanble Nasyonal dan distrik, tou *DAs* nou zwenn ansanm pou nou kapab adres sa sityasyon, akoz i annan en kantite keksoz ki nou bezwen fer pou asire ki i annan ase fasilite dan distrik.

Nou ti fer en evalyasyon an 2019 e nou ti war ki lanmwatye distrik dan Sesel

zot fasilite *bin* ki zot annan pa sifizan. Me i annan en kantite problem petet letan *LWMA* i vin dan Lasanble nou a kapab fer en diskisyon pli detaye lo la. Mersi Chair Mr Chairman.

### **MR SPEAKER**

Mersi. Onorab Ghislain.

### **HON CHANTAL GHISLAIN**

Mersi Mr Speaker. Mr Chair. Bonn apre midi Minis. Bonn apre midi *PS* e tou delegasyon. E bonn apre midi tou dimoun. Mr Chair avek sa kantite danze e menas ki lerozyon lakot linondasyon osi varyasyon dan nivo lanmer, bann rad mare ki pe vin pli souvan.

Sesel konman sa Pti Leta Zil pe fer fas avek en kantite sa bann defi ki annan pou fer avek sanzman klima. *And* apre midi ou'n osi koz lo sa resers ki ti ganny fer avek *ADB* ansanm avek bann eksper lokal, e zot ti annan sa premye plan lamenzman lakot ki ti pou 5an 2019 a 2024, sa plan in fini ganny byen detaye ladan.

E ou pe dir ki i annan ankor resers ki pe ganny fer, sirtou lo bann landrwa ki ladan ki ti annan bann landrwa dirzans ki bezwen fer entervansyon.

Eski ou kapab dir nou *PS*, ki bann kalite lentervansyon ki zot in kapab



war, ki zot bezwen annan sa bann entervansyon imedyà dan sa plan ki'n byen detaye dan sa plan?

E nou war en pe lo bann, bann lakot parey Anse Kerlan Praslin e osi lo kote Amitie Praslin. Apre Minis, PS mon pe regard anba, anba *non-produced assets*, i annan trwa konponan ladan ki mon war i *interlinked* ek kanmarad ki annan pou fer osi avek sa zafer sanzman klima.

E mon pa war i annan larzan anba la eski ou kapab dir nou pou kwa? Par egzansp i annan *rock armoring* Anse Kerlan Praslin i annan osi sa *water flow* pou *remove* sa *bottleneck* ki annan pou fer avek *outlet* Au Cap e osi Anse Kerlan.

Apre mon war, mon war konstriksyon sa *major box culvert* dan *lower* St Joseph Praslin. Eski ou kapab dir nou pou kwa i napa larzan ladan parske letan nou pe get sa trwa, sa trwa konponan *interlinked* ek kanmarad, akòz i pou fer sir ki i annan sa proteksyon sa lakot.

Akòz i annan ler i pou protez, i pou protez sa ekosistèm e osi sa resif ki en kantite peser Praslin i depan lo la pou zot sirviv? Mersi PS.

### **MR SPEAKER**

Mersi Onorab.

### **MINISTER FLAVIEN JOUBERT**

Mersi Mr Chair. E mersi Onorab. Mon a pas laparol avek PS Agricole. Mersi.

### **MR SPEAKER**

Mersi. PS.

### **PS WILLS AGRICOLE**

Mersi Mr Chair. Mersi Onorab pou ou bann kestyon. Wi sa *Coastal Management Plan* ki ou pe koz lo la *World Bank* in ed Sesel pou antreprann 2019 ziska 2024. Dan sa plan i annan *World Bank* i vin idantifye 18 *priority site*. E sa 18 *priority site* son kou, son *cost* i ariv \$15milyon Ameriken.

E lefe ki *World Bank* in *come back* kot nou, i dir nou ti a byen avan ler okenn entervansyon byensir i pe rod finansman avan selman bann entervansyon i ganny fer zot in vin ek nou pou fer en letid lo sa 5 lezot *site* ki mon'n mansyonnen pli boner.

Setadir lo Mahe nou annan Beau Vallon, Au Cap. Apre Praslin nou annan Cote D'or, Grand Anse, Amitie pou al Anse Kerlan. E la ler nou regarde se ki, se zis finansman ki nou pe espere e dan Bidze nou lo *coastal management* nou ganny anviron R6.2milyon.

E dan sa 6.2milyon deza i annan 4 anviron ki pe al lo

proze Anse Kerlan. E sa lezot trwa ki ou'n mansyonnen la, ki ou dir ti ava swete ki nou, nou fer e nou pe anvizaze fer li an lannen 2022 i pa sa lannen ki nou ladan.

E ankor se kontrent bidzeter ki fer nou pa kapab enplimant sa bann proze ki parey ou pe dir sanzman klima i la ek nou e *coastal erosion* i toulezour. E nivo lanmer pe ogmante pou le moman in ariv 7.8 a 9.8 milimet e avan sa i ti pli ba ti anviron 4 a 6.

I fer ki bann Pti Leta Zil nou bezwen konsyan ki en tel fenomenn pe arive, e koz ek sa bann pei devlope ki istorikman ki zot ki'n koz sanzman klima. Demann zot bann finansman adekwa ki nou kapab protez sa bann *area* ki nou mansyonnen, e pou nou *survival*.

*Otherwise* pti a pti nivo lanmer pou manz, manz nou bann lakot e bann enfrastriktir ki pou ganny trouve lo lakot, bezwen ganny deplase pli anndan e la pou annan en gro fardo lo Gouvernman byensir. Ouswa nou bezwen rod bann lasistans an deor.

E se pou kwa ki nou bann negosyasyon sanzman klima nou koz vreman for lo sa size. E lo kote finansman malerezman bann pei devlope sipoze met \$100bilyon lannen

2020, ki nou pa'n war, nou war zis 9.8bilyon.

Zis mazine kantite zot sipoze mete, akoz zot ki'n kre sa sanzman klima ki nou pe koz lo la. Me toutfwa konman enn bann negosyater sanzman klima nou, nou pe kontinyen koze lo la, ki finansman pou *survival* bann Pti Leta Zil pa adekwa.

E prosennman mon krwar Minis bomaten in fer dan son lentrodiksyon in koz lo *COP26* ki pe al fer *Glascow* an Novanm. Nou pe al lager lebra kase pou nou ganny finansman pou Sesel. Mersi bokou.

#### **MR SPEAKER**

Mersi. Onorab Woodcock.

#### **HON WAVEL WOODCOCK**

Mersi Mr Speaker. Mr Speaker mon kontan ki Grand Anse Praslin in ganny en nouvo *MNA* Onorab Chantal Ghislain, akoz i fer de *head* la ki pe demann kestyon lo Grand Anse Praslin.

*(laughter)*

#### **HON WAVEL WOODCOCK**

Mon kestyon i annan pou fer avek sa *Coastal Management Plan* mon konnen i annan en bon pe lafanfar ki'n ganny fer dan lepase lo sa size *Coastal Management Plan*.

Mr Speaker sa bann kestyon ki mon pe al demande la, i pa fer premye fwa ki mon demande dan bann deba Bidze. Annefe Minis avan ki ti responsab pou sa portfolyo ozordi dan Lasanble i lo lot kote latap, alor mon a redemann mon kestyon ankor ki mon'n demande dan lepase.

Enn ; kot i konsern lerozyon lakot Mr Speaker *for many years* nou'n tann nonm lo en *Coastal Management Plan but the issue* i toultan vin kot i konsern lenplimantasyon sa bann proze dan sa *management plan*.

Mon kontan ki ozordi nou annan en Minis ki proaktiv, ki'n zwenn avek mwan, nou'n diskite lo sa size ki malerezman dan lepase Minis ki ti la avan ti pe zwenn avek kandida US oule olye zwenn avek MNA dan son distrik.

E ler mon zwenn Minis ozordi mon kontan ler mon get dan sa Bidze, mon war detrwa proze ki pou benefisyè zabitan nou distrik Grand Anse Praslin. Proze limero 1 Anse Kerlan Amitie *Coastal 2 and 3* pou en sonm R4milyon.

Dezyenmman Anse Kerlan Amitie *project phase 1* R197mil. *Rock armoring* Anse Kerlan Praslin R1.2milyon. E sa i montre poudir langazman Gouvernman dizour *deal* enn fwa pou tou avek sa *issue*.

An regardan sa proze an regardan sa R4milyon ki mon war dan sa Bidze mon anvi demann avek Minis, si i pou osi enkli pou agrandi sa *rock armoring* ?

Akoz nou ti diskite PS ou ti la ler nou ti koz lo sa size. Kot sa *rock armoring* nou ti fer Amitie, kot dan lepase ansyen *warehouse STC* ti grennen aköz lakot semen ti grennen. Me sa *rock armoring* kot i ete la, nou ti annan diskisyon pou nou bouz li, pou nou agrandi li pou ziska finisyon Roche Corbizeau, eski zot pou fer provizyon pou fer sa amenn sa *rock armoring* ziska, ziska Roche Corbizeau?

E dezyenmman mon lot kestyon i kot i konsern *issue* drenaz ou konnen pou Praslin, La Digue sa *issue* i pou bokou lannen menm Onorab Sophola ler i ti la Onorab Uranie lo kote La Digue, lo kote Praslin osi nou'n annan plizyer MNA ki la e toultan kot lo en *comprehensive plan* - plan drenaz pou zil pros. Ki pa'n ganny fer, eski i annan, pou annan en plan konpreansiv pou *deal* avek sa problemn drenaz en fwa pou tou?

Sirtou parey dan rezyon Roche Corbizeau kot diskisyon avek CAMS dan lepase, ti pou annan en proze konpreansiv laba osi ki ziska prezan pa ankor ganny fer? Eski sa i

bann keksoz ki zot pe konsidere?

Finalman i annan sa *issue* Mr Speaker, kot i konsern bann zafer rigol ki ler gro lapli i tonbe bann lanmar rigol i deborde i antre dan lakaz dimoun.

Me le problem se ki i annan bokou *duplication*. Ou war plizyer antite ou war *LWMA* i fer en bout, *SLTA* i fer en bout, Gouvernman Lokal i fer en bout, Lanvironnman atraver *CAMS* i fer en bout.

Prezan ler zot mont lo lipye kanmarad, eski konmsi zot pe rod en fason pou *synergise* sa ouswa i pou annan en Departman ki pou *take up* sa bann zafer drenaz?

Apré finalman Mr Speaker vi ki nou pe koz lo lanvironnman, mon ti pe espekte kekfwa en Manm ti pou koz lo sa size lo sa trwa reken ki ti met anpandan, e mon krwar en Manm i eksper lo la, me selman sa mon krwar i en lot ler mon a koz lo la ler sa lot *head* i vini. Mersi bokou.

### **MR SPEAKER**

Mersi. Wi *panel*.

### **MINISTER FLAVIEN JOUBERT**

Mersi Mr Chairman. E mersi Onorab pou ou bann pwen e ou bann kestyon. Mon krwar mon pou pas laparol pou

*coastal management plan* enplimantasyon e osi *rock armoring* Amitie ziska Roche Corbizeau avek *PS Agricole*.

Me avan sa mon pou reponn sa dernyen pwen ki Onorab in fer kot i konsern *maintenance of drain*. Mon krwar mon'n koz lo la pli boner.

E nou rekonnet poudir i annan en kantite diplikasyon, pou dan plizyer size ki annan pou fer avek nou bann *drain*, nou bann semen, nou bann louvertir lanmar. E parey mon'n eksplike mon an diskisyon avek lezot Lazans ki sipoze osi annan en bout responsabilite dan sa laliny, pou nou definitivman dan enn fwa pou tou, annan en sel pozisyon dan tousala.

E osi konnen lekel morso Bidze ki sipoze adres lekel, lekel travay. En fason ki nou napa sa bann problem.

E letan problem i arive osi ou konman *MNA* ou kapab konnen lekel ki ou pou *call* pou vin rezourd ou problem. olye ki ou *call* kat diferan landrwa e personn pa kapab vini.

So mon ava pas laparol avek *PS Agricole* e osi Mr *DG Pillay* pou sa size *comprehensive plan* pou drenaz pou bann *Inner Islands*. Mersi.

### **MR SPEAKER**

PS Agricole.

**PS WILLS AGRICOLE**

Mersi Mr Chairman. Mersi Onorab pou ou bann kestyon. Wi konsernan sa proze ki nou, nou ti zwenn pou nou ti diskite pou Amitie pou *extend* li ziska Roche Corbizeau.

Parey ou konnen dan Bidze i annan sa sonm ki dan Bidze e travay ki nou bezwen fer *come up with a design* e son *costing*, nou a war ki zistans pou i ava anmenn nou.

E selman nou ti pe mazine sa zistans kot nou'n arete la ziska kot Roche Corbizeau i environ apepre en 400 a 500 met son zistans.

E nou konn tre byen ki *rock armoring* sa kalite *rock armoring* ki nou'n fer la i koute. Aprezan nou pe mazin si nou ariv kot nou, nou lobzektif savedir lo bout, mon krwar se sa finansman ki nou annan la pou le moman, i pa pou ase.

Sa leksperyans ki montre la. Me toutfwa parey mon dir nou ava fer sa *costing*, nou a *come up with the design*, epi nou ava regarde ek sa finansman kote nou kapab arive. Me si non nou pou bezwen met li en lot faz pou lannen prosenn, *or unless* ki nou ganny en finansman avek en, en *donner international* ki nou a fini sa proze.

Me lo kote sa, sa plan li menm lo *Coastal Management Plan* ki ou dir tou lazourmen nou'n koz lo la parey mon'n fer resorti pli boner nou annan 18 *site* priyorite e 18 *site* priyorite i ariv \$15milyon Ameriken.

E pou le moman nou pe tap laport ek diferan *partners international*, pou nou kapab ganny sa finansman pou nou kapab enplimant sa bann diferan proze ki trouve dan sa plan.

Me i en travay ki, ki pa tro fasil pou le moman dan sa sityasyon ekonomik ki lemonn pe trouv li ladan. Be nou, nou pa pe les sa osi fatig nou. Nou pe anvoy bann diferan *concept* avek bann diferan lorganizasyon enternasyonal.

Par egzantp *Green Climate Fund* kot nou kapab petet ganny en detrwa en finansman pou detrwa sa bann sit ki vreman nou war i merit ganny entervenir.

Akoz lefe ki sanzman klima parey mon'n dir pli boner *coastal erosion* i pe kontinyelman sanz bann lakot sirtou lo Praslin. Mersi bokou Mr.

**MR SPEAKER**

Ou bezwen klarifikasyon Onorab?

**HON WAVEL WOODCOCK**

En pti klarifikasyon. Wi zis pou mon demann avek Minis

*next time* zot fer en pti vizit kot sa *site*, envit mwan e osi si zot kapab osi envit *CC Member* pou Grand Anse Praslin Onorab Ghislain osi silvouple. Mersi bokou.

**MR SPEAKER**

Mersi. Onorab Cosgrow mon war ou pe lev ou lanmen e mon eski - ? Esper mon silvouple ekout mwan. Mon konnen i akoz Onorab Woodcock in fer referans avek Minis avan ki ti ou.

Me selman ou karyer avan napa okenn relevans avek sa deba ki nou pe fer.

*(Interruption)*

**MR SPEAKER**

Nou pe nou a kontinyen avek sa Bidze. Non. Napa nanryen pou klarifye. Napa nanryen pou klarifye.

Onorab non nou pou kontinyen. Onorab Lemiel.

**HON SYLVANNE LEMIEL**

Mersi Mr Chair. Bonn apre midi tou dimoun.

**MR SPEAKER**

Silvouple nou a les sa Manm koze silvouple wi.

**HON SYLVANNE LEMIEL**

Premyerman enn, mon pou sezi sa lokazyon pou mon remersye bann *staff* kot Lanvironnman pandan pou

bann travay ki nou'n fer depi lannen pase kot *Climate Change* osi enkli kot CAMS nou pa'n fer mal travay pou distrik Anse Royale. E sa bann travay i plizoumwèn pe kontinyen.

Parkont Minis ler ou'n dan sa Minister mon krwar ou'n konpran ou'n konn byen nou distrik, Anse Royale i enn parmi bann distrik, ki sak fwa lapli i tonbe nou noye nou dir *ok?* Sirtou lo kote bor lanmer.

Nou annan sa problemn kot nou annan Pon Jumeau kot lanmar ki sorti larivyer i sorti Mont Plaisir, i desann i al dan larivyer Pon Jumeau. E sa i afekte bann dimoun ki dan Anse Royale santral sirtou.

Mon le konnen dan sa Bidze sa lannen, si i annan - akoz dan lepase ti annan bann vizit ki'n ganny fer. Mon ti a kontan konnen si dan zot Bidze i annan plan pou zot kapab egzekt serten proze, sirtou dan Anse Royale santral?

Kot delo i reste *stagnant* e i annan *day care* la *Little Bird Day Care* avek en bon pe lakaz toultour, kot zot ki plizoumwèn ganny afekte. Zot ganny afekte avek delo ki monte ler lanmer i monte i refoul anndan e sa delo apre i reste *stagnant* pou apepre 1 semenn 2 semenn, sak fwa lanmer i monte e bokou

dimoun in ganny *dengue* dan sa landrwa.

E ler msye – ( *what's his name* mon'n bliy son non la) Mr Labrosse kot CAMS ti monte zot ti vini zot in vizite, i annan en letid ki'n ganny fer la e i sipoze annan en proze ki ti'n met ater pou gete si ti kapab antreprann anba sa *EBA Fund*.

Mon pa konnen si i pou tonm anba sa 20mil, R20.1milyon ki reste aköz nou'n benefisyè avèk proze anba *EBA* nou. Me mon pa konnen si dan sa larzan ki reste aköz nou ti'n ganny dir sa osi pou ganny antreprann par *EBA*, so mon pa konnen si zot annan sa lenformasyon ki zot kapab donn nou ?

Si nou pou kapab war en amelyorasyon la pou zabitan ki dan sa landrwa ki ler lapli i tonbe, lanmer i monte nou pa kontinyen ganny sa delo *stagnant* ki reste dan zot lakour pou en kantite letan.

Sweet Escott osi i en problemm kot i annan en travay ki *DA* in fer me parkont kot mon santi ki i reste serten travay ki reste pou fer. Travay in ganny fer deryer laferm, me parkont i pa'n ale ziska bor lanmer kot pou debous sa lanmar antye e i fer ki delo i refoule *most of the time*.

E bann dimoun Sweet Escott osi zot annan en problemm avèk lanmar ki reste

*stagnant* e laba osi nou annan en problemm dimoun ki'n ganny *dengue*. Aköz napa sa *flow*, lanmar i demann ganny *desilt*.

Dan sa Bidze, mon ti a konnen osi kote e si i annan okenn larzan ki'n ganny bidzete pou kapab fer en desilting or en laranzman dan sa lanmar sorti deryer sa laferm pou anmennen ziska kot lekol Sweet Escott? I fer 2 landrwa la.

Aprè mon vwar en Bidze R352mil *bridge* banbou nou dir mersi pou sa proze aköz ti en gro problemm pou nou. Mon ti a kontan konnen ki travay ki reste pou fini fer avèk sa R352mil ki zot in prozèkte pou sa lannen? R56mil pou sa *Anse Royale Beach park* li osi nou dir mersi pou sa proze ki'n komanse.

Mon ti a kontan konnen kwa ki reste pou fini fer dan sa 2 landrwa ? So Mersi Mr Speaker.

### **MR SPEAKER**

Mersi Onorab. Wi Minis.

### **MINISTER FLAVIEN JOUBERT**

Mersi Mr Chair. Mersi Onorab pou ou bann kestyon. Mon a pas laparol avèk *PS Agricole* pou reponn. Me lo sa bann pti bout larzan ki reste pou bann proze parey Banbou avèk *Anse Royale Beach park*,

sa ki mwan mon konnen se ki i bann *retentions* sa.

I bann morso ki reste pou ganny peye. I pa travay ki reste pou ganny fer i plito larzan ki sipoze ganny donnen avek sa kontrakter, apre ki sa peryod ki nou sipoze garde apre proze i ekspire *then* sa bann larzan i ganny transfer avek zot. Mersi.

### **MR SPEAKER**

PS Agricole.

### **PS WILL AGRICOLE**

Yes mersi Mr Chair. Wi konsernan *desilting*, nou annan nou lalis *desilting* pou sa lannen, nou annan en proze Sweet Escott, ki pou *desilt* anviron 75met. E sa travay kot Madanm Albert la dan sa *area* la. Mon pa konnen si ou kapab visualise. Petet nou a kapab eksplik ou en pe pli tar, me solman i annan en larzan ki nou'n gannyen pou *desilting* pou Sweet Escott.

Me kot i konsern *EBA* ki ou ti ava apresye si ankor bann travay ki petet pou amelyor sityasyon re-kontinyen. Wi i annan R20milyon dan Bidze pou *EBA*, me ou konnen bann larzan ler ou gannyen anba diferan *donors* zot donn ou en *project document*.

Ou'n fini dir kwa ki pou pe al fer aprezan pou ou kapab

sanz ou bann diferan *scope*, ou bann diferan lentansyon ki ou annan ladan, bann diferan konponan ou bezwen ankor al kot zot, al demann zot be la mon anvi sanze.

Me lefe ki sa proze i sipoze fini Oktob 2021 sa lannen nou ki nou'n fer akoz byensir avek *COVID*, nou'n ekri atraver *UNDP* pou ou kot *Adaptation Fund* pou demann en *extension* – pou demann en *extension* pou ki sa proze i kapab ale ziska Avril 2021.

Let in fini ale e nou pe espere e si sa i leka – 2022 wi, si nou ganny laprouvasyon e sak sa bann proze nou annan sa ki nou appel sa en *Steering Committee* i pe ganny Chair par en *national project director* e dan sa ka se mwan pou sa proze la.

Nou, nou kapab regarde e fer vizit. *Access* si nou merit modifye sa *project document* ankor parey mon dir, demann permisyon la nou pa fer sa travay. Me si non malerezman nou pa pou kapab fer li e nou bezwen esper *the next budget* pou nou kapab met li ladan. Mersi Mr Chair.

### **MR SPEAKER**

Wi Onorab, ou annan en pwen?

### **HON SILVANNE LEMIEL**

Mersi Mr Chair. Mon annan en prepozisyon akoz mon santi ki



pou en bon pe letan konmsi sa problemm i la. Mwan mon ti a sizere ki nou fer en *joint visit* dan distrik aköz zot in nonm Sweet Escott i pa li sa landrwa kot zot pe nonmen. Si zot in nonm mwan kot madanm Cillia mon konnen kote egzaktaman i pli anler.

Nou pe koz bout an desandan pas deryer laplenn ki al kot leköl sa i en lot zafer. So mwan mon pou propoze ki nou organiz en vizit ki nou al get depi Anse Royale santral, nou al get Sweet Escott ziska kot leköl apre nou ava pran en desizyon. Mersi.

### **MR SPEAKER**

Mersi. Mon krwar kekfwa panel i a zis note sa ? Onorab Michel Roucou.

### **HON MICHEL ROUCOU**

Bonn apre midi *panel*. *Welcome*. Bonn apre midi tou dimoun dan lakour. Minis mon oule zis *remind* ou an pasan pou pa bliye pou met nou osi pou nou al fer sa pti vizit Ile aux Cerfs, en?

Mon premye kestyon ki mon ti anvi demande se, eski tou distrik i tonm anba sa tender pou netway larivyèr? Sa mon premye kestyon.

Mon 2em kestyon i eski tou larivyèr dan Mont Fleuri i pe ganny netwaye ? Aköz Mont Fleuri i annan detrwa larivyèr; i annan larivyèr Rochon ki

komans anler kot danm i desann, i vin fini kot Kordgard.

Apre i annan en larivyèr ki tonm Hermitage, apre i annan en lot ankor ki pas bor *Pentecostal* laba.

Mon 3em kestyon en pti pe anba zot *challenge* ki zot pe gannyen. Nou war poudir zot pe ganny en pti pe problemm avek sa zafer '*illegal dumping*' be selman i en pti pe konfize lo la, aköz ennler nou pa konnen vremen lekel sa Lazans ki pou *deal* ek sa, eski i LWMA ki *deal* avek oubyen eski *Enforcement*?

*E Enforcement* li menm li eski i annan sa Lotorite, sa pouvwar pou li kapab *investigate* sa *illegal dumping*? Mersi Mr Speaker.

### **MR SPEAKER**

Mersi Onorab. Minis wi?

### **MINISTER**

### **FLAVIEN**

### **JOUBERT**

Mersi Onorab pou ou bann pwen. Byensir nou *take note* ki nou ti'n deza fer en konversasyon konsernan lerozyon Ile Aux Cerfs, me nou pa'n ganny sans fer li. Me mon a met dan mon program e nou ava kapab fer sa vizit pou nou al war sa problemm Ile Aux Cerfs.

Mon a pas laparol avek DG Pillay ek PS Agricole pou *tender* pou netway larivyèr e

osi netwayman larivyer dan distrik Mont Fleuri e apre nou a koz lo *challenge illegal dumping* ansanm ek *PS Decomarmond*. Mersi.

**MR SPEAKER**

Wi DG?

**DG SELVAN PILLAY**

Mersi Mr Chair. Mersi Onorab pou ou kestyon. Pou distrik Mont Fleuri nou annan 2 lot bann kontra pou 2 kontrakter. E tou lede kontrakter pe fer netwayaz. Solman malerezman i annan – ler nou fini i netwaye i annan bann lenstans kot salte i ganny zete dan larivyer, dan bann *channel*.

E prezan ki fer ki ler ou pase ou war poudir be ou a krwar pa'n ganny netwaye. Me solman nou netwaye 2 fwa par mwan nou netwaye. E nou ava prezan et vizilan, pli vizilan pou nou fer sir ki ler nou fini netwaye nou ava *monitor*, fer *close monitoring* pou gete ki bann lenstans ki bann salte i ganny zete ladan.

E pou kapab gete si nou fodre nou aziste sa *scope*. Mersi.

**MR SPEAKER**

Mersi. Minis?

**MINISTER**  
**JOUBERT**

**FLAVIEN**

Ekskiz mwan Mr Chair, ti annan ankor en pti bout pou azoute. Mon krwar Mr Pillay mon pa konnen si ou'n eksplik bann *lots* dan Mont Fleuri. Mon a demann *PS Decomarmond* pou koz lo sa size *illegal dumping* silvouple.

**PS ALAIN DECOMARMOND**

Mersi Mr Chair. An relasyon avek *illegal dumping*; - *yes* Onorab anba *EDA* nou annan pouvwar e nou'n *deal* avek en bon pe ka kot sirtou bann kanmiyon ouswa bann *pickup* ensidswit ki al *dump* keksoz diferan landrwa dan kanpes, dan lanmar ensidswit.

En keksoz enteresan ki nou'n vwar plizyer fwa i ariv lenstans kot bokou fwa en dimoun pe fer netwayaz kot li swa i kapab dan en garaz ouswa en lakour pe fer netwayaz i lwen en *pickup* en *operator* i pey sa *operator*, pey li pou anmenn son bann salte lo *landfill* be selman ki arive?

Sa *operator* li i decide i pa al lo *landfill* li i esper fernwar i ale i al *dump* sa bann keksoz dan en landrwa, swa lo later konble swa dan en lanmar.

Bokou fwa nou'n pri zot. Ki fer nou pri zot se ki i annan bann staff anba program 4 i al *investigate* i al fouraye dan tou bann ki'n ganny zete. E souvandfwa nou pri sa bann *pickup operator* nou kapab trace back son kliyon pou dir

mon ti donn ou – pey ou larzan pou al zet dan *landfill* ensidswit.

So dan bann ka koumsa i annan plizyer fwa nou fer sa *pickup operator* netwaye apre i annan en *fine* osi ki i gannyen *out of court* ki i *settle*. Akoz plizyer fwa nou'n *deal* ek sa bann ka koumsa.

An menm tan an relasyon avek sa *issue* ki nou'n vwar sirtou dan landrwa santral se ki i pa ariv bokou fwa dan - ouswa dan later konble Perseverance ensidswit e ki nou pe fer ansanm avek Minister Later, ki responsab laplipar bann landrwa nou pe restrikte. –

I annan en kantite bann pti larantre partou, partou, so nou'n komans en legzersis lannen pase kot nou'n bloke, nou'n blok sa bann lespas kot i kapab rantre pou al zet sa bann keksoz.

So i annan en bann zefor ki nou pe fer an relasyon ek sa. I pou kontinyen sa lannen an relasyon avek redwir en pe sa bann landrwa kot keksoz i ganny zete. Detrwa lannen pase, Onorab osi nou ti annan loportinite la akoz i pa ankor arete, nou ti lans en sistenm en *reward* kot si i annan dimoun i annan lenformasyon kot i konnen lekel *pickup*, limero rezistrasyon ensidswit, *any tip-off* zot kapab donn nou, nou kapab organiz en pti

*reward* pou zot. Okenn lentelizans zot kapab donn nou.

Nou fer en lapel ki sa nou kapab ankor *still* konsidere lentelizans tanzib pou nou kaba *deal* avek bann ka koumsa. I posib parey mon pe dir e nou pe kontinyelman nou Seksyon *Environment Police* i pe kontinyelman *investigate* ler i annan bann *case*. Mersi.

### **MR SPEAKER**

Minis i annan en pwen ki pou ti pou adrese ankor oubyen in fini?

### **MINISTER FLAVIEN JOUBERT**

Mersi Mr Chair mon krwar in fini.

### **MR SPEAKER**

Wi ki leklersisman ou bezwen Onorab.

### **HON MICHEL ROUCOU**

Minis mon zis anvi dir an pasan se ki i annan bokou larivyer ankor Mont Fleuri ki pa pe ganny okipe. E mon ti a voudre pou dir ler zot fer bann tender, bann dimoun ki sorti dan sa rezyon ki sorti Roche Caiman, Mamelles, Mont Fleuri, Plaisance e zot ganny enkli dan sa rezyon. Pa rod dimoun an deor, akoz nou bann pti kontrakter i ganny kit ater.

Aprè mon dernyen leklersisman Minis mon ou le met devan ou, se ki Hermitage anler dan en larivyèr i annan en fanmir ki'n *call* mwan, poudir i annan bann pye dibwa ki'n ganny koupe dan bann letan eleksyon in ganny kite la lo larivyèr, e sa in vin en problem pou zot. Si ou kapab fer *investigate* pou kapab fer *deal* avek.

**MR SPEAKER**

Wi byen. Minis ou adrese ?

**MINISTER FLAVIEN JOUBERT**

*Yes Mr Chair* mon a zis reponn sa kestyon an brefman. Mersi Onorab pou ou pwen. Wi i annan plizyer larivyèr ki pa pe ganny kouver e tre probableman sa i osi le ka dan plizyer distrik.

Me mon krwar in ganny en diskisyon ki petet mon a demar sa diskisyon la konmela, se Minister Finans letan nou'n asize nou'n koz avek zot lo bann kontra ki nou pe depanse, larzan ki nou pe depanse lo kontra pou netwayaz, pou netway larivyèr pou netway lanmar, nou 'n ariv lo en pwen kot nou bezwen re pran en lepa deryer e reflesi en pe lo lafason ki nou pe fer li, frekans ki nou pe vin avek , lakantite kontra ki nou annan aktyelman dan nou lanmen.

Par egzanp kontra *Climate Change* lakantite kontra in sorti 29 mon krwar i al apepre 60. Alor nou bezwen pran en lepa deryer e fer en bon refleksyon lo sa bann kontra, e fer ki larzan ki nou annan i kapab nou kapab aktyelman kouver dan en fason normal tou sa bann lespas ki nou annan.

Sankwa nou pou war nou pe zis antre dan en sityasyon kot nou pou perdi kontrol e nou pou napa larzan pou peye.

Alor i en legzersis ki nou pe fer avek Minister Finans e sa i pou aplik osi pou kontra netwayaz kot nou pe limit landrwa ki netwaye, me nou bezwen ase lozik e rasyonnel dan lafason ki nou servi larzan pou netwayaz lanmar, larivyèr, semen, eksetera.

Alor i annan plizyer keksoz, plizyer diskisyon i kapab ganny fer lo la. I annan diskisyon ki nou'n fer en Minister Finans e dan rezyon Mont Fleuri osi mon krwar nou pou bezwen fer en refleksyon ki mannyer nou pou fer pou kouver bann pti larivyèr san ki nou bezwen al kree en nouvo kontra.

Akoz i pou vin deplizanpli difisil sirtou la. Minister Finans byensir in edik nou i napa lespas pou agrandi lo kote kontra. E sa i en

kontrent ki pe vini e nou bezwen travay lo la.

Me solman si i annan bann gran landrwa ki ou krwar i devret omwen par egzanp 1 fwa dan en mwan, ouswa tou le 3 mwan ganny latansyon, byensir nou bezwen ganny en konversasyon lo la met li dan program.

Bann pti kontrakter mon krwar i ganny tender par rezyon, alor si en dimoun ki dan sa rezyon - i pa par distrik me i par rezyon, normalman sa dimoun i merit kapab partisip dan *tendering* pou sa rezyon letan i fer.

Me fodre pa ki i annan en lot kontra deza ki apre i annan plizyer lezot kriter ki vini. Be solman nou bann kriter i vreman, vreman ouver e byen rar ki en dimoun pa ganny sa posibilite pou li partisipe.

So mon krwar sa bann dimoun fodre zot port latansyon byen letan bann lanons i ganny anonse i ganny anvoye, ki zot kapab partisip dan sa bann kontra e petet asire ki zot kaba ganny enn sa bann pti kontra. Mersi Mr Chair.

### **MR SPEAKER**

Mersi. Onorab Loze.

### **HON JOHAN LOZE**

Mersi Mr Speaker. Bonn apre midi tou dimoun. Mr Speaker si i annan en keksoz ki pasyonnn mwan dan politik sa se *youth leadership*. Mon'n deza dir mon krwar dan mon repons SONA ki se pa en dimoun 50an parey mwan Loze ki pou aport solisyon pou sa pei. Se lazenes ki pou bezwen aport solisyon.

Letan zot pe diskite depi taler mon'n tann nonm *National Climate Change Advisor* ki li i la pou *advise* Gouvernman ki mannyer pou *access International Climate Change finance*.

Mon'n tann larzan zorey in apik. Mr Speaker Sesel nou annan bokou *Youth-led NGOs* ki spesikman otour bann size lanvironnman.

Prezan mwan ki mon a kontan sey fer en pledwari avek Minis, si posib pou son Minister kapab trouv en fason pou kree akse avek bann fri ki sa *advisor* i kapab donn akse sa bann *NGOs* avek finansman enternasyonal non-gouvernmental international finance. So kree sa semen pou zot pase si posib.

Mon 2enm pwen i otour menm keksoz selman sa enn i plito mon ti enterese si Gouvernman ti a fer li eski i posib pou kree en form *Youth Mini Grants* pou bann zenn environnemental *activist* ki ti ava enterese pou - en kantite

keksoz nou'n diskite isi depi bomaten adopte en lanmar or *whatever* pti proze ki zot kapab annan.

Be si *through* sa finansman enternasyonal zot kapab idantifye larzan ki nou a kaba ganny en pou kree en *sort of Grant system* ki mon pa konnen nou ti a ganny bann zenn pou take care of Mont Signal *take care of* en lanmar tou sa bann konsern ki pe leve, si i enteres en zenn kounmsa nou ti ava annan sa bann *kernels of environment protection from a very young age* atraver nou sosyete ki nou ava ganny nou en zenerasyon pare e prepare pou nou *eat the fruits of benefits* ki zot kapab fer dan ankor 10 a 15an e nou pa ava dan menm sityasyon.

So mwan mon en pti pe pasyonnen par sa.

Mon 3enm en dernyen pwen Mr Speaker i enn ki en pe pli sansib – sansib isi anndan e i klerman sansib an deor. Mr Speaker nou pe resevwar bokou *question* lo *Caucus* lo size Grand Anse Praslin. Nou pe ganny bokou *advocacy* sorti an deor dimoun pe teks nou pe dir demann isi pe demann laba.

Finalman la i annan en lot keksoz, dimoun i ekoute, i ekout byen Lasanble konmela. La nou'n ganny teks en dimoun pe dir koumsa be

Minis Fonseka in dir poudir Bidze ti'n fini prepare e i annan lezot dimoun pe dir akoz zot in *meet* avek Minis, prezan i annan proze dan Bidze.

Finalman ki dimoun Grand Anse Praslin pe demande Minis si silvouple ou kapab desann vin vizit zot Grand Anse Praslin akoz i annan bokou issues konsernan ou Minister ki zot, zot anvi vwar ganny rezourd.

E si i annan en keksoz ki zot, zot pa pe apresye se ki zot pe fer krwar ki i annan 2 Minis Lanvironnman ki la dan Lasanble ozordi. Mersi Mr Speaker.

### **MR SPEAKER**

Mersi Onorab. Wi Minis?

### **MINISTER FLAVIEN JOUBERT**

Mersi Mr Chair. Mersi Onorab pou ou 3 pwen ki ou'n fer ki ou'n fer. Mon krwar *youth leadership* i en keksoz ki i pe ganny kiltive dan en fason. Akoz i annan bann program pou anmenn bann lazenes dan bann program lanvironnman, i aktyelman annan en program avek lekol, ki pe ganny fer par Departman Lanvironnman, mon krwar PS De Comarmond i ava kapab fer en komanter lo la.

E akse kree en louvertir pou bann zenn, mon krwar i annan ankore posibilite pou bann louvertir pou bann zenn. Me nou bezwen kapab vin ek tou sa bann linisyativ dan en fason konkret e Minister byensir i bezwen rod bann fason. Minister pa kapab *ignore* lavwa bann zenn letan zot vin devan avek bann propozisyon.

Sa bann *Youth NGOs* ki'n aktiv resaman zot in vin avek bann propozisyon. E definitivman zot in ganny akonpanyen dan en fason ou en lot e bann resours in ganny anmennen pou kapab siport zot aktivite. E pareyman si i annan bann nouvo group kile vin devan, mon krwar nou pou bezwen trouv en louvertir.

Mon'n deza eksplike avan ki mon pran en lapros ouver, nenport ki group zenn, pli aze kominoter ki anvi fer en keksoz nou pou bezwen donn zot en sans e donn zot en posibilite pou zot fer sa ki zot anvi.

Menm si nou pa toultan ki nou pou annan tou sa resours me nou kapab petet diriz zot kote zot kapab ale.

Kot i konsern *Grants* i annan 2 posibilite ki egziste la aktyelman. I annan en *small Grant projects*, ki mon krwar ou'n deza vwar serten group in ganny akse anba la. Anba

*small Grants* bann pti group ki pe azir dan klib kominote zot kapab ganny akse avek finansman, e sa i en fasilite ki deza la.

E osi *Environment Trust Fund*, i annan sa bann *call* pou *proposal* ki ganny fer tou le lannen. E mwan mon ti a kontan i ganny fer *at least* 2 fwa par lannen. Pou ki okenn group enkli bann zenn ki annan bann proze ki kapab ede pou fer nou avanse lo kote lanvironnman, e osi lezot size. Me kominoter par egzanp nou kapab donn zot en *Grant* pou zot fer zot aktivite.

E mon krwar i annan lezot posibilite, me selman sa aktyelman i sa 2 sours finansman ki prezan. Me petet en keksoz ki mon pou fer remarke ki petet sa bann zenn pa konnen poudir i egziste.

Me petet nou bezwen met sa a zot laporte, fer zot konnen poudir sa bann fasilite i la. E zot, zot kapab vin devan e ganny asiste dan sa fason.

Grand Anse Praslin *issues* ou dir mon poudir i annan plizyer *issue* lo kote Grand Anse Praslin.

Mwan letan mon'n al Praslin avek La Digue, normalman mon anvoy en *email* ouswa en mesaz kot tou *MNA*, tou Onorab enkli Onorab Gill, Woodcock, Porice e osi Ernesta pa Ernesta *sorry*

Uranie. E zot konnen poudir mon pe vini.

E alor si i annan posibilite pou nou zwenn avek group dimoun pou nou adres bann size dan sa bann distrik, mon fer li.

Me si i annan bann keksoz partikilye e si bann dimoun Grand Anse Praslin ti a kontan vwar mon pou serten size, mon kapab dir zot kan mon pou vin Praslin, e nou kapab asize diskite.

Akoz mon napa okenn problem pou asiz ek bann dimoun. E normalman letan nou vin Praslin, nou pas en zournen ouswa en zournen antye ziska 6er/ 7er diswar. E i pa en problem pou nou kapab zwenn avek zot.

So mon laport i ouver pou nou kapab ganny diskisyon e adres okenn size ki i annan pou fer avek distrik Grand Anse Praslin e byensir lezot distrik osi. Mersi.

**MR SPEAKER**

Mersi. Onorab John Hoareau.

**HON JOHN HOAREAU**

Mersi Mr Chair. Mr Chair dabor mon le remerci Minis Lanvironnman pou travay ki zot pe fer pou anpes lerozyon lo lakot Beau Vallon, sirtou dan rezyon kot *Pizzeria* ki'n ganny fer *rock armoring*. Ki son pwen nesaser pa'n kapab fer ler ti.

*(Interruption)*

**MR SPEAKER**

Onorab Hoareau. Annou pa lo sa pwen.

**HON JOHN HOAREAU**

... Wi Mr Speaker. Mon pe kontinyen.

**MR SPEAKER**

E ou realize poudir mon annan anpes ...

**HON JOHN HOAREAU**

Mon pe kontinyen Mr Speaker.

**MR SPEAKER**

Esper mwan aköz mon le fer en pwen. Ekout mwan aköz mon le fer en pwen.

**HON JOHN HOAREAU**

*Ok.*

**MR SPEAKER**

Sa bann zafer anvoy barb lo dimoun ki dan Lasanble ki dan soz, mon'n deza dir zot devret evite.

Onorab Cosgrow, ti ansyen Minis rezon aköz mon pa'n les li entervenir aköz Minis Cosgrow pa dan Lasanble. I an deor. *MNA* Cosgrow ki la.

Alor pou menm rezon, Onorab Woodcock in fer son pwen. Ou pa bezwen anplifye lo la. Kontinyen silvouple avek



bann pwen. Mersi. Nou ava arete.

**HON JOHN HOAREAU**

Mr Speaker mon'n dir son predeser pa'n fer.

**MR SPEAKER**

Kontinyen.

**HON JOHN HOAREAU**

I annan lezot Minis ki'n vin avan li dan lanvironnman.

**MR SPEAKER**

Kontinyen Onorab Hoareau.

**HON JOHN HOAREAU**

*Right.* Mon le met devan Minis pou Lanvironnman, ki ozordi nou pe vwar lo lans Beau Vallon i annan bann pye takamaka ki paret-man pe ganny sa maladi takamaka, paret ti leka en pe letan pase.

Alor i annan bokou bann brans ki pe sek, ki pe ki poz en menas si oule pou bann dimoun ki servi lans.

Alor mon oule demann li pou li si i kapab get dan sa sityasyon depre e fer koup sa bann brans ki sek e osi si i annan tretman pou sa bann pye takamaka sey redonn zot silvouple.

Dezyenmman mon ti a kontan Mr Speaker apros sa size lalyann. E mon kontan ki Onorab Henrie in zwenn avek nou de Onorab Georges pou *advocate* en pti pe lo sa size, ki

pe menas nou biodiversite lafore. E mon taler mon'n ekout repons *PS* tre avek bokou lantouzyazm. Me mon pa'n tann li koz lo en *community-based approach*.

Akoz mon krwar poudir i enportan ki lakominote osi i zwe en rol ladan. Akoz vi ki i annan propriyete prive ki *involve*, mon krwar osi ou pou bezwen travay lo en serten Lezislasyon, pou petet fors sa bann dimoun, mon pa konnen si ou kapab servi sa mo forse, me kosyonn zot pou zot kapab fer netwayaz sa bann lalyann osi lo zot propriyete prive.

E mon trwazyenm kestyon Mr Speaker, i baze lo sa sonm 15.177milyon ki'n ganny mete pou *Ridge to Reef Integrated Management*. E mon krwar sa i en keksoz tre, tre en portan pou proteksyon lakot pou proteksyon lakot, pou proteksyon nou *fish stock* e pou tourizm e lezot keksoz ankor vi ki annan omwen 500 milyon dimoun ki depann zot lavi i depann lo *the reef*.

Be mon pe demann Minis si zot in get dan posibilite travay an sinerzi avek bann NGOs, an vi ki mon konnen *Nature Seychelles* in fer bokou travay lo la. E depi lepok ... *of Capricorn* ti bann proze depi o konmansman menm. E si sa si zot pou *outsource* sa bann travay, oubyen si zot menm zot annan

en lekíp ki pe fer sa bann travay? Mersi.

**MR SPEAKER**

Mersi Onorab. Minis.

**MINISTER FLAVIEN JOUBERT**

Mersi Mr Chair. Mersi Onorab pou ou bann kestyon. Pye takamaka byensir nou ava rod fason pou nou adres sa bann problem ki pe arive avek brans. E osi travay avek bann dimoun *National Park* pou nou gete si nou kapab fer en pe tretman osi sa bann pye takamaka. Nou pa kapab *afford* pou lezot mor, aköz zot in *mature* zot pe zwe en rol dan proteksyon lakot.

Bann plant anvaisan, byensir nou bezwen travay avek kominote. Mon ti koz lo posibilite servi bann dimoun ki lo ki'n ganny kondannen pou fer servis kominoter.

Me an menm tan osi nou bezwen travay avek bann dimoun ki propriyeter bann later, e vin avek bann program pou ankouraz zot, petet parey Onorab pe dir, pa fors zot me ankouraz zot, ouswa travay akote zot pou fer ki zot kapab met sa bann problem anba kontrol lo zot later.

Donn zot bann teknik, eksplik zot ki mannyer keksoz i ganny fer, e si i annan bann sipor par egzantp nou kapab

osi anmenn bann diferan plant ki dimoun i kapab met lo zot later. Aköz en fwa ki ou tir sa bann lalyann. Lenportans se ki ou replant li avek lezot lespes pou ki sa bann lalyann pa retournen lo sa bann propriyeter.

E menm petet aköz nou pa ankouraz zot pou zot met bann plan ki prodiktiv;- par egzantp bann plant ki prodwir fri ki kapab met lo marse.

Lot pwen i konsern sa proze *Ridge to Reef* ki annan 15.177 milyon. I pa zis en proze konsern *reef*, me i en proze ki konsern plizyer laspe. E mon ava demann PS De Commarmond pou li koz en pe lo la. Mersi.

**MR SPEAKER**

Wi PS.

**PS ALAIN DE COMMARMOND**

Mersi Mr Chair, mersi Onorab kestyon. So sa proze *Ridge to Reef* nou'n fek konmans li lannen pase an prensip.

E an prensip i pe target an antye montanny ziska lo bann resif parey son non i dir. An prensip i kouver tou bann lenpak depi lo montanny ziska bor lanmer. I kapab annan lo lavi para maren lo kote *marine life*. Ladan i enkli osi pou *deal* avek bann *issues* par egzantp bann aktivite ekonomik. Par egzantp lagrikiltir ki i kapab si

i pa ganny fer dan en fason soutenab.

Parey nou konnen tou keksoz i end-up bor lanmer, lo bann resif, atraver larivyer. So i en lapros konpreansiv ki fer sa konneksyon, sa ki pase anler ki kapab ganny en lenpak pli ba.

Lo kote bann *marine areas* parey nou pe koze i pou annan plizyer bann *survey* pou ganny fer lo resif koralyenn *as well as* manglier osi. E apre pou annan restorasyon ki pou enkli swivan bann rekomandasyon, i pou annan *training* bann *staff* ki *involve* ; - bann *expert*, lokal ki *involve* dan bann aktivite.

Nou krwar lo kote bann Onorab osi zot pou kontan tande osi parey in mansyonnen, se ki i pou annan *community involment*. I annan en aktivite an prensip pou *enhance* kapasite lo nivo kominoter e osi bann *NGOs* ki *involve* lo nivo kominoter.

*Education* and *awareness* osi an relasyon avek sa size. Lo resif koralyenn osi zis pa fer mansyon ki sa lannen enn bann travay Polisi ki nou pe travay lo la, se pou annan en Polisi nasyonal lo resif koray – *Coral Reef Policy* ki pou gid en pti pe pei lo ki priyorite an relasyon avek konservasyon bann resif koralyenn, resers, restorasyon

bann lezot lapros *management*.

An plis nou annan en lot proze ki tous en pti pe lo ladaptasyon an menm tan, ki ganny finanse *par Adaption Fund*. i en proze Sesel/Moris ki pe fer si oule an Angle nou dir sa *upscaling*.

Parey zot konnen i annan en kantite bann pti proze restorasyon resif ki'n ganny fer partou, partou Sesel e sa proze se ki i pou donn kapasite bann sirtou bann *NGOs* e Lotorite Park Nasyonal pou zot kapab kree bann *nursery*; e fer bokou kapab annan kapasite pou kapab fer bokou plis bann restorasyon resif dan Sesel an zeneral. So sa i en pti pe an relasyon avek *coral reef* ki nou annan dan sa Bidze Minister, e osi bann proze relevan an relasyon avek *coral reefs*. Mersi.

### **MR SPEAKER**

Mersi. Onorab Pillay.

### **HON SEBASTIEN PILLAY**

Mersi Mr Chairman. Mr Chairman, bonswar e bonswar tou Manm Onorab e bonswar tou dimoun ki a lekout.

Mr Chairman, i fer mwan en plezir pou kapab koz lo en size ki sa parti ki mon prezante, ki'n dan Gouvernman pandan plizyer lannen, in nobou *champion* e fer ki Sesel ozordi i enn bann

pei ki son nivo an se ki konsern konservasyon e proteksyon lanvironnman i ganny rekonnèt otour lemonn.

E ki sa mon krwar i pa zis vin atraver travay ki ganny fer politisyen. Me i vin atraver en travay ki'n ganny fer par tou Seselwa, enkli zot lo lot kote latab osi. E mon krwar i en keksoz ki nou tou nou bezwen pran gran lafyerte ladan.

E pandan letan ki nou pei pe pas dan bann moman vreman difisil, la ki nou'n tandè pri *fuel* in ariv sepa konbyen. Pri lavi in monte e *COVID* pe pas partou e Gouvernman pe *struggle* avek sityasyon, i pa pe kapab *deal* avek sa sityasyon.

Mon krwar i byen ki nou kapab koz lo en size parey, en size lanvironnman e pran serten kestyon pertinan lo sa Bidze lanvironnman, pou nou kapab ganny serten klarifikasyon lo kote nou pe ale.

So premyerman enn bann keksoz ki mon ekstrememan konsernen avek, se sa Lalwa *EPA* ki sipoze ganny revwar. Mon pa pe vwar larzan pou *consultancy* ou lezot travay ganny fer. So eski Minis ou kapab dir nou, eski Bidze in prevwar ki pou annan sa revizyon dan Lalwa *EPA* ki nesese?

Akoz Lalwa *EPA* i pou *set* standar pou bann letid lanvironnman, bann *environment impact assessment*, ki nou'n vwar in vin enportan.

Par egzanp ler nou'n vwar konsiderasyon proze Anse à la Mouche resaman. Mon ti krwar Prezidan ki ti pe prezant en *EIA* sa letan, me pa ti en *EIA*, ti zis sa proze.

Aprè Minis, eski Departman Lanvironnman, enn bann sikse ki zot annan, se bann program ki zot annan atraver Minister Ledikasyon. Par egzanp parey sa program *Echo School* ki bann etidyan i fer, mon konnen la avek *COVID* zanfan pa kapab zwenn.

Me eski sa i en keksoz ki zot pe prevwar ki pou ganny kontinyen pou ganny mentenir, pou fer sir ki bann zanfan i pran sa lentere dan domenn lanvironnman? Nou rapel ti annan zanfan ki ti ganny sans al vizit Aldabra ler zot lekol ti sorti premye.

So, sa ti ava pou non konmsi kontinyen fer sir ki nou bann zanfan i kontinyen vin sa nouvo zenerasyon ki pran larelev *from* bann ki mon konnen la devan zot osi zot in fer en lakantite zefor pou devlope.

Mon trwazyenm kestyon, mon konnen ou'n dir nou demann 3. Mon pe swiv

prosedir. Mon trwazyenm kestyon i lo sa sityasyon lalyann anvaisan.

Eski Minis pa'n mazine oubyen pa pe panse travay avek APDAR dan en programm kot nou ganny bann kliyan APDAR ki kapab, vi ki i annan difikilte ganny en lanplwa ozordi.

Ek bann kliyan APDAR ki kapab partisip dan e programm ki Minister Lanvironnman i met an plas, pou detri sa bann lalyann anvaisan dan bann *trail*, dan bann landrwa kot i nesese detri li.

E sa programm i ava ede *from* en pwennvi nasyonal, *from* en perspektiv nasyonal pou fer ki dimoun pa zis avan annan sa konsepsyon, aköz APDAR in ed en kantite sa bann zenn refer zot lavi. E i ava ede pou ki sa bann zenn i partisip osi dan rann en pti pe avek lasosyete atraver fer en keksoz ki probableman en kantite zot pou kontan fer? Mersi Mr Chairman.

### **MR SPEAKER**

Mersi Onorab. Wi Minis.

### **MINISTER FLAVIEN JOUBERT**

Mersi Onorab. Mersi Mr Chair. Mersi Onorab pou ou bann kestyon. Mon pou koz lo tou le 3 size, me apre mon pou

envit PS De Commarmond pou dir de pti parol lo la.

APDAR, mon a komans ek dernyen pwen ki ou'n fer konsernan APDAR ek bann proze lalyann. Mon'n nonm bann dimoun ki sipoze fer servis kominoter ki ti oule met zot dan en programm.

Me APDAR osi nou'n met dan nou diskisyon ki mon'n fer ek Minis pou Zafer Etern. E nou oule ki tou sa bann dimoun i ganny servi pou zot anmenn en benefis kot pozitiv dan kominote.

E APDAR li osi i sipoze ganny mete dan sa bann programm pou ki nou kapab annan en lefe lo sa bann netwayaz bann lalyann dan diferan landrwa.

Byensir parey in ganny leve pli boner, nou bezwen osi mazin bann propriyeter e osi ankouraz zot. Me sa bann dimoun zot kapab ed nou pou nou fer en pe programm dan bann lespas ki pli vizib dan pei.

EPA Review, lo premye pwen. Ou ti'n demande kan ki pou fer sa *review*. Sa, i annan en papye ki ti pas *Cabinet* lannen pase pou reviz Lalwa pa EPA, *sorry*. Lalwa Proteksyon Lanvironnman, EPA pa pe ganny *review* li, aköz i ti ganny *review*, ti sorti en nouvo versyon an 2016 si mon rapel byen.

Sa ki sipoze ganny revize se regilasyon letid lenpak ki date depi avan e li i pou fer sir ki i ganny met azour avek bann demann ozordi. E osi ki nou entrodwir serten nouvo mezir pou asire ki piblik i ganny pli byen entegre dan sa regilasyon.

Me i annan en papye ki ti ganny anmennen kot *Cabinet* lannen pase, me son bann rekomandasyon ladan pa ti ankor ganny egzecute. Mon pou re al *Cabinet* avek sa papye aköz mon'n ganny en nouvo versyon avek bann *staff*.

E nou ti oule ki nou met bann nouvo eleman ladan e re anmenn li *Cabinet* pou ki nou kapab demar sa proses, kot nou ganny diskisyon avek *Attorney Zeneral* pou nou met bann nouvo lenformasyon ladan.

Me mon ti a voudre lo sa pwen Onorab fer sorti ki i pa pou zis Lalwa *EIA* ki bezwen ganny *review*, aköz i annan lezot landrwa kot nou pou bezwen osi anmenn serten provizyon.

Par egzanz letan bann gro proze i vin pou ganny prezante avek Gouvernman pou premye fwa, menm avan ki nou anmenn li dan proses *EIA*, i pou enportan ki bann Lalwa par egzanz Lalwa *SIB* i ganny amande pou ki piblikman dimoun i kapab

komans konnen poudir sa bann proze i egziste.

E ki sa bann proze pe ganny targete dan tel ou tel landrwa. E zot kapab komans annan sa diskisyon lo sa bann keksoz ki nou konnen nou'n ganny difikilte avek par egzanz dan ka Anse à la Mouche. Kot eski i annan en fason, en proze alternativ pou sa sit? Eski sa dezinyasyon *land use* pou sa landrwa i apropiye.

Sa i sipoze ganny fer avan *EIA* e mon krwar nou osi bezwen konsider bann lezot Lezislasyon ki an aplikasyon e ki ganny leve dan bann problem ki apre i vin pli tar atraver proses *EIA*.

Aköz proses *EIA* i pa pou kapab kouver tousala. Alors i pou enportan ki nou osi mazin bann lezot lareg bann Lalwa dan pei, pou ki zot osi zot ede pou nou klarifye bann keksoz otour bann proze ki pe ganny fer ek bann devlopman.

Progranm Ledikasyon *Eco School*. Wi, byensir nou pou *maintain* li. I annan serten konponan ki mwen mon ti a voudre nou re met lanfaz lo la. Par egzanz mon konnen poudir dan lepase, nou'n travay avek bann lekol pou nou fer bann proze separasyon salte pou ankouraz resiklaz. E osi pou ki bann zanfan i anmenn sa

bann prensip kot zot komans edik zot paran.

Me letan nou gete sa bann proze in demare. Nou'n aste bann lekipman, bann bin. Me apre son bout ki vin apre, pou swiv li, pou fer sir ki i ganny fer byen e pou ki bann dimoun ki vin tir salte kot bann lekol.

Par egzant bann dimoun ki vin netway kot lekol, zot osi ganny angaze dan sa *process* pou ki nou asire ki nou ganny en rezilta ki bon, ki pa'n tro marse.

Ki fer ki konmela a ou pou vwar diferan kouler bin e tou salte pe ganny mete dan tou bin e nou pa pe aprann naryen avek. E alor mon krwar i enportan pou nou re pran serten eleman sa bann program.

E travay avek bann lekol. E travay avek bann etidyan pou nou vremen arive donn zot sa sipor pou zot kapab devlope atraver sa bann proze *Eco School*.

Me selman mon larepons se ki definitivman nou bezwen mentenir sa proze sa bann program *Eco School* aköz i enportan pou nou angaz bann zenn dan sa size ki annan pou fer avek lanvironnman, sirtou aköz zot ki kapab lenfliyans bann lezot dimoun dan sosyete. Mersi Mr Chair, mon ava envit *PS Commarmond* pou fer.

### **MR SPEAKER**

Yes, *PS Commarmond*.

### **PS ALAIN DE COMARMOND**

Mersi Mr Chair. Mersi *Leader of the Opposition* pou kestyon. An relasyon ek *EIA Regulations*, zis pou donn en pe lide tou bann Manm Onorab en pti kwa, ki direksyon i pou ale en pti pe.

So, nou'n re *get*, aköz vi ki sa Regilasyon avan i ti *quite* vye, bann '93/ 94. So, nou bezwen moderniz li e nou'n ganny ase leksperyans avek bann gro proze, pou nou kapab pran kont bann bezwen aktyel.

So an prensip par egzant bann kriter ki ou kapab, ki ou bezwen annan pou ou kapab vin en konsiltan, fer sa legzersis. Bann responsabilite koman en konsiltan li menm. Aköz parey nou'n kapab vwar i annan en kantite keksoz ki leve. Ouswa diskisyon, ouswa kontrovers ki *come out* avek sa bann gro proze.

Souvandfwa laplipar ditan blanm i tonm lo Lotorite ouswa Gouvernman li menm.

Me anefe i annan en kantite responsabilite osi ki lo sa bann konsiltan zot menm ki zot bezwen fer, sirtou lo nivo kominoter pou angaze avek bann *stakeholders* lo nivo distrik, pou fer sir ki devloper i zwenn ek bann Manm

Lasanble, avek *DA*, ensidswit pou get bann laspe kominoter.

Aprè i annan sa size *class 1, class 2*, klerman osi. Avan regilasyon i ti en pe vag. Ki manner sa desizyon i ganny pran pou li en *class 1*, ki bokou pli detaye. Ki annan bann *process* piblik e osi sa *screening process*.

Avan ti annan bann *schedule*, diferan kalite devlopman ki en *class 1* i devret ganny konsidere, me la nou pe propoz pou annan en *screening process*, kot diferan lokasyon i annan diferan konsiderasyon ki ou kapab pran.

Aprè parey Minis in mansyonnen, trez enportan i sa laspe *pubic consultation*. Avan sa provizyon se ti dir met zis sa rapor lo *public display*, esper komanter, apre *compile* komanter. E nou tou sa bann lannen nou'n fer sa bann *public meeting*.

I pa ti *provided for* dan sa Regilasyon li, me selman tou sa bann lannen Gouvernman in vwar li en nesosite pou organiz sa bann *public meetings*. So, nou oule ki sa laspe la i vin bokou pli eksplisit. Ki kantite, a ki staz ki sa i devret ganny fer.

E parey Minis in dir, i annan en pli gran koneksyon avek sa *process* depi ler investisman in ganny prezante ek Gouvernman. Ki

manner sa i konekte, e fer sir ki tre boner bann konsern ouswa bann keksoz, lo nivo kominoter i ganny *captured* avan i ariv lo *EIA stage*.

Lo kote zenn, parey Onorab Loze osi in mansyonnen pli boner, i reste en Polisi tre kler, *straight forward across* Minister lo Departman osi pou angaz bann zenn atraver lekol.

Akoz nou'n travay tre pros avek sa seksyon Minister Ledikasyon ki fer bann program ansanm avek nou lo kote lanvironnman. I annan bann *holiday camps*, nou annan *Eco Schools*.

E osi en keksoz ki mon krwar nou enn bann Minister ki nou ganny bokou i sa bann *internships*. Nou ganny en kante demann bann zenn. Manrmay lekol, segonder ler i dan vakans, i annan ki enterese zis ganny sa leksperyans *internship* kot Minister.

E nou, nou *welcome* sa. Akoz toultan nou vwar sa ki en potansyel, i en kandida potansyel ki *eventually* i kapab vin travay dan sa domenn. *Whether* i dan sa Minister oubyen i kapab ganny enspire pou al travay koman en syantis ouswa en *NGO*.

So, nou pou kontinyen siport sa e dan Bidze li menm atraver, *across* tou le 5



*program area.* Pa tou le 5 *sorry.* Tou le 3. Program 3, 4, 5 i annan provizyon pou fer sir ki sa, lo kote ledikasyon, *involvement* zenn, zanfan, ensidswit i reste tre for, an relasyon ek nou bann program ledikasyon.

En size ki'n ganny leve Onorab an relasyon avek *involvement* maksimonm dimoun dan sa program *invasive creepers, invasive species,* parey mon'n masyonnen lo komansman, byento, *once* sa bann restriksyon *COVID* i lar en pti pe, Minister ansanm avek tou bann partner pou lans sa program.

E dan nou vizyon parey nou'n diskite ansanm avek Minis, se nou pou *involve* bokou sa bann dimoun. Parey nou'n masyonnen, bann kliyan *APDAR.* Nou'n koz lo solda osi, i annan bann prizonnyen osi ki dan lepase in *involve* osi avek bann aktivite lanvironnman. Sa osi i ankor *still* en posibilite.

So pou nou aköz nou bezwen bokou lanmen pou target si oule bann diferan *site.* Nou'n met bann target dan nou Bidze, ki kantite *site hopefully* nou kapab *achieve* idealman pandan lannen.

So plis dimoun posib, parey mon'n masyonnen taler. Si bann Manm Onorab ansanm avek bann *DA* i kapab

mobiliz dimoun lo nivo distrik *once* program i lanse i pli bon ankor. Nou ankouraz sa. So, mon a fer en demann ki zot kapab komans planifye en pti pe.

Mon konnen i annan serten distrik i byen striktire an term zot bann volonter, komitman dimoun pou vin devan. Fer sa bann aktivite. So komans planifye e *once* ki program i lanse nou a travay ansanm dan sa direksyon. Mersi.

#### **MR SPEAKER**

Mersi. Nou a kapab terminen? Wi.

#### **HON SEBASTIEN PILLAY**

Mersi Mr Chairman. Mr Chairman mon pou terminen. Premyerman Minis, *please* note mon ti a kontan ki nou ganny enformen ler nou pe fer sa regilasyon final. Aköz i annan en *S.I.* ki nou'n anile an relasyon ek serten *commitment WTO* ki nou'n fer ki ti permet *consultancy* dan domenn lanvironnman ki permet bann konsiltan etranze vin fer *EIA.*

E sa ki mon'n ganny met okouran se ki i menm annan konmela serten konsiltan etranze ki fer *EIA* e ki kapab annan en pratik kot nou bann dimoun pe *sign-off* lo sa bann *EIA.* Mon pa kapab dir ou si wi oubyen non.

Me i neser ki si en *EIA* i ganny fer par en Seselwa ki konn konteks sosyoekonomik, e kiltirel nou pei, nou annan dimoun ki'n *train* ki kapab fer sa bann *EIAs*. So mon ti a kontan ganny sa lenformasyon.

Apre en pti pwen osi ki mon ti a kontan met devan ou Minis. Mon byen konpetan ki ou'n *email* Onorab Porice an relasyon avek letan ou pe mont Bais Ste Anne. Mon ti a kontan osi, vi ki mon osi mon sorti Glacis, mon ganny en *email* ler ou pe vin Glacis an relasyon ek bann proze ki annan pou fer Glacis.

E byensir Mr Chairman sa i en Bidze ki mon pou siporte. Akoz mon konn Minis, i en dimoun ki annan en for karakter ki'n travay plizyer lannen dan domenn lanvironnman. Me sa ki kler osi, in montre nou osi. Se ki Minis avan osi pa'n tro mal travay. So, mon krwar sa i zis en kontinyasyon.

E en lot fason pou kontinyen elev nivo travay ki Departman Lanvironnman i fer. E mon remerci ou Mr Chairman pou ou pasyans e ou lendilzans ozordi. Mersi Mr Chairman.

*(Interruption)*

**MR SPEAKER**

Mersi. Lord silvouple! Avek sa mon a demann zot pou vot lo sa Bidze, ki Bidze pou *Department of Climate Change & Environment* lo paz 494 ziska 505 pou en total R121milyon 871mil. Manm ki an faver lev lanmen silvouple. Mersi, tou dimoun in vote.

Alors Bidze pou *Department of Climate Change and Environment* lo paz 494 ziska 505 pou total R121 milyon 871mil in ganny 32 vot pour, 0 vot kont e 0 abstansyon. Alors mon annan plezir deklare ki Lasanble in aprouv sa Bidze.

Nou bezwen pran vot lo Minister. Vot total. Vot lo *Ministry of Agriculture, Climate Change & Environment*. E sa i lo paz 494 ziska 509 e total son Bidze i R127milyon 904mil. Manm ki an faver lev lanmen silvouple? Mersi.

Bidze pou *Ministry of Agriculture, Climate Change and Environment* lo paz 494 ziska 509 pou en total R127milyon 904mil in ganny 32 vot pour, 0 vot kont e 0 abstansyon. Alors sa Bidze osi in aprouve. E mon a remerciye bann zofisy Lanvironnman.

Me selman bann Manm mon santi nou annan lobligasyon pou pran en lot antite ki nou'n fer atann apre midi. Nou apepre lertan retar. Me selman mon krwar a nou a kapab *entertain* zot la.

Alors mon a remersye bann zofisy Lanvironnman ek *Climate Change* e mon a evit zot pou fer zot depar silvouple.

**(THE DELEGATION WAS EXCUSED FROM THE HOUSE)**

**MR SPEAKER**

Pardon? Wi, sa antite i *Seychelles Meteorological Authority*. Ok? Mersi. Alors nou ava envit lot delegasyon pou antre silvouple.

**SEYCHELLES METEOROLOGICAL AUTHORITY**

**MR SPEAKER**

Alors mon annan plezir dir byenveni zofisy *Seychelles Meteorological Authority*. E avek nou, nou annan Mr Vincent Amelie, son *Chief Executive Officer* e Ms Joanne Rapiera, *Accountant*. Nou pe pran Bidze *Seychelles Meteorological Authority* ki lo paz 258 ziska 532 pou en total R14milyon 787mil. Minis ou a entrodwir sa Bidze silvouple.

**MINISTER FLAVIEN JOUBERT**

Ok, mersi Mr Chair. Mersi bann Onorab pou zot bann enteraksyon depi bomaten. Nou annan lekip sorti Biro Meteoloji. Bidze sa Lazans in

ogmante sorti R14milyon 307 an 2020. In ariv R14milyon 787. Mon a demann bann Onorab zot annan bann dokiman, pou met bann kestyon dan laporte Mr Amelie ek son koleg.

Okenn kestyon ki zot annan konsernan Bidze i a kapab reponn. Sirtou lo bann pwen kot in annan logmantasyon mazer. Par egzanp dan '*wages and salaries*' e mon pa laparol avek ou Mr Chair pou kestyon.

**MR SPEAKER**

Mersi. Mon annan Onorab William.

**HON WAVEN WILLIAM**

Mersi Mr Chairman. Mr Chairman, mon anvi demann avek Mr Amelie. Pou sa Bidze ki nou pe al vote la. Mon anvi demann ou konbyen travayer ki ou annan ?

E parmi sa bann traver konbyen etranze ki pe travay dan sa Departman? E an menm tan vizavi bann saler ouswa *package* ki bann Seselwa pe gannyen avek sa bann etranze, konmsi kwa bann diferans? E eski sa bann etranze zot annan *understudy* ki pe *understudy* zot? Mersi.

**MR SPEAKER**

Mersi Onorab. Mr Amelie.

**CEO VINCENT AMELIE**

Mersi Mr Chair. Bonn apre Midi tou bann Manm. Onorab William mersi pou sa enn de keston. An realite nou annan nou anviron 34 *staff* an tou e lo kote etranze nou annan 11 *expatriates*. E zot tou zot bann sa ki nou apel bann previzyonis. Savedir bann *expert* ki si ou le fer prediksyon lo kondisyon letan, en pti pe lo klima.

So, i en domenn en pti pe spesyalize ki pour lemoman nou napa sa kantite Seselwa *available* pou fer sa louvraz.

Wi, zot *understudy*. Nou deza annan en program lokalizasyon. Nou espekte ki *by* 2030 nou pou'n preski fini ranplas zot tou. Avek en program ki si ou le tou le lannen nou pe anvizaze *recruit* enn a de manrmay.

E pa zis *recruit*, me fer sir ki zot al *study* aletranze.

Parski i pa vo lapenn kot nou si nou pran ou, me selman ou pa kapab al *study*. Akoz en *licence* ki ou gannyen pou ou kapab deservi sa, pou ou kapab fer sa louvraz.

Sirtou, sirtou dan sa laspe sa bout ki annan pou fer avek *aviation meteorology*. Kot i annan bokou pou fer avek *safety*.

E alors si nou kapab, tou le lannen depi sa lannen la, *recruit* enn a de e anvoy zot aletranze. E i en *training* ki

pran anviron 3an pou konplete.

Savedir sa ki al 2021 i tournen 2024. Sa ki al 2022 i retournen 2025. Nou santi poudir sa 11 *expatriate* ki avek nou la, nou pou'n fini ranplase avek nou bann Seselwa. Wi, si oule.

### **MR SPEAKER**

Mersi. Wi Minis.

### **MINISTER FLAVIEN JOUBERT**

Mersi Mr Chair. Mon ti a kontan pete fre en lot pwen lo sa ki Mr Amelie in dir lo ranplasman bann etranze, ek formasyon bann Seselwa pou pran zot plas.

Letan mon'n fer diskisyon avek Mr Amelie e *met office*, zot *Board* osi. Ki zot in fer mwan konpran, se ki zot in devlop en plan pou *cost recovery*, ki sipoze osi anmenn serten resours sorti kot lavyasyon pou siport Biro Meteoloji.

Parey ou a remarke dan sa Bidze 14.7milyon, napa bokou pou *training* ladan. Mon pa konnen si i pou ase, petet Mr Amelie i ava konfirman si i pou ase pou nou siport nou bann dimoun direkteman, ouswa si nou bezwen rod *scholarship*.

Me nou pou bezwen osi arive konklir sa diskisyon lo *recovery* serten larzan sorti

kot Lavyasyon, pou siport meteoloji pou ki li kapab devlop son program e vreman annan kontrol lo son plan lokalizasyon.

Akoz si nou pou esper zis *scholarship* sorti an deor, ouwa nou pou depan, nou pou al fer konpetisyon avek bann lalis *scholarship* ki annan lo nivo nasyonal, i posib ki pa tou le lannen ki nou pou kapab *train* sa kantite dimoun.

Alor i pou enportan ki sa diskisyon i ganny konklir e ki i annan en garanti ki sak lannen i annan en sonm ki pe vin kot Biro Meteoroloji ki an premye i a kapab komans servi pou li asir formasyon son bann dimoun sak lannen ziska 2030. Mersi Mr Chair.

### **MR SPEAKER**

Mersi. Onorab William i oule en siplemanter.

### **HON WAVEN WILLIAM**

Mr Chairman, i annan en kestyon i pa'n reponn konsernan *package*. Epi an menm tan pou mon fini lo leklersisman, ou a fer en sel reponn. Letan mon pe regarde ou dir nou ou annan 34 *staff*, 11 ladan i etranze. Vedir ou annan ou zis 23.

Me, depi kan ki sa bann etranz i dan pei? E depi ler zot in antre, eski sa bann *understudy* ti avek zot e par

lefe ki sa bann etranze zot sipoze bann eksper. Eski zot pe osi *pass on* serten formasyon?

E prezan ki fer ki mon demann mon lekor, aköz pe pran nou tou sa letan, ziska 2030, pou nou kapab ranplas zot? Par lefe ki si mon pou regard prensip nouvo Gouvernman se *localise* bann *post*.

So, ki zefor ekstra ki nou pe mete? Aköz mon aprann poudir i annan serten bann Seselwa ki'n retournen. Eski zot nivo konmsi i ankor vreman ba pou kapab fer ladiferans? Mersi.

### **MR SPEAKER**

Mersi. *Yes CEO*.

### **CEO VINCENT AMELIE**

Mersi Chair. Onorab mon apresye sa bann kestyon. E mersi pou donn mwan sa loportinite kekfwa pou eksplik en pti pe pli byen larealite sa louvraz ki nou fer.

Nou admet wi, poudir dan letan pase nou pa'n fer ase si oule, sa ki nou apel *outreach* pou tant pou anmenn manrmay ver sa servis meteoroloji.

I pa en domenn ki fasil, fodre ou ase for dan kalkil avek *physics*. La nou pe koz nivo en pe pli o. E sa i de size ki toultan manrmay letan ou

mansyonn zot, manrmay i tant pou reste en pe lwen avek.

E dan letan pas osi nou'n ganny sa *challenge*, kot bokou bann marmay letan zot fini zot *A level* zot plito swazir bann size parey enzenyer, *GIS*, ki mwan mon santi dan pei ozordi sa in *saturated*. Me selman manrmay ti ankor pe swazir.

Wi, in en *challenge*, me selman nou pa kapab asize dir toultan napa Seselwa kalifye. Nou bezwen fer *something about it* pou nou kapab finalman rezourd sa *issue*. E se pour sa rezon ki lannen pase nou'n kree en *unit* dan nou Lotorite, kot i responsab prezan pou al ver pou *strengthen* en pe sa *outreach activities*.

Kot manrmay aprezan pe al deor, pe fer manrmay konpran pli byen, promot en kou meteoloji. Akoz bokou manrmay i krwar poudir meteoloji i siz sa pti bout ki ou vwar lo televizyon aswar e apre bokou bann manrmay letan ou koz avek zot dir ek ou, "*ah* zot pe koz manti, pa bon, i pa *accurate*. Me nou fer bokou plis ki sa.

E se sa letan nou al ver zot, nou fer zot konnen poudir kot nou ou kapab spesyaliz dan sa ki nou apel *Hydromet*. Relasyon ant delo avek meteoloji. Bann *drainage*, bann *issue flooding*.

Nou fer manrmay konnen poudir ou kapab spesyaliz dan sa ki nou apel *Agromet*. Ki bann *challenge* ant lagrikiltir avek meteoloji. I annan en relasyon pou kapab spesyalize ladan.

Nou fer manrmay osi konnen poudir i annan sa ki nou apel *marine meteorology*. Kot ki relasyon i annan ant meteoloji avek lamarin. E osi lo kote sanzman klima. Pa sanzman klima negosyasyon, me sanzman klima dan son kote lasyans.

Alors i pa vreman. Manrmay persepsyon sete zis sa pti bout meteo aswar e zot ti fer, zot ti donn si oule en *picture* lo vwala ki meteo *it's all about*. E se sa ki fer li en pe difisil dan letan pase, pou nou kapab anmenn bann manrmay kalifye ek *A Level* pou zot kapab al *study* deor.

Me parey mon'n dir ou, la nou pe sanz sa persepsyon. An realite, la aktyelman *as we speak*, nou'n ganny nou 2 manrmay *A Level, very good grade*. Zot in fini ganny aksepte pou al *study* e la i zis en *matter* ganny finansman pou zot kapab ale e i pou en *plus* ankor pou nou.

Lo kote *package*, i en bon kestyon ankor. An realite an mwayenn bann *expatriate* pe ganny zot, zot *gross* anviron R23 mil e si ou fer en *rough*

kalkil dan mon latet. *23 times* 11 zot, i fer R253mil. Savedir si ou pe *times* sa *by 12* pou lan. Anviron 3 pwen *something* milyon. *Ya?* E si ou pe get nou Bidze an zeneral pou lo kote '*wages and salaries*' i en pti pe anviron R7milyon. Savedir lanmwatye sa larzan *salaries* i al anver *expatriate*.

*But* Onorab, *but* - Mon pa tro vwar en gran diferans ant sa ki en *expatriate* pe gannyen avek letan en manrmay Seselwa letan zot pou'n tournen, sa i pou zot *package*. *Zot package* i anviron R20mil en Seselwa ki tourn avek en *BSA*.

Kote ki i en dezavantaz pou nou se zis lo kote bann keksoz *rental, housing*. Be lo *package* li menm i en diferans selman anviron R3000 ant en *expat* avek en Seselwa.

E zis pou azoute ankor, si ou permet mwan Chair. Se ki *not everything* i get nwar. Wi nou annan nou 11 *expatriate* pour lemoman, me zis lannen pase 4 Seselwa in tournen avek zot *BSA*. 3 dan *Forecasting* avek enn dan *IT*.

Onorab mon annan apepre 30an avek Meteo. Preme fwa ki mon trouv 4 manrmay tournen avek en *BSA at one time* ! Tou kou in vini, enn de. Me selman i zis en keksoz ki nou pa koz lo la. Nou kontan reste nou Erport,

nou fer nou louvraz. *But there is a bigger picture*.

Savedir la nou annan nou 4 Seselwa. 3 ki pou al komans pran plas bann *expatriate* e 2 pe esper zot posibilite finansman pou zot ale. E mon konvenki si nou ganny finansman, avek sa program ki nou annan *outreach*, ouver laport.

Nou annan nou en nou striktir. Nou annan nou en nouvo striktir ki nou'n travay lo la, ki prezan nou santi nou kapab *retain* manrmay. Fer zot kontan sa lasyans. Nou santi ki nou pou kapab arive *by 2030* pou ranplase.

I bezwen 2030 Onorab, parski i en *licence* ki ou donner. Ou pa pou kapab zis dir ou pe rod en dimoun *out there*, pran anmenn kot meteo e ranplas sa *expatriate*.

Si i deza annan son *BSc*, i antre. Demen bomaten i ranplas en *expatriate*. Me si ou annan zis *A Level* ou pa pou kapab vin pran. Ou pou bezwen al *train* e ganny sa *license* e la ou ava deservi, ou a kapab travay.

Alors i annan en levantay *issues*. Me selman nou konsernen. Nou konsernen vremen avek sa *issue* akoz i en *burden*. I en *burden* e nou santi poudir nou bezwen *take* li pli vit posibil, pou nou kapab met nou Seselwa e kapab

deservi sa sekter pli byen.  
Mersi Mr Chair.

**MR SPEAKER**

Mersi *CEO*. Minis ti pou azout keksoz.

**MINISTER FLAVIEN JOUBERT**

Mersi Mr Chair. Mon ti oule zis entervenir. Me mon krwar Mr Amelie in koz en pe lo sa size 2030. Eski 2030 i pa tro lwen? Target ki nou'n diskite avek Meteo, se ki tou le lannen nou anvoy 2 etidyan aletranze ki fer ki 2025, nou'n merit kapab anvoy 10 etidyan aletranze.

Me apre parey *CEO* in dir, i pran 3an pou *train* en etidyan lo sa nivo. E i annan sa size *licence* osi ki vini. Alor deza la nou pe koz 2028 si nou pou kapab form ase dimoun pou ranplas sa bann ki la. Sa bann etranze ki la.

Alor, mon konnen Onorab ki 2030 i paret en pe lwen, i paret en pe dousman. Me si nou ganny plis larzan nou a kapab anvoy petet 3. Me selman petet ou pa pou ganny ase etidyan lokal ki'n pare pou al fer sa kalite formasyon.

Nou pe estimen ki dan en lannen nou kapab ganny 2. Me si nou kapab anvoy 2 tou le lannen alor nou merit kapab ariv pros avek nou target *by* 2025/2028 petet. Mersi.

**MR SPEAKER**

Mersi. Onorab Ghislain.

**HON CHANTAL GHISLAIN**

Mersi Mr Chair. Bonn apre midi *CEO* e bonn apre midi tou bann dimoun. Sanzman klima i en size ki mon'n touzour pasyonnen avek *and* Mr *CEO* mon krwar ou kapab mazin byen tanzantan nou ganny en pti *call*, nou koz en pe lo la, lo sa size.

I annan sa size, lefet ki Lafrik osi en, kot Sesel i tonm ladan i vremen vilnerab avek sanzman klima. E ti annan en size ki nou ti pe koz lo la lot fwa, an se ki konsern dan domenn koleksyon bann *data*, *management* sa bann *data* e osi analiz sa bann *data*.

I annan en mankman teknisyen nou ti pe koz lo la ki annan. *And* osi pou kapab entegre tou sa bann *data* ansanm *and* ki vremen ki Lafrik, sirtou dan rezyon SADC ki Sesel osi i form parti ladan. Ki nou kapab annan sa sinerzi, osi par egzanp partaz bann *best practices and all*.

Ki ou pe fer vremen *CEO* pou kapab osi fer ki sa bann *data* ouswa sa bann keksoz koumsa la, i al lo nivo Lafrik e nou Sesel nou osi nou form parti ladan, pou fer sir ki nou kapab, dizon par egzanp en *Regional Capacity Building Centre*.



Eski dan sa bann moman osi la i enn bann keksoz konmsi ki zot pe mazin lo la an se ki konsern meteo ?

Mon demann sa keston avek meteo akoz se zot ki koleksyon sa bann *data* an se ki konsern sanzman klima, *weather and everything*. Mersi.

### **MR SPEAKER**

*CEO*, wi?

### **CEO VINCENT AMELIE**

Mersi Chair. Mersi Onorab. Onorab i annan serten keksoz ki mon bezwen dir li egzaktman parey i ete e mon travay sirtou avek sa bout lavyasyon. In fer nou vin bann dimoun vreman disiplin dan lafason ki nou fer nou louvraz. Swiv byen prosedir.

Fer sir, ki akoz i annan pou fer avek *safety of live*. Nou pa *deviate from* kriter, *from standar*. E *data* i parey.

I annan en ta diskisyon ki tour otour *data*. *Share data, share data* isi, *share data* laba. I annan en kou dan anmas *data*. Nou pey dimoun pou anmas *data*. Nou bezwen *be careful* avek lekel ki nou donn *data*.

Akoz nou koz ozordi i annan bokou bann dimoun ki fer konsiltan. Konsiltan sanzman klima e zot, zot

ganny en ta larzan avek bann *consultancy*.

Me selman nou pa kapab zis vini dir nou pran *data* nou pran nou donn zot. Ki zot, zot pe al fer larzan avek.

Savedir *any* striktir ki nou anvizaze pou met an plas pou *share data*. I bezwen en striktir ki ganny byen definir ki egzaktman ou pa al fer avek sa *data*. Ki i pa *something* ki fasil.

Nou selman dan nou Polisi meteo, nou deza annan serten Polisi par egzanp si manrmay skoler, *Unisey*. Manrmay ki pe fer zot *study*. Zot vini zot rod zot lenformasyon ek nou, nou sipoze donn zot *free*. Akoz nou konnen poudir sa i pa pe vin *something* komersyal.

I annan bann lezot domenn. Gouvernman, letablisman Gouvernman si i vin rod en lenformasyon, nou donn lenformasyon *SFA* preski toulezour. Nou donn lenformasyon Sekter Lagrikiltir preski toulezour.

Sa bann nou konnen pe al servi pou en koz nasyonal. Me letan ou pe koz mwan bann Lenstitisyon Enternasyonal kot i annan en bann *expert* e ki zot an retour apre zot pran nou *data* pou zot al fer bann lezot *study*, ganny en ta larzan *out of it*, nou tant *to be a little bit reluctant* e fer

sir ki sa *data* i vreman ganny konserve.

Akoz nou pa sipoze. Nou pa sipoze aköz nou, nou pe pey dimoun pou anmas *data* pou nou. I travay 7 lo 24. I pa kapab zis vini. Nou fer *quality control* lo *data*. Tousala i konte. Nou pa kapab zis prezan vini donn ou e ou, ou fer *study* ki apre ou al anmas milyon.

Savedir en pti pe sa. Wi, nou bezwen annan en sistenm kot *share data*, me selman i enportan avek ki, ki nou *share* sa *data*. Mersi Mr Chair.

### **MR SPEAKER**

Mersi *CEO*. Onorab Henrie.

### **HON GERVAIS HENRIE**

Mersi Mr Chair. Bonn apre midi tou dimoun. Mr Chair, mon annan en komanter ki ava en pe zeneral, me selman aköz size ki Onorab William in leve e bann larepons ki nou'n gannyen.

Pou groser ou lorganizasyon, mon vreman soke si pa dezapwente avek lakantite *expatriate*. Son poursantaz i vreman o. E nou'n vwar sa dan Lapolis, nou'n tann bann etranze ki la, dan servis prizon. E nou'n fer en konparezon lakantite larzan ki pe sorti, apepre R3milyon par an pou ou.

So, komanter an zeneral ki mon oule fer Mr Speaker, se

ki bann antite pe vin devan nou, koman en Lasanble nou bezwen port plis latansyon lo zot manda.

*ANHRD* ti pas devan nou, mon pa ti demann kestyon lo sa *headings*, mon ti obzerve, me i ti malere ki ti napa en kestyon lo son rol dan develop en kad pou developman imen, partikilyerman *human capital*. E pou travay avek bann Lorganizasyon e endividi, pou asire ki *the skills set* dan pei pe kontinyen annan.

Minis Joubert ti lan devan mwan *Polytechnics* i pou konn byen, bann manmay ki ti pe fer *Geography*, *Maths*. Bann Beryl, bann Hyacinthe. Ti pe al dan enn, de. Toulezan *Meteo* ti pe gannyen.

*And then* i ariv en *gap*, nou vwar 11 etranze. E bann etranze zot pe koz en problemm dan lesans *forex* i sorti, zot en tiket ki zot al kot zot tou lezann. La ou pa pe gannyen aköz blokaz lo bann *travel COVID* e zot pe rezerd en pe, mon konnen.

So, ki mon pe oule dir, komanter zeneral Mr Speaker, se ki nou koman en Lasanble nou bezwen port plis latansyon lo rol sa bann antite ki annan san bann Minister Finans pe get Bidze.

*PEMC* kot Mr Tirant laba, asir poudir zot pe fer bann Lorganizasyon, bann *Board* pe

fer byen zot bann manda. *DPA*, bann zafer regleman. Konmsi nou koman en Lasanble nou bezwen aport plis latansyon lo la e asire ki letan nou pe donn zot en Bidze zot pe fer sa travay ki pei, i pa leve en zour bomaten i vwar poudir nou dan gran difikilte.

Akoz nou dan nou rol *oversight* koman en Lasanble nou'n *fail to keep an eye and to raise the alarm* ler keksoz pe deteryore. Sa ki mon ti anvi dir Mr Speaker.

### **MR SPEAKER**

Mersi. Wi *CEO* adrese.

### **CEO VINCENT AMELIE**

*Thank you* Chair. Mon apresye Onorab. Zis en pti komanter osi par rapor ek sa ki Onorab in fer resorti. Si ou pou gete ankor Onorab nou tant pou, nou difikilte i vin *more* lo kote sa bout ki annan pou fer avek *aviation meteorology*.

Nou ti annan en ta Seselwa kot nou, kalifye. Me a sa lepok, zis avek en *Diploma* ou ti fer *forecasting* e i ti akseptab. Ou ale, ou fer en *Diploma 2 years*, ou tournen ou fer *forecasting*. E pou en bon pe lannen dan letan pase se ki se sa ki ti pli *dominant*.

Me dernyen 5 a 10an zot in sanze sa kriter dan *aviation*, i dir ou pou ou kapab fer sa louvraz fodre minimonm

*qualification* se en *BSE*. Zot in lev bar.

E se la ki nou'n santi nou kwense, akoz dan lepase tou dimoun ti pe santi li konfortab. Promosyon ti pou baze plizoumwen lo *seniority* e ti annan *very good forecaster*.

E an realite leksperyans in montre poudir pa tou bann ki annan en Degre ki kapab fer sa louvraz pli byen ki bann ki en pti pe pli ba, en *Diploma*.

Me selman kriter se kriter. Nou bezwen *follow* kriter. Nou pa kapab, *ICAO* i dir ou fodre ou annan sa *BSE*, *then* ou bezwen.

Akoz si zanmen demen i ariv en problemm avek en avyon e zot trouve, zot idantifye poudir ti en problemm *weather*, enn bann keksoz ki zot pou vin gete se kalifikasyon bann dimoun ki la.

E alors nou napa swa, se la kot in ariv en moman kot nou'n santi nou'n tant pri en pe e la prezan ki nou'n bezwen al rod sa bann *expatriate* lo sa nivo.

Se sa en pti Onorab. Selman mon oule garanti ou, se ki nou pou reisir *achieve* sa target, ranplas sa bann *expatriate* avek nou bann Seselwa e *train* Seselwa, non selman dan *general meteorology*, me met zot sa ki nou apel bann *well trained*, bann *well trained* Seselwa.

En manner ki si zanmen demann ICAO i vin avek en lot kriter, i dir prezan i pe sanz ankor standar. Nou, nou pou konnen poudir nou dimoun i'n fini ganny *train* lo en nivo ki nou pa pou bezwen pe al *expatriate* ankor. Mersi Onorab.

### **MR SPEAKER**

Mersi. Onorab Pillay.

### **HON SEBASTIEN PILLAY**

Mersi Mr Chairman. Mr Chairman avan mon komanse mon krwar i enportan ki mon koriz en petet en mis apreansyon. Kekfwa Onorab ki'n koz avan mwan pa ti swiv. Me ti annan mon krwar 3 kestyon sorti 2 lo son kote latab.

E enn lo sa kote ki ti fer Minis Valentin eksplik rol ki *NHRD* pou zwe dan *manpower needs exercise*.

E si mon pa tronpe ti Onorab Hoareau. Me selman ti annan detrwa kestyon e Minis Valentin ti al dan en long leksplikasyon, lo ki manner Minister Ledikasyon pou travay avek en *interface* avek *ANHRD*, pou li kapab etabli sa *manpower needs exercise*. E in deza annan bann *economic needs test*.

Me mwan mon krwar en keksoz ki neser nou konsidere an relasyon avek ou Bidze premyerman. Mr

Speaker, mon krwar bokou zenn Seselwa pou rapel a en moman donnen dan lekol, i annan en bout program lekol. Sirtou dan mon krwar si mon pa tronpe dan lasyans, kot ou ganny sans al vizit Erport.

E sa vizit Erport i enn bann zour pli eksitan pou ou dan lekol. Akoz sa zour bomaten ou netway ou savat may dan pous pli prop posib, ou'n fer sir manman in donn ou, ou R10 e ou annan ou *sandwich* ek ou akoz ou pe al Erport, pou vizit Erport. E ou vwar avyon pe apoze, ou ganny sans antre anndan kot Biro Meteoroloji.

Me sa ki ti pli enteresan, zot ti osi met nou anler kot *control tower*. E sa vizit i enn bann vizit konmsi dan letan skoler ki bokou zanfan i *look forward to*. E sa i montre, i montre sa lantouzyazm ki en zenn i annan a sa moman ki apre *overtime* ki Mr Amelie pe dir, i perdi, akoz lesot filyer karyer i vin pli enteresan pou sa zenn.

So, mon krwar enn bann keksoz ki mon ti a kontan demann Minis. Minis eski an relasyon ek program *outreach* ki ou Minister pe fer - mon konnen lo kote konservasyon ou'n fer en kantite travay.

E nou'n vwar plizyer zenn al *train* dan domenn

konservasyon, dan bann domenn lanvironnman, dan bann *means* Lanvironnman. Me eski ou pe osi servi ou Minister koman en *Secretariat* pou annan, anmenn plis *outreach* an relasyon ek sa?

Dezyenmman, dezyenm kestyon se an relasyon avek sa. Si oule sa relasyon ki egziste ant Biro Meteoroloji ek SCAA. Eski sa relasyon i enn ki ankor pe fonksyonnen e enn kot biro meteoroloji i kapab *rely* lo resours ki SCAA i kapab *provide*? Dot, an plis ki mon konnen SCAA osi i annan son bann difikilte an se moman avek lakantite resours ki i kapab *provide*.

E mon dernyen kestyon. Ler mon pe regard ou Bidze i napa preski naryen an relasyon avek ou bann *machine and equipment*. Annefe i bann pti *amount*.

So, eski mon pe konpran poudir i napa okenn nesosite pou annan okenn *upgrading* okenn lekipman kot biro meteoroloji?

Oubyen si i annan, zot in *plan* pou fer li dan en dele letan pli lwen. E mon ti ava kontan ou eksplik mwan akoz ki ou annan sa *audit fees* ki apepre R411 mil ki mon vwar la e pou ki rezon sa *audit fees* i la? Mersi Mr Chairman.

### **MR SPEAKER**

Mersi Onorab. *CEO*, wi. Minis i oule komanse? Wi.

### **MINISTER FLAVIEN JOUBERT**

Mersi Mr Chair. Mersi Onorab pou ou 4 pwen. Kot i konsern *outreach*, byensir sa i enn bann keksoz ki merit ganny pli byen entegre dan bann program. I pa toultan le ka, petet Mr Amelie i ava konfirman konbyen fwa ki i ganny bann group etidyan par lannen.

Me mon krwar i posib pou nou annan plis sa bann vizit pou aktyelman fer bann manmay vin enterese dan sa bann size.

E enn bann diskisyon ki mon'n gannyen kot lanvironnman osi, ki mwan mon krwar nou kapab fer en pe pli byen. Se ki ozordi nou pe *train* bokou dimoun pou fer *BSc*. Par egzanp, parey ou'n koze, i annan dimoun ki bokou bann dimoun ki annan *BSc* dan konservasyon, lanvironnman eksetera.

Me mwan mon konsern ki nou napa ase dimoun lo nivo teknik. Parey Mr Amelie ti pe koze lo bann dimoun ki annan *Diploma* leve e ki konn manipil bann diferan kalite lekipman. Ki konn fer bann travay pratik, par egzanp pou al obzerve, pou al manipil bann lenstalasyon deor, eksetera.

E mon krwar i enportan ki nou kapab osi anmenn bann etidyan pou vin enterese dan sa laspe pratik, aplikasyon pou ki zot kapab vremen vin enterese e antre dan sa bann rol boner. E apre nou kapab anmenn zot pou zot devlope e ganny zot kalifikasyon e bouze.

Mwan enn bann keksoz ki mon'n remarke Onorab, mon'n pas dan Gouvernman, dan plizyer landrwa. Bokou dimoun ki ou vwar pe fer byen ozordi i bann dimoun ki'n komans lo en baz pli ba e lo en baz pratik.

Parey Mr Amelie in fer sorti, bann dimoun ki fer byen dan meteoroloji i bann dimoun ki ti komans la koman en pti dimoun ki'n aprann tou sa bann teknik e in monte.

E alors mon krwar i annan en bon potansyel pou nou kapab dan meteoroloji osi anmenn bann zenn e fer zot enteres e fer zot komans boner pou zot kapab devlope e apre zot a ganny zot kalifikasyon, zot ava bouze, zot ava vin en dimoun ki vremen annan sa kantite kapasite pou fer sa bann rol, pou zer sa bann rol dan servis meteoroloji.

Mon pou les Mr Amelie koz lo sa size SCAA avek meteo. *Machinery, equipment* e osi *audit*. Mersi Mr Chair.

### **MR SPEAKER**

Mersi Minis. *CEO*.

### **CEO VINCENT AMELIE**

Mersi Chair. Chair permet mwan zis fer en lot pti lentrodiksyon oubyen en lot pti lesplikasyon pou kekfwa en size ki ava ed bann Manm osi e ki letan nou pli byen konpran nou a pli kapab kekfwa apresye en pti pe bann keksoz ki mannyer i ete.

Alors Onorab, si mon kapab *takle* sa *issue*. Sa topik SCAA, nou relasyon i tonm *more or less* ansanm avek *audit fees*. Akoz ki nou bezwen, ki savedir sa *audit fees*.

Dan meteoroloji li menm, nou ganny demande ki atraver *aviation metrology* pou annan en sistenm ki nou apel *quality management system to put in place*.

E *quality management system* savedir nou bezwen fer sir ki letan *Emirates* i vini, si i demann nou *atmospheric pressure* ki lir 1010.2, nou bezwen donn li 1010.2 e li i *settle* son masin.

E ki letan *Emirates* i vini i apoz son masin ater, fodre son masin *altimeter* lo son *screen* devan, i lir ('0') zero. Fodre pa ki i pe lir en lot, akoz si i pe lir en lot i pou krwar i ankor anler, kan in fini bat ater. I *very precise*.

I en louvraz ki bezwen mars ek standar. I annan

bann ler spesifik ki ou bezwen lir serten paramet e ki ou pas avek avyon. Savedir i disiplin sa, ou pa kapab fer fot.

Avyon se pour sa rezon ki enn ler i apoz aswar, i pa vwar ek son lizye, me i servi bann paramet ki meteoroloji ki nou donnen pou zot set zot masin.

E savedir nou bezwen, i annan sa ki nou apel sa *quality management system* ki dir ek ou, ou bezwen met an plas. Tou dokimantasyon, ki mannyer ou fer ou obzervasyon. Ou dimoun fodre i kalifye, i enn bann kriter.

Ou lekipman fodre ganny *calibrate*, fodre ganny *maintain* lo en nivo ki fer sir ki ou kapab kontinyen donn sa bann lenformasyon.

E letan tousala i an plas, ou ganny ou en sertifika ki dir ek ou ou'n *meet* kriter *quality management system* dan *aviation meteorology*.

E mon fyer poudir se ki nou'n fer en bon pe travay dan sa ki konsern standar dan lavyasyon e ki tar sa lannen dan *third quarter* nou espekte al sertifye *ISO certification 9001, 2015*. Nou'n preski fini *meet* tou bann kriter ki enkli annan dimoun ki kalifye, menm si zot si zot *expatriate*.

Me selman i pou enn bann *requirements* ki nou bezwen *meet*, pou nou kapab

al sertifye koman *ISO certification*. E sa *audit fees* li prezan i antre. Se ki ou bezwen anmenn en *expert* aletranze pou vin *audit* nou.

E se sa fre ki letan zot pou vin isi Sesel, zot pou vin tyek tou nou bann standar. Eski ou annan dimoun ki kalifye dan lavyasyon?

Eski ou bann lekipman i *calibrate*? eski i ganny *maintain*? Eski ou bann dokimantasyon?

*Once* ki ou'n *meet* tousala, *then* i donn ou, ou sertifika ki ou *operate safe*. Demen i ariv en *issue*, ou pa kapab blanm person, parske zot pa pou kapab blanm ou.

E se le kot sa *fee* i antre. Se ki pou nou anmenn sa konsiltan, sa bann *expert*, pou sertifye nou, akoz nou santi in *third quarter* sirtou, nou pou'n pare pou nou al *ISO certification*.

*Then* alors, pa tou keksoz ki get, *ya*, avek *expatriate*. Tousala i annan en rezon akoz ki nou pe fer li pou *meet* sa kriter. Nou relasyon avek SCAA i enn ki *strong*.

E la mon ti a kontan Minis in komans koz lo la en pti pe Mr Chair. I enportan ki bann Manm kekfw a i okouran, se ki nou, nou *service provider*, SCAA i *the regulator*.

SCAA i annan son *mechanism in place* li osi kot i vin fer sir ki i vin *check*. I fer

sir ki sa laspe *aviation meteorology*.

Nou louvraz i bokou plis, nou fer *general forecast to the public, marine* parey mon'n dir lo komansman. Me sa bout laspe *aviation meteorology, SCCA i the regulator*.

E li i fer sir ki tanzantan i pase, i gete si nou pe *meet requirements*. Sa bann *requirements ICAO*. E si nou pa *meet* i fer sir ki i donn nou bann *compliance* ki finalman nou bezwen rod en fason pou nou *meet*.

E pou bokou bann lannen nou'n travay pros ek zot. Kot i annan menm bann moman ki zot in finans nou avek plizyer bann proze. Me la sa i pe ariv lo en staz la aprezan kot nou sipoze pe al komans anmas en pe reveni avek SCAA.

Dan nou manda, dan sa striktir *quality management system in place, ICAO* i egzize ki tou sa larzan ki *airline* i donn SCCA i annan en konponan ladan ki pou *aviation meteorology. Airline* parey i dir letan i pey SCCA poudir sa bout i pou *meteorology*, sa bout i pou isi, sa bout i laba. I donn li en sel *fee*.

Me ladan i annan en bout ki pou meteoroloji. Nou ki nou ti fer lannen pase, me i difisil pou ou konnen ki sa

bout ki ou pou *factor out*. Akoz i donn zot en *lump sum*.

Nou ki nou ti fer avek finansman ki nou ti gannyen avek Finans, nou ti anmenn en konsiltan pou fer sa legzersis. E mon fyer pou anonse ki sa legzersis in konplete e nou'n fini konnen, nou'n devlop *formula*.

E nou konnen ozordi konbyen nou pou anmase avek SCCA tou le mwan, e i en sonm ki ase signifikan. E sa larzan ki Lavyasyon i donn ou i dir ou fer 3 keksoz prensipal avek.

Fer sir ki ou lekipman i *maintain*, i ganny *calibrate* e ou annan dimoun kalifye pou travay. Sa nivo ki zot pe demande.

E nou, nou santi ki avek sa larzan a lavenir nou pou kapab finans nou bann prop dimoun e ale. E se pour sa rezon Onorab, pou retourn en pti pe lo pwen Onorab William, se ki nou konvenki, nou konvenki se ki a lavenir nou pou *achieve* sa target avek nou plan ki nou annan an mars.

Parski larzan osi pou nepli vin en *issue*. Nou pou ganny nou *fair share from SCAA* ki pou ed nou, pou nou kapab finans nou bann proze *training*. Mersi Onorab.

### **MR SPEAKER**

Mersi. Mersi *CEO*. Avek sa nou a kapab pran vot lo sa



Bidze. Bidze pour *Seychelles Meteorological Authority* lo paz 528 ziska 532 pou en total R14milyon 787mil. Manm ki an faver lev lanmen silvouple? Mersi.

Lo Bidze pou *Seychelles Meteorological Authority* lo paz 528 ziska 532 pou total R14milyon 787mil, 32 Manm in vot pour, 0 Manm kont e 0 abstansyon. Alors mon deklare ki sa Bidze in aprouve.

Avek sa mon a dir mersi bann zofisye ki'n avek nou ozordi. Minis Joubert, PS Thesee e zofisye *Meteorological Authority* Mr Amelie e Mrs. Rapiera. Avek sa nou a pas dan Staz Lasanble pou nou *adjourn* e nou a zwenn demen bomaten 9er. Mersi.

**(ADJOURNMENT)**